

قلب العاشق دليله.....د.هاشم بكري

قلب العاشق

دليله


تأليف

د.هاشم بكري

دار الروضة

للطباعة والنشر والتوزيع

دار الروضة



رقم الإيداع بدار الكتب/٢٠١٩/١٧٩٠

الترقيم الدولي

حقوق الطبع محفوظة

دار الروضة - للنشر والتوزيع

٢ درب الأتراك خلف جامع الأزهر
٢٥٩١٣٤٢٤ - ٢٥٠٦٦٨٨٤ فاكس: ٢٥٩٢٧٣٦٤
darelrwdamms@yahoo.com

قلب العاشق دليله د/هاشم بكري

الفصل الأول

الحادثة

قلب العاشق دليله د/هاشم بكري

دار الروضة

علاء: الو فينك يا ابو المزز.

سماح: موجوده سماح ياروح قلب سماح أنت لسه مش عارف أنا فين.

علاء: أنتي في القلب والعين حبيبتي الحقي الحقي.

سماح وهي ممسكه بالمحمول تلتفت يمينا ويسارا وتقول:
فيه إيه فيه إيه؟

علاء وهو يضحك: فيه إني باموت فيكي وفي ال
خلفوكي، واعملي حسابك ها نخرج النهارده بعد ما ارجع من
الشغل، انا عاوز اشهيص وابصبص وادلع وأروق مع روح
الروح وبلسم الجروح.

سماح: بصراحة مش عارفه بس ها اقول لآمي الأول
وابقى اتصل بيك، وبعدين تعالى هنا تبصبص لمين وانتى مع
سمحح عسوله الحارة والحارات المجاورة دا انا كنت اقطعك
ديلك لو حسيت انك ها تلعب بيه.

علاء: تستأذني من مين يا بنتي دا امك ال تستأذن مني
واحد مخطوبة ومكتوب كتابها وتقولي ها استأذن إيه ال احنا

قلب العاشق دليله.....د/هاشم بكري

فيه دا انتي فصلتي أُمي معاكي.

سماح لامها بعد أن أنهت المكالمة مع علاء: أم سيد ام سيد.

أمها: أكيد عاوزه حاجه مدام بتتمحلي كدا انا عارفاكي
وكم ان عارفه الحاجه ال انتي عاوزاها، انا سمعاكي وانتي
بتكلميه عليا عاوز إيه يابنتي موضوعكو دا مش قرب بيقى ليه
اخر بقى الناس في الحاره كلت وشنا؟

سماح: خلاص يا أما علاء قرب يشطب الشقه ويا دوب
شوية شهور ها تكوني بتغنيلي اتمخترى ياحلوه يا زينه يا ورده
من جوه جنيته.

أمها: يا رب يا بنتي دا موضوعكو طول زياده عن
الازم.

سماح: انتي ياست انتي أنتي بتلفي ودوري عشان
تتوهيني عن ال كنت عاوزه اقولك عليه.

أمها: أبقى روحي وخلي بالك من نفسك ولما ابوكي
يرجع انا ها اتصرف.

سماح وهي تقبل يد أمها: ربنا يخليكي ليا يا احلى ام.

دار الروضة

أمها: شوف يا اختي البت البكاشه.

احمد زميل علاء في الشغل يسأله: إيه يا علاء مش خلاص أنت ما قربتش يا ابني تبني عشك دا لو يمامه مش حمامه بتبني عشا كانت بنت برج.

علاء: يعني ها اعمل إيه ادبك شايف شغل ورديتين حتى يوم الجمعة باشتغلوا وابويا الله يرحمه طبق معايا الخسيسيه وسابني وقال يا فكيك خلع بدري..

أحمد: والله يا أخي ال بيموت بيرتاح.

علاء: يا عالم محدش عارف بيعمل إيه.

احمد: يلا خلينا نخلع بس مش من الدنيا من الشغل.

علاء: وانت بها، مش ها نستأذن من المدير؟

أحمد: مدير إيه يا ابني هو فيه غيري وغيرك الناس كلها مشت.

علاء: ها تركب مترو ولا مكروباص انا ها اركب مكروباص عشان يوصلني قدام الشارع بتاعنا لانني مفيش حيل امشي.

قلب العاشق دلييله.....د/هاشم بكري

احمد: انا بقى مفيش حيل اركب مكروباص وقرف
المكروباص.

علاء: سلام اشوفك بخير وعلى خير ومع خير يا وش
الخير.

احمد: إيه يا ابني أنت ها تموت ولا إيه ما احنا في وش
بعض كل يوم هو سواد الليل يلا سلامو عليكو.

عاد علاء إلى الحارة التي يسكن فيها وغالبية أهل الحارة
يعرفونه فهو علاء محمد حسن ابن أم علاء الخياطة
المتواضعة التي تخطط بعض الملابس لبعض نساء الحارة
وتصلح ملابس من تحتاج ملابسهم لترقيع، سلم علاء على كل
من يقابله من أهل الحارة وعلى النساء التي تجلس لبيع
الخضار في الشارع، وقف مع بعض الشباب سألوه طارق
البرنس: إيه يا عم احنا ماقربناش نعلي الجواب للناس ال كاتبة
الكتاب ونروق الاناني ونعلي المعاني ونفرح فيك، الحارة كلها
عاوزه تردلك الجمال بتعتك ووقفتك مع الكل.

قال عمرو بانجو وهو يأخذ نفس عميق من سيجارته
المشتعلة: أنا عليا تظبيط الأدمغه وتصلح الروس يعني عليا
البانجو والحشيش والمازه على غيري.

دار الروضة

قال فاضل: مستتعجلوش محدش عارف الفرح ها يتم ولا لأ.

نظر اليه علاء بضيق وقال: وغلاوتك هايتم وهاترقصلي فيه بس اعمل حساب النقطة عشان ابقى ارداهلك لما ربنا يفك عقدتك.

فاضل: أنا ماعنديش عقد وبكره نقف ع الحيطه ونسمع الظيطة يا خفيف.

قال حسين السحت: سيبك منه يا علاء صحبك فيوزو ضربت وابلتينو لسع.

علاء: على رأيك تؤمرو بحاجه يا رجاله سلام على احلى شباب بس ونظر الى فاضل وأشار إليه بيده وقال سلك قلبك عشان ربنا يسهلهالك.

وصل علاء إلى بيته المتواضع والذي يتكون من صالة وحمام ضيق وغرفه وحيدة فيها سرير وبمجرد سماع صوته في الحارة أسرع أخته سعاد وفتحت له الباب نظرت إليه أمه ورفعت يديها إلى السماء وقالت: ربنا يسعدك يا ابني هاتي يا بت يا سعاد الغدا لاخوكي.

قلب العاشق دلييله.....د/هاشم بكري

علاء: وانتى مش ها تتغدى يا وليه يا عجوزه ولا إيه؟

أم علاء: طبعاً يا نور عين امك ها اتغدى، والتفت إلى سعاد وقال: وانت يا جميل؟ سعاد: أنا عن نفسي اتغديت واستناك ليه ما أنت عندك يا عم الناس ال بتستناك.

علاء: بطلي غلاسـه وخليكي حلوه ولا سيحي يا بت ولـمي علينا الحاره بطلو غيره بقى وحقد بقى.

سعاد: وهى تضع يديها على فمها كأنها ستنادي بأعلى صوتها وعلاء يجري وراءها ويحاول الإمساك بها ولكنها هربت منه.

اتصل علاء بسماح ليطمئن عليها وبادلها كلمات الحب بعد أن تناول الغداء وأغلق على نفسه الباب: الو ايوه يا مجنناني.

سماح: انا مخمصاك ومباكلمش مش احنا ها نخرج النهارده.

علاء: والله انا هلكان يا روح علاء أنا كنت مضطرب نفسي ع الخروجه وعارف انك انتزعتي الموافقة من أم سيد بس انا ميت.

دار الروضة

سماح: علاء لو بتعزني مش عاوزه اسمع الكلمة دب
منك تاني انا ولا أنت.

علاء: انا مشغول بموضوع الشغل والشقة، يعني من
الأخر انتي ال تعبانى.

سماح: بجد طيب انا مش ها اكلمك عشان اريحك والعيب
على ال ما يعيطش.

علاء: والنبي يا سماح انا عاوز منك طلب.

سماح: قول يا .. إل طلباتك ما بتخلصش.

علاء: انا عاوزك تشتريلى علبه مناديل.

سماح: ليه بقى يا فالح ليه يا خفيف.

علاء: عشان انا اكيد ال ها اعيط.

ابو سماح: يا ام سيد انتي يا ام سيد.

أم سيد: ايوه يابو سيد فيه حاجه يا اخويا.

ابو سيد: البننت فين يعني مش شايفها.

ام سيد: في اوضتها اناديلك عليها يا اخويا.

قلب العاشق دلييله.....د/هاشم بكري

أبو سيد: لا خلاص وسيد اتغدى ولا لسه؟

أم سيد: سيد اتغدى وقال انه ها يريح شويه عشان يقوم
يقف مكانك في الدكان.

أبو سيد: خلاص هاتيلي انا اتغدي وصحيه يروح الدكان.

أما علاء فكعاداته ينام مبكرا ليستطيع القيام مبكرا ليخرج
إلى عمله الأول بعد تناول الطعميه السخنه التي تقوم أم علاء
بقليها في البيت والبول ويتناولوا الإفطار معا وسعاد تذهب
لمدرستها وعلاء يخرج لشغله وأم علاء تمارس عملها تصلح
الملابس القديمة لبعض الجيران بمقابل زهيد تدخل عليها إحدى
جارتها: يا ام علاء يا ام علاء.

أم علاء: مين؟

جارتها: انا جمالات.

أم علاء: تعالى يا اختي اتفضلي.

جارتها: والنبي تزبطيلي العبايه جبتها وجات واسعه عليا
شويه.

أم علاء: تعالى يا اختي.

جارتها: ازيك يا استاذ علاء عامل إيه؟

دار الروضة

علاء: الله يسلمك يا خالتي جملات ادعيلي.

جملات: ماقربناش نفرح ببيك بقى ولا إيه.

علاء: هانت يا خاله.

جملات: روح يا ابني ربنا يسترها معاك دنيا و اخره،
وانتي يا سعاد ربنا يرزقك با ابن الحلال.

سعاد: انتي لسه ماسكه في ابن الحلال اسمها يرزقك بواد
موز يرزقك بانتيمك.

أم علاء تضحك وتقول: دي كلها لماضة يا جملات يا
اختي أنت عارفه جيل اليومين دول.

جملات: انتي تعرفي يا ام علاء معناة الكلام ال بنتك
بتقولو دا؟

أم علاء: والله يا اختي ماعرف منه حاجه ولا الانتيكه ال
بتقول عليها دي.

وصل علاء إلى الشغل كعادته تقابل مع احمد وانتهى
اليوم عمل عادي خرجا من عملهم قال علاء لاحمد: انا مش
عارف قلبي مقبوض النهارده كدا ليه؟

قلب العاشق دلييله.....د/هاشم بكري

أحمد: اكيد ال بالي بالك ماتصلتش بيك من يبجي ساعه
على اميته واحب زي ناس والاقى ناس بتسأل عليا جاتنا نيله
في حظنا البوتجاز.

علاء: طبعاً عشان أزمة الانابيب وبعدين تعالى هنا أنت
هاتصيع عليا دا أنت مقطع السمكة ودليها.

أحمد: لو سمحت انا مقطع الديل بس لسه ما قطعتش
السمكه لسه يا علاء البت ال عرفتها على الفيس بوك من حظ
امي الهباب طلعت واد بعد ما خلتنى شحنتها كام كارت.

علاء: تستاهل تعيش وتاخذ غيرها يلا سلام.

أحمد: اشوفك بكره.

علاء: يا عالم هاتشوفني تاني ولا لأ.

ركب علاء الميكروباص ونزل أمام شارع كالعادة
وبينما هو يعبر الشارع وإذا بسيارة مسرعه تصدمه فيسقط في
حاله حرجه ينزل صاحب السيارة الفارهه الذي صدمه ويحمله
بسرعة إلى احد المستشفيات الخصوصية وهو في حالة متردية
للغاية ونزيف لايتوقف، ادخله الاستقبال وكان التشخيص
المبدئي إصابات بالغة بالقلب والحالة حرجه للغاية.

دار الروضة

أسعد بيه: والمطلوب إيه؟

الدكتور: لو أمكن سعادتك ممكن يتنقلو قلب ودي افضل حاجه ومن حسن الحظ اننا جالنا قلب النهارده، بس العملية ها تتكلف مبلغ كبير.

سعد: ولا يهمكو موضوع الفلوس انقلولو قلب.

الدكتور: عاوزين البيانات وتعهد واسمه وعنوانه وبياناته الشخصية.

أسعد: انا ما عارفوش حاولوا تشوفو بيناتو من البطاقة الشخصية.

قاموا بالتفيش في جيوب علاء فلم يعثروا معه على إي إثبات للشخصية يبدو أن البطاقة قد فقدت أثناء الحادث.

الدكتور: دا ممعوش بطاقة ولا أي إثبات شخصية، وبعدين أنت لما ما تعرفوش إيه ال خلاك تجيبو وتدفع تمن العملية المبلغ الكبير.

أسعد: وانت مالك انت الظاهر عليك مش عارف أنت بتكلم مين خليك في شغلك وبس، حاول تسعف الراجل

قلب العاشق دلييله.....د/هاشم بكري

وخلص.

الدكتور: انا اسف يا افندم وتعالى معايا عشان تدفع تأمين
ونعملوا استثمارة دخول.

بدأت أم علاء تحس بتأخر ابنها على غير العادة فنادت
على ابنتها سعاد: يا سعاد يا سعاد.

سعاد: ايوه يا أما.

أمها: اخوكي أخر قوي النهارده يا بنتي وانا قلبي واكلني
عليه قوي من ساعه المرة ال اسمها جملات دي ما كانت هنا
الصبح وانا قلبي مقبوض انتي ماشفتيش الولية كانت بتبخلق
في اخوكي كيف يا بنتي.

سعاد: سيببها الله يا أما.

أمها: ما أنا سايبهاها الله يا بنتي بس اخوكي اتأخر اتصلي
عليه وطميني انا خايفه عليه قوي عيني بترف يا بنتي اتصلي
قوام وطميني عليه.

سعاد: ثواني وها اتصلك عليه ربنا يغلينا غلاوته ياست،
ولو اني عارف انه ها يكون فين.

أمها: بطلي دلع وطميني على اخوكي.

دار الروضة

سعاد: خلاص ها اتصل.

سعاد تتصل ولم تتكلم بكلمة واحده سألتها أمها في قلق:
ها يا بنتي؟

سعاد: التليفون مقفول يا أما ولا في مكان مفهوش شبكه
استني ها اتصل تاني يا أما بردو التليفون مقفول.

أم علاء: استر يا رب استر يا رب.

سعاد: اصبري يا أما انتي ها تروشنا ليه، انا ها اتصلك
بالي تعرف مكانه وال هاتجيبو من تحت طقاطيق الأرض.

أم علاء: اتصلي يا بنتي ربنا يطمن قلبك، بس مقلتش
مين هيا؟

سعاد: هو فيه غير ها يا أما.

أمها: تبقى سماح.

سعاد: هيه بعينها.

أمها: طيب يا بنتي اتصلي وطميني.

سعاد: الو ايوه ياسماح، انتي في البيت ولا خارجين.

قلب العاشق دليله.....د/هاشم بكري

سماح: في البيت ليه؟

سعاد: أصل علاء مجاش لدوقت وباتصل عليه تليفونه مقفول.

سماح: انتي ها تشغلينا ليه، طيب اتصلي على احمد اكيد هو ال يعرف مكانه.

سعاد: انا ها اقلل معاكي واتصلبو.

سماح: متنسيش تطميني.

سعاد: ماشي سلام.

سعاد تتصل على احمد فتجد الرقم مشغول وأمها تكاد تشتعل فيها النار وتقول: ها يا بنتي طمني سماح قالتلك إيه؟ سعاد: طلعت ماتعرفش حاجه.

رن تليفون سعاد جذبه بلهفه ونظرت فيه فتجد المتصل سماح: أمها مين يا بنتي؟ سعاد: دي سماح واكيد عرفت حاجه ايوه يا سماح انا اتصلت باحمد لقيتو مشغول.

سماح: انا كنت باكلمو بس للاسف قال انه روح معاه ومن ساعة ما خرجوا من الشغل وهو ما يعرفش عنه حاجه.

أم علاء: ها يا بنتي طمني؟

دار الروضة

سعاد: ولا احمد يا أما يعرف عنه حاجه.

أم علاء: يا خراب بيتك يا نعاغه يا خراب بيتك يا نعاغه روي يا بت لعمك ابو سيد يتصرف.

سعاد ذهبت إلى بيت أبو سيد طرقت الباب خرجت لها سماح: اتفضلي يا سعاد أنت ما عرفتوش حاجه برود عن علاء؟

سعاد: لا يا سماح وجايه لعمي ابو سيد يتصرف.

أبو سيد من الداخل: مين يا سماح؟

سماح: دي سعاد يا أبا.

أبو سيد: خليها تتفضل يا بنتي فيه إيه يا سعاد؟

سعاد: علاء يا عمي ابو سيد مجاش لحد دلوقت واتصلنا باحمد زميله في الشغل قال انه روح معاه وبتتصل على علاء تلفيونه مقفول وامي ها تموت نفسها ومش عارفين نعمل إيه.

أم سيد: خليك معاهم يا ابو سيد اقعدي يا بنتي ماتخفيش ربنا ها يجيب العواقب سليمه، والتقتت إلى زوجها وسألته: انت ها تعمل إيه يا ابو سيد دلوقت؟

قلب العاشق دلييله.....د/هاشم بكري

أبو سيد: انا ها اروح ادور في الاقسام والمستشفيات وها
اخذ الواد على معايا اهو قاري ومفتح عني شويه ها اخده
بالتوكتوك وربنا يسهل،وانتي اول ما ييجي سيد تروحي تقعي
مع ام علاء لحد ما نرجع وربنا يعترنا فيه.

طرق باب أم علاء وهي شبه منهارة جرت نحو الباب
بصعوبة: مين؟

أحمد: دا انا احمد يا خاله.

أم علاء: تعالى يا ابني ادخل فين علاء.

أحمد: والله من ساعة ما طلعتنا م الشغل وهو ركب
المكروباص وانا ركبت المترو ما اعرفش عنه حاجه.

أم علاء: علاء مجاش لحد دلوقت يا احمد ومحدث
عارف عنه حاجه.

أحمد: وفين سعاد؟

أم علاء: سعاد راحت عند عمك ابو سيد ابو سماح اكيد
انته عارفه يا احمد روح شوف التانيه اخرت ليه؟

وبينما احمد يتحدث مع أم علاء دخلت سعاد ومعها أم
سيد وبمجرد أن رأت سعاد أحمد بادرته سائله: معرفتش حاجه

دار الروضة

يا احمد برِدو عن علاء.

أحمد: لا والله وانتِ عاملتي إيه؟

أم سيد: ابو سيد اخذ التكتوك وراح يدور عليه يمكن يعتر فيه يا ابني.

أم علاء: ها يدور عليه فين يا اختي دي مصر واسعه وبعدين هو عيل صغير ها يدور عليه ولا هايتوه اكيد حصلو حاجه قلبي عليك يا ابني.

بدأ الأطباء في إجراء علمية زرع القلب لشخص مجهول لا يعرفون حتى مجرد اسمه، وإنما أخذوا بيانات أسعد بيه الذي صدمه بسيارته، والأطباء يهرولون يمينا ويسارا واسعد يحاول أن يستفسر منهم عن حالة علاء المريض الذي لا يعرف حتى اسمه ولكن لا احد يجيب اللهم إلا إحدى الممرضات وقفت وكلمته عندما سألها أسعد بيه: إيه أخبار المريض إل بيعمل نقل قلب.

الممرضة: حضرتك معاه؟

اسعد: آه طمنينا.

قلب العاشق دليله.....د/هاشم بكري

المرضة: بصراحه الحاله حرجه قوي المريض نرف
كثير بس اطمن، الدكتور عمر شاطر قوي وإن شاء الله ربنا ها
يسترها.

أسعد: عموما ابقى طمئيني لو فيه حاجه.

رن تليفون اسعد، المتصل موظف في شركة الأدوية التي
يمتلكها اسعد: حضرتك فين؟

اسعد: ليه؟

الموظف: كنا عاوزينك في الشركة؟

أسعد: فيه حاجه؟

الموظف: لا مفيش بس كان فيه شوية أوراق كنت ها
تمضي عليها.

اسعد: كله يتأجل لبكره يلا سلام.

وبينما هو يهم بإغلاق المحمول خرجت الممرضة سألها
عن الحالة طمأنته أعطاهم مبلغا في يدها وأعطاهم رقم محموله
وقال لها: دا رقمي لو فيه حاجه اتصلي عليا بس ما تديش الرقم
لحد انا ها امشي وها احي بكره.

قالت الممرضة وعينها تبرق في الفلوس: سعادتك

دار الروضة

تؤمرني بس حضرتك انا باتشبه عليك وحاسه اني شوفتك قبل
كدا ؟

أسعد: ها تعرفيني في الوقت المناسب سلام.

ذهب أبو سيد بالتكتوك وطاف على بعض الأقسام
وبعض المستشفيات المجاورة ولم يصل لشيء بعد رحله معاناة
ثم قال لصاحب التكتوك: يا علي يا بني احنا تعبنا ومخلائنا
مستشفى ولا قسم شرطه إلا لما دخلناه وملوش أي أثر.

على: واحنا هانعمل إيه بقى يا عمي ابو سيد دا احنا لو
رجعنا لخالتي أم علاء وقلنا لها الكلام دا مش بعيد تتطب ساكتة.

أبو سيد: تصدق يا ابني كلامك صح دا أنت شايف كل
شوية عمالين يتصلوا بينا من ساعة ما طلعلنا ومش عارفين
نشيل عن راسنا، ربنا يهيئ ال فيه الخير، أنت حسابك كام يا
ابني.

علي: حساب إيه يا عمي ابو سيد عيب عليك ال بتقولو
دا.

أبو سيد: لا يا ابني انت على باب الله زينا.

قلب العاشق دليله.....د/هاشم بكري

على: والله ما ها اخذ حاجه.

أبو سيد: طيب انا مش ها از علك انا ها ادفع تمن البنزيم
بس ونشيل مع بعض.

على: إن كان على كذا ما يضرش يا عم ابو سيد.

عاد أبو سيد وعلى بمجرد رؤيتهم قالت أم علاء: أكيد
معرفتوش عنه حاجه اكيد غرق ولا عريبة داسته ولا حد
خطفه.

سعاد لسماح: سماح مش انتي عندك حساب ع الفيس بوك
وليكي صفحه؟

سماح على الفور: والله فكره انا ها انزل صورته ع
الفيس بوك يمكن حد يتعرف عليها ولا هو يشوفها ويرد علينا.

سعاد: بس ها تقولي إيه؟

سماح: صراحه مش عارفه تعالى معايا ونشوف ها نعمل
إيه ولا ننزل الكلام على صفحه علاء؟

سعاد: انتي معاكي الباص وورد بتاعه.

سماح: ايوه معايا، وهو معاه الباص وورد بتاع
صفحتي، ها نكتب إلى المستشفيات والاقسام واصدقاء علاء من

دار الروضة

يعرف مكانه فليخبرنا وهو ليس متخلف عقليا.

في اليوم التالي ذهب اسعد بيه إلى المستشفى بعد أن مر على شركته وقام بتوقيع الأوراق المطلوبة والاعتمادات التي تحتاج إلى توقيعه.

نشرت سماح وسعاد صور علاء على الفيس بوك ومر يوم والثاني والثالث ولم يرد احد اسودت الدنيا في عين أم علاء وكاد عقلها يطيش وأم سيد لا تتركها هي وسماح كانت أم علاء تقوم بالليل وتصلي وتدعو الله طوال الليل تقريبا: يا رب ردي ابني سالم غانم يا رب ما تحرمني اني اشوفو قبل ما اموت.

ملأ خبر اختفاء علاء الحارة فبدأ بعض شباب الحارة في التحرك للبحث عن ابن حارتهم والواد المجدع كما كانوا يطلقون عليه جمعتهم القهوة قال طارق البرنس لعمره بانجو وفاضل غلاسه وحسن صرصار: يا رجاله الرجاله مواقف وعلاء في شدة وفي ازمه ولا زم ندور عليه وانتو عارفين انه ملوش حد وياما وقف مع الكل وقفة راجل وكلنا عارفين كده.

فاضل: الظاهر عليك يا طارق راسم ع البت سعاد اخت علاء.

قلب العاشق دلييله.....د/هاشم بكري

قال حسن صرصار: إخص عليك عيل غلس وناقص هو
ال يقف جنب ابن حنتو في شدتو ييقى بيلف على اخته.

قال عمرو بانجو: سيبك منه عشان هو وسخ وجاعل
الناس كلها وسخه زيو احنا لا زم ندور عليه لحد ما نعرف
مكانه.

فاضل: انا في الخلعون وماتعملوش حسابي معاكو.

طارق: احنا عارفين انك ها تعمل كدا.

حسن: بالعكس دا انا متأكد إن دا اليوم ال انت مستتنيه يا
غلس.

عمرو: اخص على كدا الفاتحة لقلة الاصل والنداله.رفع
الكل أيديهم وقرأوا الفاتحة ومسحو وجوههم بأيديهم.

فاضل: ما نجلكمش في شهامه.وتركهم وانصرف.

وبدا أهل الحارة في مواساة أم علاء منهم من يسألها:
بردو ما عرفتنوش حاجه عن علاء يا خاله محدش من زمايله
اتصل، وأم علاء تكتفي بالإشارة بإصبعها للنفي دون أن تتكلم،
ومما يزيد الأمر صعوبة عليها وربما يعصف بها لو عرفت به
وهو أن الشركة التي يعمل بها علاء قد أرسلت لها خطاب

دار الروضة

انقطاع عن العمل بعد غياب اليوم الثالث على التوالي قرأته
سعاد في وجود سماح وتغير وجهها قالت سماح: فيه إيه يا
سعاد؟

قالت سعاد ودموعها تتساقط: دا جواب إنذار بالفصل من
الشركة ال شغال فيها علاء.

سماح: شوفي العالم الاندال الاوساخ مفيش صبر لما
نعرف عنه حاجه؟ انتي معاكي رقم احمد يا سعاد.

سعاد: معايا.

سماح: طيب هاتيه.

سعاد: ها تعملي إيه؟

سماح: ها اتصل بيه واسأله عن الجواب.

سعاد: خليكي وانا ال ها اتصل بيه الو.

احمد: ايوه يا سعاد عملتو إيه مفيش أي جديد خالص عن
علاء.

سعاد: ما أنت لو بتسأل عن صحبتك كنت عرفت ال
حصل.

احمد بلهفه: ايه الحصل؟

سعاد: حصل كل خير يعني مانتش عارف ايه الحصل؟

أحمد: انا مش فاهم انتي بتكلمي عن ايه.

سعاد: لا يا أستاذ أنت فاهم كويس وعمال تلف ودور.

وأغلقت الهاتف في ووجه وهي تنفخ قالت لها سماح: قلك

ايه؟

قالت سعاد: الواد الكلب دا ما طلعتش منه بحاجه خالص.

وبينما هما يتجاذبان أطراف الحديث رن محمول سعاد

نظرت فيه فوجدته احمد قالت سماح: مين يا سعاد؟

سعاد: دا احمد ومش عاوزه ارد عليه؟

سماح: طيب هاتيه انا هاكلمو، الو.

أحمد: ايوه يا سعاد انتي قفلتي السكه ليه انتي بتقفلي في

وشي يا سعاد.

سماح: على فكره انا سماح مش سعاد يا استاذ احمد.

احمد: طمنينا يا سماح.

سماح: انا ال اطمنك ولا أنت ال المفروض تطمني أنت

دار الروضة

راجل وصحبه وزميله في الشغل إلا اخبار الشغل إيه يا استاذ
احمد؟

أحمد: صراحه مش عارف.

سماح: يعني عاوز تقلي انك ماتعرفش ان علاء جالو
النهارده جواب من الشركه انذار بالفصل.

تلعثم وقال: ورحمه أبويا ما اعرف.

سماح: قول انك ماتعرفش ومتحلفش كذب سلام يا خسارة
الصحاب فعلا ولاد البلد والرجاله بيبنانو وقت الشده.

وقف أهل الحارة وقفه رائعة مع أم علاء في محنتها
دخلت عليها أم جابر ومعها مبلغ من المال لا يتعدى المائة
جنيه وهو كل ما تملك وقالت لام علاء: قلبي عندك يا اختي
والله ربنا ها يرجعو بالف سلامه وها تشوفي كلام خالتك ام
جابر ببيعة البليلة خدي يا اختي دول.

نظرت أم علاء في الفلوس وقالت: إيه دول يا خالتي ام
جابر؟

أم جابر: والله يا بنتي لو معايا غيرهم لجبتو دا كل ال

معاي.

أم علاء: خلي فلوسك معاكي يا خاله بعد علاء ولا مال
الدنيا يغنيني عنه دا ابني وجوزي واخويا كل حاجه يا خاله.

أم جابر: والله وربنا ليرجع وها تشوفي وتقولي الوليه
الغلبانه أم جابر قالتها.

أما في الشركة وبعد أن ابلغهم احمد بما حدث مع علاء
وانه لم يرجع إلى البيت منذ أيام قال المدير: إحنا لازم نعمل
حسابنا وعاوزكم تشطبوا عليه وتشفوه غاب من اميته وتعملو
مذكره.

قال احد الموظفين: بلاش يا أستاذ المذكره والانذار يمكن
يرجع مش عاوزين نقطع عيشه.

المدير: عيشه إيه أنت كمان خليه عامل جريمة ولا قاتل
حد ولا سارق.

الموظف: يا استاذ حضرتك عارف إن علاء غلبان ومش
بتاع الحاجات دي، ولا ايه رأيك يا احمد؟

رد عليه احمد ردا صادما فقال: بصراحه المدير معاه
حق محدش مضمون الأيام دي والاحتياط واجب.

دار الروضة

المدير: احنا مش ها نقعد نعيد ونزيد في موضوع الواد دا.

الموظف وهو ينصرف يا خبر: اسود معقوله ال بيقوله احمد دا هيا الدنيا جرى فيها إيه الاخ بيبيع اخوه والصاحب بيتخلي عن صاحبه والكبير بيدوس على رقبة الصغير رحمتك يارب.

ذهب اسعد إلى المستشفى واتصل بالمرضة سألها عن الحالة ردت: هو حضرتك في المستشفى؟
اسعد: انا داخل على المستشفى.

قالت: تشرف وانا في انتظار حضرتك وممكن تيجي تشوفو.

اسعد: الحاله مستقره؟

المرضة: مستقره وتعالى وانا ها ادخل حضرتك ليه.
وصل اسعد للممرضة التي كانت في انتظاره سألها عن الحالة بعد أن سلم عليها فقالت: كله تمام والحاله مستقره الدكاترة قالوا إنها مفيش خوف عليها بالعكس.

قلب العاشق دلييله.....د/هاشم بكري

ذهب اسعد بيه والمرضة إلى علاء اطمأن عليه جلس
عنده بعض الوقت ثم انصرف كالعادة وقبل أن ينصرف قالت
له الممرضة: يا ريت حضرتك تبقى تعدي على الحسابات
عشان تعرف الحساب وتشوف باقي كام.

أسعد: ماشي ومد يده واعطاه بقشيش.

فقالت: يا افندم حضرتك خيرك مغرقنا كفايه.

اسعد: خدي ولا يهمك وخلي بالك منه.

انصرف اسعد وترك الممرضة التي كانت تعتني بعلاء
اعتناء مبالغاً فيه.

أما أم علاء وأخته وسماح وأبو سيد فتوقفوا عن البحث
عن علاء وبدءوا يستسلموا بالأمر الواقع عاد أبو سيد لدكانه
وسماح لم تنقطع هيا وأمها من الصباح عند أم علاء وسعاد في
الم رهيب كانت أم علاء تقول: عارفه يا ام سيد لو اعرف انه
مات كنت ارتاح وناري تبرد وكنت ازوروا في تربتو، الا انا
يا اختي مش عارفه اعمل إيه النار هتاكل جسمي لا أنا لاقيه
تربه ولا لاقية جته.

تقول ذلك وأم سيد تحاول أن تصبرها وتشد من أزرها
بقولها: وحدي الله يا اختي وادعيلو إن ربنا يرجعو بالسلامه.

دار الروضة

أم علاء: بادعي يا ام سيد ليل ونهار.

سماح تكاد لا تفارق سعاد ابدا وتشتكي إليها: انا مش عارفه يا سعاد الحظ معاندنا ليه والدنيا مستكتره علينا الفرح ليه؟ كل ما نيجي نفرح تتطلعنا حاجه تطفى فرحنا.

سعاد: امال انا اقول إيه ابويا مات وماشوفتوش وحالتنا بؤس واخويا سندنا بعد ربنا مش عارفينو حي ولا ميت.

وضعت سماح يدها على فم سعاد وقالت: بلاش ماتقوليش الكلمة دي تاني عشان خاطر علاء.

سعاد: يا رب يا سماح ربنا يرجعو بالسلامه ويكون حي.

سماح: يا رب يسمع منك يا سعاد.

سعاد: مفيش بردو حد قال حاجه ولا رد عليك ع الفيس بوك؟

سماح: مفيش غير التعليقات وخلص.

ذهب طارق وعمره وحسن الى أم علاء وقابلوا سعاد سألها طارق: بردو مفيش جديد يا سعاد.

سعاد: مفيش يا طارق.

قلب العاشق دلييله.....د/هاشم بكري

عمرو: احنا قلبنا عليه الدنيا ومش عارفين نصل لحاجه.

سعاد: ربنا يرجعو بالسلامه.

حسن: ادعيلو يا خالتي أم علاء انا والله حاسس انه انشاء
عائش وهاي رجع بإذن الله، أم علاء لاترد

قالت سعاد على الفور: ربنا يسمع منك يا حسن.

طارق:لو عزتو حاجه احنا موجددين. ومد طارق يده
بمبلغ من المال واعطاه لسعاد والتي حاولت رفضه بشتى
الطرق ولكنه أصر وقال لها: على فكره دا مش مني ولا من
حسن ولا من عمرو دي فلوس كانت لعلاء علينا
وبنرجعها،ربنا يرجعو بالسلامه.

وبينما هم عائدون قابلهم فاضل هز أكتافه وقال
بشماته:أهلا بالفدائنين يا ترى ليقتو المحروس اسم النبي
حارسو وصاينه.

هم حسن أن يرد عليه بيده ولكن عمرو أمسك به وقال:
ماتوسخش إيدك في واحد غلس زي دا على فكره علاء ها
يرجع وهايغيظك.

بدأ علاء يفيق في المستشفى ويسأل نفسه:انا فين هو إيه

دار الروضة

ال حصل مين ال جابني هنا؟

المرضة: إحمد ربنا دا أنت اتكتبلك عمر جديد؟

علاء:ليه إيه ال حصل.

المرضة: ما تتكلمش وما تعملش مجهود وانا ها اقولك على كل حاجه.

علاء: حاجه إيه وفين بامبو وفين هدى وفين أمي فين ام
علاء فين ام علاء.

المرضة: اصبر انا ها نديلك على الدكتور يا دكتور
يادكتور تعالى المريض فاق وعنده نوبه هيجان.

اقبل الطبيب مسرعا واحضر معه بعض المهدئات عندما
وصل إلى علاء وجده يبكي ودموعه تبل خدوده سأله الطبيب:
مالك؟

علاء: انا ال عاوز اعرف إيه ال حصل انا فين وانتو
مين وبامبو فين والناس بتاع الحاره فين وامي فين واختي فين
أنا ال عاوز أعرف أنا مالي.

الدكتور: اهدى خالص انا ها احكيلك يا عم أنت في

قلب العاشق دليله.....د/هاشم بكري

مستشفى.... كان حصلك حادثه شديده وجابك هنا الأستاذ اسعد
وزر عنالك قلب وحالتك بدأت في التحسن والاستقرار.

علاء: انا عاوز امي واختي انا عاوز اشوف امي.

أشار الدكتور إلى الممرضة بعد أن فشل في تهدئة علاء
وقال: ادبلو الحقنة دي وهايبقى كويس ولما يصحى ابقي قليلي.

اتصلت سماح على احمد وقالت له: ما تعرفش عملو إيه
مع علاء في الشغل بعد الانذار ال باعتوه؟

أحمد: صراحه ماعرفش حاجه عن الموضوع.

سماح: بصراحة أنت طلعت خسه قوي وماكنتش موقعة
منك كدا يا راجل دا علاء ماكنش بيسيبك في أي حاجه دا
ساعة موت امك كان بيبات عندك.

سعاد: بتكلمي مين؟

سماح: دا احمد.

سعاد: اقفلي في وش امه الزباله دا انتي بتكلميه ليه دا
طلع واطي وابن كلب.

سماح: شوفي الفرق بينه وبين طارق وعمرو وحسن
دول رجاله.

دار الروضة

سعاد: دا عامل زي فاضل.

أم علاء تجلس إلى جوارهم واضعه يدها على خدها ولا تتكلم ولا تعلق وبدا عليها الذهول والهدوء التام وعدم المبالاه.

سماح: ما تيجي يا بت نعمل بحث على انت على المستشفيات واقسام الشرطه. سعاد: والله فكره، انتي دخلتي على صفحتك اخر مرة اميته؟

سماح: الصبح.

سعاد: مفيش حد قال عنه حاجه؟

سماح: لا للأسف وعملتو هاشتاج يمكن.

سعاد: خلاص اكتبني على جوجل المستشفيات وابحثي يمكن مين يعلم.

أم علاء رفعت رأسها عن يدها وقالت: ما تروحو يا ولاد تسألوا عنه في الشغل يمكن حد من زميله يعرف عنه حاجه.

سماح: تصدقي فكره حلوه والله فعلا احنا هانروح بكره الشغل انا وسعاد وربنا يقدم ال فيه الخير.

ابو سيد: محدش يا ام سيد عرف حاجه برود عن الواد

علاء؟

أم سيد: لا يا اخويا.

أبو سيد: مش البت معاهم بردو؟

أم سيد: ما بتسبهمش الا على النوم.

فاق علاء من تأثير المنوم نادى الممرضة على الدكتور:
المريض فاق يا دكتور.

حضر الدكتور سأل علاء: إيه الأخبار؟

علاء: انا الحمد لله كويس بس فين امي واختي؟

الدكتور: أنت اسمك إيه؟

علاء: اسمي علاء محمد حسن ساكن في منشية ناصر.

الدكتور: كويس يا علاء؟

علاء: انا عاوز اعرف إيه ال حصلي انا مش فاهم
حاجه.

الدكتور: أنت يا سيدي حصلتلك حادثه والراجل ال عمل
الحادثه جابك هنا ودي مستشفى خصوصي وزر عنالك قلب.

علاء: بس انا اعرف إن دي عمليات بتتكلف كثير ومين

ال دفع الفلوس؟

الدكتور: باقلك ال راجل ال عمل معاك الحدثه، انت عارف
يا علاء عمليه زي تتكلف مبلغ يدخل في نص مليون جنيه؟
علاء: بتقول كام؟

الدكتور: باقولك نص مليون جنيه.

علاء: يا خرابي دانا ماعمر يش لحد ما اموت ها لم مبلغ
زي دا بس قلبي يا دكتور انا ها اقدر ارجع زي الاول اشتغل؟
وبينما هما يتجاذبان أطراف الحديث دخل اسعد بيه فقال
الدكتور على الفور: أدي يا سيدي اسعد بيه ال راجل ال عملك
الحدثه وفي نفس الوقت نقذك من الموت. اسعد بيه: حمد الله
على السلامه يا اقول يا مين؟

علاء بصعوبة وبدأ يبدو عليه الإجهاد: هو حضرتك
ماتعرفش اسمي وما تعرفنيش.

ومد الأستاذ اسعد يده ليسلم على علاء فأخذها علاء
وقبلها وقال: انا متشكر ليك قوي انت لا انت آيه حضرتك
نقذت حياتي.

قلب العاشق دليله.....د/هاشم بكري

اسعد: لا شكر على واجب انا غلطت لازم اتحمل نتيجه غلطى؟

علاء:فيه كثير غيرك بيغلط وبيتستر على غلطه او بيتمادى في غلطه.

أسعد: معاذ الله يا استاذ قلتلي اسمك إيه؟

علاء: علاء محمد حسن من منشية ناصر.

اسعد: أنت شغال إيه؟

علاء: انا موظف في شركه مقاولات كاتب حسابات.

اسعد: جميل.

علاء: انا هنا من اميته انا مش عارف تلقاهم بيغبيوني في الشركه ويا ترى أمي واختي عاملين إيه وعرفو ولا لأ؟

ضحك اسعد ضحكة طويله وقال: أنت مرتبك كام؟

علاء: ٩٠٠ جنيه.

اسعد: تسعمويت إيه؟

علاء: باقلك تسعمويت جنيه.

أسعد: على خيره الله طيب اعمل حسابك عشان تبقى

دار الروضة

تسددي فلوس العملية من مرتبك يا ابني دي فلوس.

علاء: الحمد لله بس ربنا يديمها دا انا على موصلتها
دفعت دمي قلبي ووسط الدنيا كلها.

الدكتور: كفايه كدا النهارده ونشوف حضرتك بكرة.

اسعد: طيب يا علاء انا ها اجيلك بكرة ما تخفش ع
التسميت جنيه.

علاء للدكتور: انا عاوز اكلم آمي دي تلقاها قلقانه عليا
قوي انا عارف دا انا لما بأخر في الشغل شويه ما بتاكلش الا
لما ارجع.

الدكتور: قلبي على الأرقام وانا اتصلك.

علاء: رقم أختي على الموبايل.

الدكتور: فين الموبايل؟

علاء: كان في جيبتي.

الدكتور: مكانش في جيبك أي حاجه وانت هنا بقالك
عشرين يوم تقريبا أنت لو حافظ أي رقم قلبي وانا اتصلك؟

قلب العاشق دلييله.....د/هاشم بكري

علاء: صراحه مش حافظ إلا رقم سماح وسعاد أختي
بس.

ذهبت سماح وسعاد إلى شركة المقاولات التي يعمل
علاء بها قابلهما احد الموظفين سألها: رايحه فين يا ابله؟
سماح: انا عاوزه أقابل أي مسئول هنا في الشركه.
الموظف: ليه؟

سماح: عاوزه اسأل عن واحد كان بيشتغل هنا ومجاش
من حوالي عشرين يوم.

الموظف: اوعه يا بنتي قصديك على الأستاذ علاء.

سماح: هو دا يا عمي انت تعرف عنه حاجه؟

الموظف: انتي مين؟

سعاد: انا اخته ودي خطيبته، ها يعمي أنت تعرفو؟

الموظف: طبعاً يا بنتي عز المعرفه دا احسن واحد في
الشركة بيجي اول واحد ويمشي آخر واحد والعيبه ما تطلعش
من بقه، بس يا بنتي دا الاستاذ احمد قال للمدير انه باين عمل
حدثه واهله مش لاقينو وخلا المدير باعتله انذار بالفصل.

سماح: أنت بتشتغل هنا من زمان؟

دار الروضة

الموظف: انا الساعي بتاع مكتب المدير.

سماح: بس أنت متأكد من الكلام ال بتقولو دا؟

الموظف: عيب عليك يا بنتي انا ها اكذب عليك يا ليه الا
انتو ماعرفتوش عنه حاجه؟

سعاد وهي تنتظر إلى سماح وسماح تهز رأسها وتقضم
على شفتيها: لا معرفناش.

الموظف: طيب يا بنتي لو عاوزين حاجه قلولي انا زي
والدكو والاستاذ علاء الله يرد غيبته ولا الله يرحمو لو كان.

قاطعته سعاد على الفور قائله: تف من بوقك يا عمي أنت
بتقول عليه إيه علاء عايش وها يرجع شغله.

الموظف: ربنا يرجعو بالف سلامه يا بنتي.

سماح: يالا يا سعاد شوفتي الكلب ابن الكلب دا عمل إيه
مع اخوكي.

سعاد: شايفه يا سماح مش هو احمد دا، تيجي نهزأو
شويه ونديلو كلمتين في العضم.

سماح: نهزأ مين يا بنتي هو دا بني آدم ولا عندو دم

قلب العاشق دلييله.....د/هاشم بكري

عشان يحس دا حيوان و اراهنك لو مكان شافنا وعمل انه مش شايئنا وانا ها اوريكي تعالى نعي من قدامه وبلاش ننادى عليه.

سعاد: مش ممكن يا سماح يعمل انه مش شايئنا؟

سماح: يلا نشوف.

بالفعل مرا من أمامه ونظر بعينه فلمحمها ولكنه أدار وجهه الجانب الأخر.

فقال له سماح: ما تداريش وشك إحنا مش عاوزين منك حاجة.

تجاهلها تماما وكأنه لم يسمع كلامها وانصرفنا وبينما هما عائدتان في الطريق وإذا بمحمول سعاد يسرق منها أثناء نزولها من السيارة عادت إلى البيت انتظرت سماح وسعاد أنت تسألها أم علاء عما فعلتا دخلا عليها وهي كعادتها واضعه يدها على خدها وترتدي ملابسها السوداء فكانت المفاجأة أنها لم تسألها عن أي شيء وكأنها لم تعرف أين كانت سعاد وسماح إما لأنها لم تكن في وعيها الكامل على الرغم من أنهما قبل أن يخرجوا أخبراها أنهما يذهبان إلى الشركة التي كان يعمل علاء بها أو لأنها يأسه من النتيجة وهذا الاحتمال الغالب

دار الروضة

أو لأنها رأت على وجوههما اليأس والفشل والضيق الشديد خاصة بعدما علمت سعاد بضياح محمولها.

سماح: دا كان يوم اسود النهارده يا بت سعاد الواد الزباله دا ابو وش ارشم ومحمولك ال ضاع.

سعاد: على رأيك إلا مفيش حد رد عليكى على الصفحه بخصوص علاء؟

سماح: لحد أمبارح مكانش فيه حد رد.

اتصل الدكتور برقم سعاد الذي املاه له علاء بصعوبة بالغة.

الدكتور: فيه جرس اهو الظاهر حد ها يرد.

علاء: خليك معاه.

الدكتور: للأسف محدش رد.

علاء: طيب رن تاني يمكن التليفون كان بعيد عنها ولا نايمه ولا عاملاه صامت يعني رن تاني يا دوكتر لو سمحت.

الدكتور: ولا يهملك تاني وتالت ورابع دي فتاتوره يعني أكثر من الف دقيقه في الشهر انا ما ابخلصش نصها.

قلب العاشق دلييله.....د/هاشم بكري

علاء: والنبي رن يا دكتور وبعدين نشوف موضوع الفاتوره.

الدكتور وهو ينظر بأسى: للأسف التليفون اتقفل اسمع وقرب المحمول من أذن علاء الذي سمع الرقم الذي اتصلت به ربما يكون مغلقا أو خارج نطاق الخدمة الرجاء الاتصال به في وقت لاحق.

تأفف علاء وقال: يا رب إيه ال حصل يا رب جيب العواقب سليمة.

الدكتور: أنت عارف موضوع الفاتوره دال يا علاء خلى الناس بتتكلم براحتها. علاء: دا عاوز الحبيبه وال خاطبين أنت عارف يا دكتور انا كنت باخلصه وانا خاطب كنت سواعي با اشحن تاني.

الدكتور: دا انتو كنتو عايشين قصة حب شديده شديده إيه يا دكتور دي كانت قصة عنيفه اتحدينا الدنيا كلها ابوها واخوها وامها وامي والدنيا كلها.

علاء: خد رقمها انا مش عارف انا ما عطتكش رقمها هيا من الأول ليه؟

الدكتور: عموما احنا فيها ملي ياعم، ملي يا قيس.

دار الروضة

علاء: تصور في الحته كانوا مسمينا قيس وليلي اكتب زيرو.....الدكتور فيه جرس.

سعاد: اسكتي يا أما مش التليفون بتاعي ضاع النهارده؟
ردت أمها باتسامه سخرية: ما ضاع ال أغلى من التليفون وإيه يا عني فيه حاجه ها ضيع اغلى من علاء، تنهدت وتابعت كلامها: بس انتي عارفه يابت يا سعاد على كل دا إلا إني حاسه انه عايش وانه ها يرجع.

سماح: يسمع من حنكك ربنا يا خاله والله وانا حاسه نفس الاحساس.

سعاد: اشمعنا انا وانا والله وحاسه انه قرب يرجع.
سعاد: شوفي يا سماح تليفونك بيرن يمكن فيه حد من طرف علاء.

ردت سماح على المحمول: آلو.
الدكتور: خد فيه واحده بترد الو.
علاء:معقوله يا ريم ما اسمعش صوتك الأيام دي كلها؟
سماح: علاء مش ممكن علاء علاء أنت فين أنت فين.

قلب العاشق دلييله.....د/هاشم بكري

سعاد تحاول جذب التليفون من يدها وهي تتحرك به
للأمام وتبعد يد سعاد وأم علاء تجلس مكانها ولا تعير
للموضوع أي اهتمام.

علاء: ايوه انا علاء انتي فين يا ريم؟

سماح: انا سماح يا علاء.

علاء: سماح مين انا طالب ريم السيد.

سماح: انا سماح يا علاء سماح سمااااااااا أنت فين
وعامل إيه.

علاء: انتي تقصدي مين مش أنت علاء محمد حسن؟

علاء: ايوه بس انتي مين انا مش عارفك؟

سماح: طيب بلاش أنت فين يا علاء.

علاء: بس انتي مين.

سماح: سماح.

علاء: سماح مين انا في المستشفى. والخط فصل.

علاء: دكتور الخط فصل الظاهر التليفون خلص شحن.

سماح: انا باستغرب هو علاء وقتلوا على الاسم وشكلوا

مش عارفني.

سعاد: تلاقيه حد بيعاكس يا سماح معقوله علاء ما
يعرفش صوتك؟

سماح: انتي ها توهيني عن صوت علاء هو والله العظيم
هو.

أم علاء: طيب يا بنتي مقلش هو فين؟
سماح: بيقول في المستشفى والخط قطع.

سعاد: اتصلي تاني يا سماح.

سماح: حاضر ها اتصل وفتحت السبيكر ليسمعو الصوت
وإذا بالتليفون مغلق.

بعد ساعة تقريبا كان الدكتور قد عاد إلى بيته لانهاء
نوبتيته، اتصلت سماح وفتحت السماعة: الو.

الدكتور: ايوه مين حضرتك؟

سماح: انا سماح علاء اتصل من الرقم دا.

الدكتور: تقصدي علاء ال محجوز في مستشفى الوفاء

قلب العاشق دليله.....د/هاشم بكري
التخصصي.

سماح: علاء ال اتصل من الرقم دا من حوالي ساعه.
الدكتور: ايوه هو علاء محمد حسن هو ال بيقول كدا احنا
ممعناش بينات عنه خالص..
سعاد: ممكن حضرتك تقلي إيه ال حصلو، معلش يا
افندم استحملني شويه.
الدكتور: في يوم من حوالي.

قاطعته سماح وقالت: من حوالي ٢٥ يوم.
الدكتور: تقريبا جالنا واحد شایل ال بتقول عليه علاء بين
الحيا والموت والقلب متهتك وقلناله دا محتاج نقل قلب
وزرعنالو قلب.

سماح: ومعرفتوش عنه حاجه؟
الدكتور: لا الجابو راجل اسمه اسعد بيه.
سماح: طيب ممكن تديني عنوان المستشفى عشان
أزوروه بكره؟
الدكتور: من عنيا العنوان.....

دار الروضة

انتهت المكالمة وسقط المحمول من يد سماح وفتحت فمها وهي غير مصدقة ما سمعت بل كانت في حالة اندهاش تام سألتها سعاد: فيه إيه.

وسألتها أم علاء: عرفتني مكانه يا بنتي؟

سعاد: سماح فيه إيه وإيه ال حصل.

سماح: فيه واحد احتمال كبير يكون علاء بكره ها أتأكد.

سعاد: فيه إيه يا سماح مالك.

سماح: مفيش انا مش عارفه حاجه.

أما علاء فكان في حاله توهان هو الآخر: انا إيه ال عملتو اتصلت برقم انا حافظه وعارف إنها ريم حبييتي والصوت غير الصوت والإحساس غير الإحساس انا حسيت إنها سماح ال ساكنه جنبنا في الحاره أمال فين ريم.

عادت سماح إلى بيتها وهي في حالة لاوعي تقريبا سألتها أمها: فيه إيه يا بنتي مالك مش بحالتك حصلت حاجه عرفتني حاجه عن علاء؟

سماح لا ترد ولا يزال تأثير المكالمه واضحا عليها.

أبو سيد: فيه إيه يا بنتي مالك كف الله الشر.

سماح: مفيش.

أبوها: انتي عرفتني مكان خطيبك؟

سماح: يعني يا بابا يمكن أعرف بكره.

أبوها: يعني إيه؟

سماح: يعني واحد اتصل وقال انه في مستشفى وعامل
عمله في القلب.

تمددت سماح على سريرها ولم تخلع ملابسها ولا تزال
شنطتها في كتفها وهي ممدده على ظهرها شاردة الذهن دخلت
عليها أمها وسألتها: إيه يا بنتي الحكاية يعني كدا داخله شكلك
متغير ومانتيش على بعضك؟

سماح: علاء يا أما كلمني وحاسه انه معرفنيش.

أمها: ما يمكن يابنتي مش هو.

سماح: مش هو إيه يا أما أنا ها توه عن صوت علاء
صحيح صوته تعبان شويه بس هو الصوت دا انا أميزه من
الدنيا كلها.

أمها: وقال إيه يا ابنتي؟

دار الروضة

سماح: عمال يقلّي يا ريم انتي عامله إيه يا ريم.
أمها: تلقاه يا بنتي بيخطرّف من العمليه الا هيا عمليه إيه
يا سماح؟
سماح: الدكتور قلّي عمليه في القلب نقلولو قلب يا أما.
أم علاء: أنت يا بت يا سعاد فهمتي حاجه من ال قالتو
سماح؟
سعاد: يا أما يعني علاء حي وها نروح نشوفو بكره.
أمها: المهم هو ها يعرفكو يا بنتي.
سعاد باندفاع: اكيد يا أما امال كلّمنا امبارح ازاي؟
أمها: وهو في المستشفى ليه يا بنتي؟
سعاد: كان عامل حدثه يا أما.
أمها: ربنا يقومو بالسلامه يا بنتي.
سعاد: يا رب يا ام علاء يا رب دا وحشني قوي وحشتني
يا لول نفسي الصبح يبجي دلوقت.
أمها: ماتستعجلّيش يا بنتي كل شيء بأوان.

قلب العاشق دلييله.....د/هاشم بكري

سعاد: مش اقول لشباب الحارة يا أما أديكى شايفه وقفتم.

أمها: طولي بالك لما تعرفو مكانه.

في اليوم التالي ذهب إليه الدكتور واخبره أن صاحبة الرقم اتصلت عليه وسألت عنه وهي سماح وانا اديتها عنوان المستشفى وهاتجيك النهارده.

دخل الأستاذ اسعد ومعه بوكيه ورد وهو في ابهى صورة وشياكة وتألّق فهو في منتصف الأربعينيات يتمتع بصحة جيدة وشباب متألق سأل بمجرد دخوله: أخبار بطلنا إيه يا دكتور؟

الدكتور: هو دا يا علاء ال راجل ال أنت مدين ليه بحاجتين.

علاء: تقصد يا دكتور مدين ليه بحياتي.

اسعد: بالعكس دا انا السبب في تعبته كله ورقدته دي؟

علاء: كله مقدر ومكتوب.

اسعد: الحمد لله يا دكتور الناس لبعضيها.

حضرت سعاد وسماح إلى الاستعلامات سألت سماح موظفة الاستعلامات: لو سمحتى علاء محمد حسن في عنبر كام؟

دار الروضة

الموظفة: قالوك قسم إيه؟

سماح: قسم القلب.

الموظفة: فين في القلب؟

سماح: زراعاه القلب.

الموظفة: ثواني أبحث لحضرتك على الاسم وأخذت
تبحث في ملف النزلاء في الكمبيوتر، ثم سألت سماح:
حضرتك متأكدة من الاسم؟

سماح: طبعاً.

الموظفة: انا اسفة يا انسه مفيش حد هنا بالاسم دا؟

سماح: مش معقول انا متأكده ضوري ثاني.

الموظفة: يا انسه انا بحثت اكتر من مره.

سعاد لسماح: انتي متأكده من العنوان والمستشفى؟

سماح: الا متأكده دا انا كتباه مش دي يا استاذة مستشفى
الوفا شارع.....

الموظفة: هيا يا افندم بس مين ال أدى لحضرتك العنوان

قلب العاشق دليله.....د/هاشم بكري

وقال لحضرتك إنه هنا.

سماح: ثوان انا اهتصل على الدكتور واعرف منه المكان
رن تليفون الدكتور وهو عند علاء ومعه الأستاذ اسعد الدكتور:
الآنسة بتاع امبارح يا روميو بيه.

علاء: رد عليها بسرعه يا دكتور.

الدكتور: الو.

سماح: ايوه دكتور انا في المستشفى ومفيش حد بالاسم دا
في الاستعلامات.

ضحك الدكتور قالت سماح بغضب: حضرتك بتضحك
ليه؟

الدكتور: لانه فعلا مفيش حد بالاسم دا في الاستعلامات.
سماح: لا بقى دا حضرتك بتهرج وعامل فيا مقلب،
وأغلقت التليفون.

سعاد: فيه إيه يا سماح؟

سماح: حضرتو بيقول ولم تكمل كلامها ورن التليفون.

سعاد: بيقول إيه؟

دار الروضة

سماح: دا هو طالب تاني اما شوفو بخفه دمه هو الثاني
عاوز إيه؟

سماح: ايوه يا خفيف شكرا على المقلب يا عم احنا رحنا
على العنوان وملقناش حد وكفاية ظورف وخفة دم.

الدكتور: اسمعيني لو سمحتي ولا اقلك خدي علاء معاكي
علاء ايوه يا سماح انا فعلا في المستشفى بس مش متسجل
باسمي لانني مكانش معايا بطاقة ولا أي حاجه تثبت شخصيتي
يعني لا بطاقة ولا كارنيه شغل.

سماح: أنت في الدور الكام؟

علاء: مش عارف معاكي الدكتور.

سعاد: ادهولي يا سماح.

سماح: دا الدكتور يا سعاد.

سعاد: ايوه يا دكتور.

الدكتور: اطلعي الدور الثالث حجره ٢٥.

سماح: ماشي يا دكتور.

قلب العاشق دلييله.....د/هاشم بكري

اخبرت سماح سعاد بما سمعت ولكن نار الفرح لم تعد
كما هيا واختلجت مشاعر عجيبة في قلب سماح أثناء صعودها
والتي فضلت الصعود على السلم عن الصعود في الأسانسير
حتى تتريث أكثر بعد مكالمه علاء لها بالأمس، وهذا على
العكس تماما من سعاد والتي كانت تريد الصعود بالاسانسير بل
تريد التحليق بجناحين حتى تنزل بهما في سرعه البرق على
سرير علاء.

وصلاتا إلى الحجرة ٢٥ نظرنا يمينا ويسارا حتى وقعت
أعينهما على علاء وهو يرقد في سريرة وعنده الاطباء
والمرضات تسمرت سماح في مكانها عند رؤيته أما سعاد فلم
تتمالك نفسها إلا وهي ملقاه في حضنه وتبكي قال الدكتور:
براحه يا جماعه إيه ال بتعملوه دا براحه براحه انا قلت سلام
باليد بس ايه يا آنسه.

اقتربت سماح خطوات ظنت أن علاء سيقوم من مكانه أو
يعتدل على الأقل إن لم يستطع القيام، أو يبدي أي اهتمام بها أو
محاولة الاعتدال والسلام عليها ولكن المفاجئة انه سلم عليها
ببرود وفتور غير مألوف بينهما وهو من كان عند رؤيتها كأن
الأرض ترتجف من تحت قدميه أو كأنه لمس ماسا كهربيا،
وفي هذه المرة سلام كأنه يعرفها معرفه عاديه أمسكت دموعها

دار الروضة

وحاولت أن تبعد عينها حتى لا يرى احد الحاضرين رققة الدموع فيها فهي تعلم جيدا أن الصب تقضحه عيونه.

كسرت سعاد جمود الصمت وقالت: حمدالله على سلامتكم يا لول دا أنت عيشتنا اسود ايام في حياتنا.

علاء: طمنيني على أمي امي عامله واهل الحارة والعيال السحت وطارق وعمره؟

سعاد: أمك تايهه زي مايكون صدمتها في غيابك عملتها حاجه في عقلها العيال دول طلعو رجاله وقالبين عليك الدنيا ومايعرفوش انك هنا لو عرفو كانوا جاو معنا لما يعرفوها ييجو كلهم.

سماح وهي تهز رأسها: ومين بقى يا علاء ال جابك المستشفى الكبيره دي باين عليها غاليه قوي ولا أنت كنت وارث من ورانا؟

سعاد قبل أن يجيب: حمدالله على سلامتكم يا حبيبي إيه ال حصلك كلمنا.

الدكتور: خفو عليه شويه يا جماعه.

قلب العاشق دلييله.....د/هاشم بكري

سماح: ومين الأستاذ دا انا حاسه إني شفت حضرتك قبل
كدا؟

علاء: هو دا الراجل إل انقذ حياتي يا سعاد.

اسعد: قلهم كمان وهو إل كان هايموتني.

علاء: يا استاذ اسعد أنت ابن حلال أي حد غيرك كان
ممکن يسييني مرمي على الأرض ويهرب.

سعاد: دعوات امك وطيبة قلبك هما ال نجوك، انا ها
اتصل بامي.

ضحكت سماح: امك هيا امك معاه تليفون ولا انتي يا
سعاد معاكي تليفون مش تليفونك اتسرق واحنا في الشغل
امبارح عند علاء.

علاء: احمد ماعرفش حاجه ومجاش معاكم ليه الواد دا
وحشني قوي وبينما علاء يقول ذلك وإذا بسماح تلوي شفيتها
متعجبة من كلام علاء عن أحمد وأفعال احمد معه، حاولت
سعاد أن تتكلم إشارة إليها سماح بالصمت.

قال اسعد: احنا طولنا عليك النهارده بس اهم حاجه إن
اسرتك عرفو مكانك واطمنو عليك انا هامشي ما تايجو انا

دار الروضة

اوصلكو معايا انا معايا العربية تحت.

سماح: متشكرين قوي احنا ها نركب متر وهانغير
حضرتك ساكن فين؟

اسعد: في مصر الجديده وانتم فين؟

سماح: احنا في منشية ناصر.

أسعد: ياستي تعالو انا ها اصلكو لحد البيت ماتحمليش هم
وما تخفيش ها اخذ الاجرة.

نظرت إلى علاء كأنها تأخذ رأيه وتستأذن منه فقال لهم:
اركبو معاه اركبو مع الاستاذ اسعد دا اخ اكبر، بدل بهدلة
المواصلات.

قام اسعد بتوصيلهم إلى السكن عادت كل من سعاد
وسماح بمشاعر مختلفة وتركوا لعلاء الحيرة والشتات والقلق
وعدم الرغبة في سماح، واخذ يسأل نفسه: مين سماح وايه
حكايتها سماح بتتكلم كلام واحد دايب حب وانا مش حاسس
نحيثها بأي ميول غير انها بنت الحته والجيره بس يا رب
دماغي ها تنفجر، دكتور ارجوك نورني رسيني انا مش

قلب العاشق دلييله.....د/هاشم بكري

عارف حاجه مش هيا دي حبيتي حبيتي اسمها ريم وانا مش
حاسس بأي ميول نحية سماح.

الدكتور: هو في الأول كدا.

نزلت سعاد وسماح من سيارة اسعد بيه وبمجرد دخول
سعاد الحارة قالت سماح: تعالى نقول لطارق وعمر و والشباب
اننا لقينا علاء ونديهم العنوان.

سعاد: وانتى بها طارق عمرو حسين لقينا علاء لقينا
علاء يار جاله.

عمرو: بجد الحمد لله.

طارق: لقتوه فين.

حسين: وهو عامل إيه.

فاضل ينظر إلى سماح والشرر يخرج من عينيه ولم
يتكلم قال طارق: مقلتش هو فين؟

عمرو: مش قلتك يا ابو الفضل صحك ها يرجع.

حسين: شكلك وحش قوي.

طارق: سيبوه ما تقلبوش عليه المواجه.

دار الروضة

تركهم فاضل وانصرف دون ان يتكلم بكلمة واحده.

سماح: في المستشفى كان عامل حادثه وخذو عنوان
المستشفى وابقى روحولو بكره.

تركت سعاد وجرت مسرعه حتى دخلت على أمها وهي
تقول: هو هو يا أما هو يا أما.

أم علاء: لقيتوه؟

سعاد بفرحه هستيريه: أيوه يا أما.

أم علاء: حي يا بنتي ولا ميت؟

سعاد: حي يا أما لقيناه عامل عميله في مستشفى كبير
قوية.

أم علاء: ومين ال هايدفع حساب المستشفى الكبيره دي
يا سعاد؟

سعاد: واحد بيه كبير قوي يا أما.

أم سيد: عاملتو إيه سماح ومالك يابنتي راجعه مهمومه
كدا ليه؟

سماح: مفيش يا أما.

أمها: مطلعش هو يا ابنتي؟

أخوها سيد: والله من يوم الواد علاء دا ماطلعلنا في
البخت واحنا حالنا اتقلب فيه إيه يابت لقيتو سبع البرومبا ال
وجعتو دماغنا بيه ما يعيش ولا يموت إيه ها يعود علينا من
وجع الدماغ دا؟

أم سيد: عيب يا سيد دا خطيب اختك .

دخلت سماح على غرفتها وأغلقت عليها الباب وانهمرت
في نوبة بكاء طرقت عليها أمها الباب مسحت دموعها وقالت:
ايوه يا أما عاوزه حاجه؟

أمها: افتحي يابنتي.

سماح: عاوزه إيه يا أما؟

أمها: افتحي يا سماح علوزاكي.

سماح: ثواني يا أما بغير هدومي.

أمها: طيب غيري يا بنتي براحتك وابقى افتحي.

فتحت سماح الباب سألتها أمها: مالك يابنتي هو علاء
تعبان ولا حاجه؟ فيه إيه؟ سماح: علاء عامل عمليه في القلب

يا أما.

أمها: عميله في إيه يا بنتي في القلب دا تبقى حالته صعبه
قوي وهو فايق وبيتكلم وبيعرف إل يروحلو؟

سماح: اطمني يا أما هو كويس.

أبو سيد: يا ام سيد انتي يا ام سيد.

سيد: تعالى يا حج وبارك لبنتك لقت حبيب القلب بس
الظاهر عليه ما عدش ينفع ولا مين عارف باين عليه دلقتها.

أبو سيد: ما تتكلم كويس ياد أنت، يا بت يا سماح لقتوه يا
ابنتي؟

سماح من غير نفس: ايوه يا آبا لقيناها.

أبوها: في المستشفى بردو ال كنتي بتقولي عليها؟

سماح: ايوه يا آبا مستشفى غاليه قوي.

أبوها: عندو إيه يا بنتي ومين ال دخلو المستشفى الغالية
دي؟

سماح: الراجل ال عمل معاه الحادته.

أبوها: ودي حادثة إيه؟

سماح: حادثه في القلب.

أبوها: يا حفيظ يا رب.

سماح: اطمئن يا آبا هو كويس.

أبوها: ومين يابنتي ال دفع فلوس العمليه دا اكيد اتكلفت مبلغ وقدره؟

سماح: فعلا يا آبا مبلغ كبير قوي.

أبوها: وجاب فلوسها منين يا بنتي؟

سماح: الراجل إل داسه يا آبا مليونير هو إل دفع الفلوس كلها وبيزورو كل يوم وكان عنده النهارده وهو إل وصلنا واحنا راجعين.

أبو سيد: ربنا يقومو بالسلامه يا بنتي وانتي قومي يا ام سيد هاتيلي انا اتعشى.

أم سيد: روح وانا جايه وراك.

خرج أبو سيد وسألتها أمها: مالك يا بت فيه إيه يا بت وإيه ال حصل يا عني مانتيش على بعضك؟

دار الروضة

سماح: علاء يا أما مش علاء علاء زى ما يكون مش عارفني خالص معاملته وحشه انا اتصدمت النهارده صدمه كبيره اكلمو مش معايا ومش عاوز يرد.

أمها: يمكن يا بنتي تعبان من العمليه انتي بتقولي دي عمليه كبيره قوي.

أما سعاد فكانت على العكس تماما من سماح سعيدة ومسرورة بل منبهرة مما رأت في المستشفى ومن العثور على علاء ومن تعامل علاء معها قالت لامها: انتي عارفه يا أما الراجل ال عمل الحادثه مع علاء هو ال وصلنا بعربيتو يا خرابي يا أما تركبي فيها تحسي انك طايره وفيها تكيف.

أمها: تكيف إيه؟

سعاد: تكيف زي المروحه كدا يا أما بيحيب هو بارد قوي والنعمه الشريفة الواحد ما كان عاوز ينزل منها يا رب ارزقني بواحد يكون عنده عربيه.

أمها: اطمني يا سعاد الفقري فقري وانتي فقريه بنت فقريه.

قلب العاشق دلييله.....د/هاشم بكري

سعاد: وليه كدا يا أما طيب اجبري خاطري بكلمه حلوه.

أمها: ربنا يجبر خاطرنا كلنا.

سعاد: جهزي نفسك عشان تروحيلو معانا بكره.

أمها: روعي لبيت عمك ابو سيد خليه يأجرنا التكتوك
عشان نروح بيه أنا مافيش حيل لبهدلة المواصلات.

سعاد: تكتوك إيه إيه ام علاء؟

أمها: آمال ها نروح أراي يا بنت الفالحه اياكش تكوني
حاطه في دماغك اننا هناخد تاكسي.

سعاد: تاكسي إيه ياست الكل تاكسي إيه يا نعاناه يا منعنه
تصدقي إن سيدي كان عنده حق لما سماك نعاناه، إحنا ها
نروح في عربية الاستاذ اسعد العربية ال قلتلك عليها.

أمها: الراجل دا ها يعرف يجيلنا هنا؟

سعاد: اطمني هو قال انه هاييجي ياخدنا من هنا.

أمها: طيب وببيت عمك ابو سيد هاينفعو ييجو معانا؟

سعاد: ايوه يا أما الراجل عربيتو كبيره وواسعه قوي.

أمها: ابقى عرفيهم.

دار الروضة

سعاد: ماهي سماح هاتقلهم يا أما هيا كانت معايا.

أمها: طيب روحي ان كان كدا اشتري كيلو لحمه راس
وتعالى اعمليه عشان ناخدو لاخوكي معانا.

ضحكت سعاد بصوت عالي وقالت: لحمه إيه يا منعن
والنبي قليها تاني.

أم علاء: جرى إيه يا بنت المهفوفه انتي جرى لعقلك
حاجه ولا إيه ولا انا قلت حاجه تضحك مال فشت أمك عايمة
كدا ليه.

سعاد: كلامك حلو اوي يا أما وانا فرحانه قوي انتي
عارفه يا أما الأكل ال بيجي لعلاء يكفي بيت واصناف
منعرفش ناكلها تقوليلي لحمه راس.

أما طارق فقال لعمره ولحسن: احنا عاوزين نروح لعلاء
بكره.

عمره: ماتيجو نقول لفاضل يمكن بيجي معانا.

حسن: ماتتعبش نفسك انت ما شوقتش وشه كان عامل إيه
لما سعاد وسماح قالولنا على مكان علاء دا واد خورنج.

قلب العاشق دلييله.....د/هاشم بكري

طارق: احنا بكره ها ناخذ توكتوك وتكتك ونرحله على
العنوان آمين يا رجاله.

الشاب: آمين.

أبو سيد: يا أم سيد يا وليه قللتك تعالى جيبيلي انا اتعشى
انتي موتي عندك ولا إيه؟

سيد: مامانتش ولا حاجه دي بتطمن على عريس الغفله.

أبو سيد: وفر ياد انتي كلامك ال دلع دا.

سيد وهو يضحك: احطلو شويه ملح.

أبو سيد: يا أم سيد هاتي سماح معاكي وشوف إن كنتو
هاتجيبو حاجه ناخدها معانا بكره لعلاء.

سيد: روعي جيبيلو كيلو لحمه هاتروحو بإديكو فاضيه.

أبو سيد: أنت مش هاتروح معانا ولا إيه يا سيد؟

سيد: إنساني انا في الانتظار انا عامل ويتتج يا ابو سيد.

أم سيد: سيبو ابنك باين عليه مخه هرش.

سماح بانكسار: مش هناخد حاجه معانا.

أمها:ليه يا بنتي؟

دار الروضة

سماح: لأن المستشفى ما بدخلش الحجات دي وبتديهم وجبات احنا مانعرفش ناكلها ولانعرف اسمها.

سيد: سمعتو وفرو بقى على نفسكو التعب والمصاريف.

أبو سيد: مش نروح يا بنتي نبيت على توكتوك الواد على انتي طبعا عرفتي العنوان؟

سماح: بسخريه توكوك إيه إيه ابو سيد الراجل ال عمل معاه الحادته هاييجي ياخدنا بكره ع الساعة عشرة كدا.

سيد: طبعا فيه ناس هنا مش هاتنام الليلة.

أبوه: ما تخلي عندك دم ياد أنت يا قليل الزوق وتلم نفسك شويه.

سيد: والنبي يا ام سيد معايا نلمني لحسن اتبعترت.

وفي الساعة التاسعة صباحا تجمعت الأسرتان على ناصية الشارع وصل الأستاذ اسعد في حدود الساعة العاشرة سلم عليهم عرفتهم به سماح وسعاد أم علاء قالت بهدونها المعتاد الذي حل عليها بعد غياب علاء والذي هو أقرب للامبالاة منه للهدوء: يا استاذ اسعد، ربنا يكرمك يا ابني البنات

قلب العاشق دليله.....د/هاشم بكري

بیشکرو فیک قوي.

اسعد: لا شكر على واجب يا ام علاء ربنا يقومو
بالسلامه اكيد يا سماح دا والدك؟

أبو سيد: الله عليك يا بيه الظاهر عليك نبيه والنباهه باينه
عليك وبننتظ من عنيك بسم الله ماشاء الله.

اسعد: ودي اكيد الحجة والدتك يا يا سماح؟

سماح: هيا يا استاذ اسعد.

أسعد: اتفضلو اركبوا اتفضلوا.

ركب إلى جواره أبو سيد وفي الطريق تجاذبوا أطراف
الحديث وقال اسعد: احسن حاجه انكو ماجبتوش حاجه معاكو
انا كنت خايف تجيبو حاجه على الرغم من اني نبهت على
سماح وسعاد امبارح.

أبو سيد: احنا قطعنا اللحمه وجهزنا بس سماح مرضيتش
تخلينا نجيب حاجه قالت المستشفى ما بدخلش حاجه، وكمان
قالت الخير هناك كثير مع اني جهزت الحاجه اصلك ماتعرفش
غلاوة علاء عندنا قد إيه وعند اهل الحارة كلهم.

اندمج أبو سيد في الحديث وسماح تكظم غيظها مخافة أن

دار الروضة

يتضايق أسعد كما أنها حريصة على أن يتوقف والدها عن الحديث بلهجته السوقية التي يتحدث بها.

وصلوا إلى المستشفى قالت أم علاء: وأنا يابنتي ها اقدر اطلع على السلم؟

قالت سعاد: سلم إيه يا أما ها تركبي الاسانسير في ثانيه تلاقيكي عند علاء.

ركبوا الاسانسير وصلوا إلى غرفه علاء قال لهم اسعد قبل أن يدخلوا على علاء: يا جماعه بلاش الاحضان وبلاش الدموع سلموا بس من بعيد لبعيد.

قالت أم علاء: ومين يجيلو قلب يا ابني يسلم من بعيد ليعيد دانا عاوز احضنه واقعد اعيط.

اسعد: بشويش بس يا حجه.

أم علاء: حمدالله على سلامتكم يا نور عنين امك حمدالله على سلامتكم يا ابن الجزمه كنت هتموت امك بالحيا.

علاء: مالك يا أما خاسه كده ليه وعنيكي مالها؟

سعاد: يعني مانتتش عارف يا بيه من إيه من العياط عليك

قلب العاشق دليله.....د/هاشم بكري

أنت إل علمت فينا كدا. أبو سيد: حمدالله على سلامتك يا نواره
الحاره يا غالي يا ابن الغاليين والله يا ابني كل الحاره كانت
بتعيط عليك زي ما تكون أخت نور الحارة ومشيت.

اسعد: دا عشان الكهرا بتقطع كثير.

ضحك أبو سيد بملء فيه وقالت أم سيد: ألف سلامه عليك
يا ابني.

علاء الله: يسلمك يا خاله وسيد عامل إيه؟

تدخل أبو سيد: والله يا ابني كان إلا ييجي معانا ويحلف
ويقطع وانا ال مرضتش قتللو خليك يا ابني جنب البيوت
والدكان محدش ضامن حد يسرقهم ولا حاجه.

أم علاء: كدا يا علاء تعمل فينا كدا يا ابني أنت عاوز
تموت أمك بالحيا يا ضنايا.

الدكتور: لو سمحتو يا جماعه وسعو شويه عشان ميعاد
العلاج ويا ريت تخفو عليه شويه.

أبو سيد: نخف إيه يا بيه دا علاء حبيب الكل.

وبينما هم جلوس بجوار علاء دخل الشباب عمرو بانجو
وطارق البرنس وحسن صرصار قالوا فيصوت واحد:حمدالله

دار الروضة

على سلامتك يا عريس.

قال علاء بمشاعر متناقضة فرح بأصدقائه وقلق من كلمة عريس: الله يسلمكو يا شباب وتاعبين نفسكو ليه.

الدكتور: بهدوء لو سمحتو.

أسعد: الا قلّي يا دكتور علاء يقدر يخرج اميته؟

الدكتور: شويه كده وبعد ما يخرج ها يتابع لمدّه كام شهر كدا ويمارس حياته عادي خالص.

خرج الدكتور اخرج اسعد من جيبه محمولا جديدا به الخط واعطاه لعلاء وقال: خد عشان تعرف تتصل بحبايبك.

نظرت إليه سماح في أسي وقالت: علاء حبايبه كتار يا استاذ اسعد.

قال أبوها: فعلا كلنا بنحبو.

انتهت الزيارة وخرج الجميع وعادوا إلى منازلهم ولاحظو جميعا الجفاف في معاملته علاء لسماح وهو الذي كان لا يستطيع أن يغفل عنها ولو لحظه وكل أدلى بدلوه قالت: أمه يا بت يا سعاد اخوكي كويس وحلو قوي بس مش واخذ باله مع

سماح خالص هم زعلانين مع بعض ولا حاجه؟

سعاد: ابدا يا أما بس يمكن عشان اننا واقفين.

أم سيد: انتى ماختش بالك من حاجه يا ابو سيد؟

أبو سيد: حاجه إيه؟ تقصدي المستشفى ولا علاء علاء
كوبس قوي والمستشفى نضيفه نضافه مشفتش زيه في حياتي.

لوت ام سيد شفتيها وقالت: هو دا كل ال أنت خدت بالك
منه؟

أبو سيد: يعني انا مخي دفتر يا وليه.

وفي أحد الايام بعد استقرار الحالة ذهب اسعد إلى
المستشفى ودخل الحسابات ودفع باقي الحساب وتم خروج
علاء من المستشفى مع اعطائه بعض التعليمات وجدول
بالمتابعة ولكن بعد تغيير قلب علاء الذي كان يدوب وجدا
وشوقا وهياما بحب سماح، فهل تبقى مشاعره ناحية سماح
على وجه الخصوص كما هيا أم يطرأ عليها التغير؟ هذا ما
نقرأه في الفصل القادم فإلى صفحاته.

دار الروضة

الفصل الثاني

حياة جديدة

دار الروضة

خرج علاء من المستشفى في سيارة الدكتور اسعد وذلك بعد اتمام إجراءات الخروج وتعليمات الأطباء التي يسير عليها وصل علاء مع الدكتور اسعد إلى الحارة اجتمع أهل الحارة عليه الكل يريد أن يراه وينظر إليه وحب الاستطلاع والفضول ومعرفة ماذا حدث له، واحتفالية نظمها له شباب الحارة واستقبلوه بالطبل والزمر والرقص.

جلس علاء على سريريه المتواضع جدا وانصرف الأستاذ اسعد بعد أن ترك له رقمه للتواصل والزيارة وقال علاء لأخته: يعني محدش شاف احمد زي الشباب، أكيد فيه حاجه شديده هي ال منعته يا خبر الواد واحشني قوي ونفسي اشوفه الا بالحق يا سعاد هو ما عرفش ال حصلي ولا إيه؟

سعاد: اكيد ما يعرفش واكيد اول ما يعرف ها يبجي طيب ما تتصلي بيه سعاد وهو انا اعرفلو ارقام وبعدين تلفوني أصلا اتسرق، اقعد يا عمي ابو سيد أنت مستعجل ليه؟

أبو سيد: لا ابداء مفيش استعجال ولا حاجه اسيبك ترتاح شويه.

حضر بعض اهالي الحاره يحملون صناديق المياه الغازية احتفالاً بعوده علاء وهي عادة طبيعيه يقوم بها الجميع

دار الروضة

وعادت سماح وهموم الدنيا على رأسها بسبب معاملة علاء لها والتي لاحظتها أمها بشده وقالت: لابنتها يا بنتي هو حد لف على علاء ولا إيه دا تحسي انه واحد غيره دي الحارة كلها كانت بتحسدكو على بعض وبتحسدك على الحب ال بيجبوهك دا مكانش بيتحمل البعد عنك ساعه ييجيلك يا يتصل بيكي إيه ال حصل يا بنتي انتي زعلتیه في حاجه؟

سماح: ماهو دا ال هيموتني يا أما اني مزعلتوش في ايتها حاجه ومش عارفه إيه ال حصلو.

أمها: يمكن يابنتي عشان عمليتو ثقيله شويه مش قادر يركز.

سماح وهي تهز اكتفاهها: يمكن يا أما.

سعاد وهي بجوار علاء: انا ملاحظه حاجه غريبه قوي يا علاء والكل ملاحظها. علاء: إيه هيا بقى انشاء يا ام العريف انتي يتقرأي الكف ولا إيه؟

سعاد: انا باتكلم بجد يا علاء كلنا ملاحظين انك مش مهتم بسماح ومنفض لها دا احنا كلنا ملاحظين وانا بالأخص كنت خايفه انك متسلمش عليا وتنشغل عني يسماح لقيت العكس.

قلب العاشق دلييله.....د/هاشم بكري

علاء: بصراحه يا بت يا سعاد انا مش حاسس نحييتها بأي حاجه وحاسس إنها واحده عاديه.

سعاد: عاديه إيه دي عادت الحاره كلها عشانك وفضلتك ع الكل.

علاء: انا حاسس إن ال بحبها ضاعت مني ولازم ادور عليها، صراحه انا مش عارف لنفسى حاجه عموما يمكن عشان العمليه صراحه انا مش عارف إيه ال حصلي.

اسعد بيه في شركة الأدوية التي يمتلكها ويدير فرعها الرئيسي بنفسه مع مدير الفرع الكبير الدكتور فؤاد زميل الدكتور أسعد.

الدكتور فؤاد: يا دكتور إحنا عاوزين نعمل جرد للمخازن ونعمل مراجعه للميزانية.

اسعد: دكتور فؤاد انا متكول على الله وبعدين عليك أنت فاهم الشركه ومأسسها معايا طوبه طوبه ال تشوفو صح اعملو أنت معاك كل الصلاحيات.

الدكتور فؤاد: فيه مذكره اننا ها نزود الدكتور أشرف وها ياخذ مكافأة والدكتور رمزي عنده جزا الشهر.

دار الروضة

وقع اسعد على المذكرات وقال: انا ها اسيبك يا دكتور فؤاد واروح اشوف علاء.

حاول الدكتور رمزي ان يدخل ليقابل الدكتور اسعد ولكن منعه السكرتارية بأوامر من الدكتور فؤاد مدير عام الشركة.

قابل رمزي الدكتور فؤاد بعد انصراف اسعد وقال: انا علوز اعرف يا دكتور حضرتك خليت الأمن منعني اني اقابل الدكتور اسعد ليه؟

الدكتور فؤاد: ومين ال قال يا دكتور رمزي اني انا ال خليت الأمن منعك؟

دكتور رمزي: ومين غير حضرتك هنا ال يقدر يقول للامن امنع مين ودخل مين؟

نظر إليه الدكتور فؤاد بتركيز وقال: صاحب الشركة.

رمزي: ومين ال عرف صاحب الشركة اني علوز اقبله.

دكتور فؤاد: هو ما يعرفش اصلا انك علوز تقبله.

رمزي: آمال ازاي يا دكتور ها يطلب من الامن اني مقابلوش؟

قلب العاشق دلييله.....د/هاشم بكري

دكتور فؤاد: ببساطه يا دكتور هو قال للامن ماتخلوش
حد يدخل عليا لاني مستعجل ورايح مشوار مهم.

الدكتور رمزي وهو يهز رأسه ويمد شفثيه: يمكن كل
شيئ هنا جايئ.

الدكتور فؤاد: مش يمكن يا دكتور دا اكيد.

رمزي: ماشي سلام يا دكتور.

علاء: قوليلي يا سعاد احمد مش كان بيحي يزوركو
ويطمن عليكو وعزم عليكو بفلوس الواد دا على فكره اكيد
عنده مشكله اكيد.

سعاد: علاء انا عاوزاك تسبيك من الواد الواطي ابن
الجزمة دا وتشوف موضوع سماح هيا الوحيدة الا تستاهل انك
تسأل عليها.

أم علاء: خليك مع سماح يا ابني البت دي اصيله ومن
جلدنا وتعرف الاصول زي ابوها.

سعاد: اسمع كلام نعاغه تكسب وتربح.

وصل الدكتور اسعد إلى الحارة لم يستطع الوصول إلى
بيت علاء هذه المرة اتصل على علاء: الو إيه يا ابني انتو

نقلتو بيتكو ولا إيه؟

علاء: لا يا باشا منقلنا هوش ولا حاجة هو مكانه.

أسعد: آمال يا بني انا مش عارف اصل ليه؟

علاء: حضرتك فين؟

أسعد: انا في حته اسمها اسمها مفيش اسماء شوارع هنا.

علاء: طيب اتصل بسماح وهيا تيجي تاخذك هيا ال
مخربشه وهاتعرف تجيبك.

أسعد: خلاص اقل وانا ها اتصل بسماح انا معايا رقمها.

أخذ أسعد يرن على سماح وهي بعيدة عن التليفون،
سمعت أمها رنه التليفون فقالت لها: التليفون بيرن يا سماح.

سماح: ايوه سماعها يا أما بس انا في الحمام سيبه لما
اطلع ها ارد.

وقف الدكتور أسعد يلف حول نفسه ولا يعرف كيف
يصل، اتصل مره أخرى بعلاء: ايوه يا باشا.

أسعد: انا بارن على سماح محدش بيرد.

قلب العاشق دليله.....د/هاشم بكري

علاء: تلقاها عاملاه صامت، انا ها اتصل عليها.

اتصلت سعاد بسماح ردت عليها سعاد: الدكتور اسعد
اتصل عليكي عشان تروحي تجيبه.

سماح: انا كنت في الحمام وها اتصل عليه حالا.

اتصلت سماح على اسعد: سماح الحقيني انا مش عارف
انا فين ولا عارف آجي ازي ومحدث ها يخلصني من المشكلة
دي غيرك.

سماح: حضرتك فين؟

أسعد: انا مش عارف بس انا واقف عند الشارع ال
نزلتكو عندو.

سماح: بسيطه ثلاث دقائق واكون عندك وها تضحك لما
اوصلك.

وصلت إليه سماح: حمدالله ع السلامه يا باشا دانت
طلعت لخمه قوي إيه ال حصل مالك؟

أسعد: كنت رايح لعلاء ومش عارف اصل استنجدت
بيكي بقي.

سماح: يعني أنت سايح وانا ها اشتغل مرشده.

دار الروضة

أسعد: ترجميلي طول ما انا ماشي.

سماح: وانا موافقه بس انا با اخذ بالدولار.

أسعد: وانا موافق.

وبينما هما في الطريق وكلما مروا على بئعه الفجل أو
الجرجير أو بئعه المناديل تقول له: ودي خالتك أم هدى أما دا
عمك عليهو بتاع الفول تاكل طبق فول من عنده ماتجعش لمد
اسبوع.

وصلت سماح واسعد إلى بيت علاء المتواضع جدا
وبمجرد دخولهم قالت سماح: ازيك يا خاتي أم علاء.

أم علاء: سلم حسك يا بنتي واحرسك من العين مين ال
معاكي؟

سماح: دا الدكتور اسعد يا خاله.

أم علاء: أدخلي يا بنتي يابتي يا سعاد قابلي الناس يا
مرحبا اتفضل يا بيه.

قام علاء وتمشى وذهب ليقابل اسعد بيه ويرحب به
بنفسه: اتفضل يا باشا معلش البيت مش قد المقام.

قلب العاشق دلييله.....د/هاشم بكري

أسعد: بالعكس دا رائع تخيلو اني اول مرة في حياتي
ادخل حاره شعبيه.

سيد بتريقه: الدكتور ه فين يا ام سيد؟

أم سيد: بستأل ليه يا فالح؟

سيد: ابدا باشوفها عند البرنس ولا إيه؟

أم سيد: يا ابني خف على اختك شويه مش هاتبقى أنت
والزمن عليها.

سيد: ماشي يا ام الست ماشي يا ام الهانم سمع هس.

علاء: روعي يا سعاد هاتي حاجه سقعه للبيه.

أم علاء: دا إحنا زارنا النبي يا الف مرحب.

علاء: بصراحه انا مش عارف اعبر عن فرحتي انا
اسعد واحد داسته عربيه يا ريتك دستني من زمان.

علاء مسترسل في التعبير عن سعادته بقدم الدكتور
اسعد وسماح تنظر في ضيق وهو كعادته يتجاهل سماح تحاول
سعاد ان تكسر الحاجز فتقترب من سماح وتحاول بشتى
الطرق أن تفرج عنها فتقول مره: منور يا موز ملعلط يا
جميل، وتمسك بيدها مره.

دار الروضة

علاء: دكتور اسعد انا عاوز اطلب من حضرتك طلب
ويا ريت ماتكسفنيش؟

أسعد: يا خير دا انت تؤمر يا علاء بيه.

علاء: انا طمعان قاطعه أسعد قائلًا: اطلب طمعان في إيه
علاء؟

علاء: ان حضرتك تاكل معانا لقمه.

اسعد: وانا موافق بشرط ناكل فول من عند ال قالتيلي
عليه سماح واحنا جايين، ماشي ناكل فول عشان ماجعش لمدى
اسبوع.

رن التليفون الدكتور فؤاد يتصل بالدكتور اسعد ويتحدث
معه في الشغل قال الدكتور اسعد: انا في مكان الشبكة فيه
ضعيفه لما اخرج ها ابقى اكلمك.

انتهى الأكل وخرج الدكتور اسعد وقام بتوصيله علاء
وسماح وسعاد، وبينما هو في الطريق لم تنقطع سلامات أهل
الحارة عليه ودعوات النساء البائعات له بالشفاء وإن ربنا
يتململه بخير.

قلب العاشق دلييله.....د/هاشم بكري

لاحظت سماح أن الدبلة لا توجد في يد علاء كظمت
غیظها وهي تنتظر في ضيق ولم تعلق، وصلوا إلى سيارة
الدكتور اسعد وهو يودعهم قائلاً: انا قضيت النهارده احسن يوم
في حياتي عشت لحظات ومغامرات ماكنتش احلم بيها انا
باشكرك يا علاء وطبعاً مانساش اشكر عاروستنا الاموره
نواره الحاره الانسه سماح وكمان سعاد انا مش قد زعلها.

علاء وسماح وسعاد في نفس واحد: انا ال بشكرك
وصراحه حضرتك نورتنا.

أسعد: سلام وعلى وعد بزيارت كثيره.

عاد علاء وسماح وسعاد معا لم يتكلم اي منهم بكلمه
واحد اللهم إلا تصارع الأفكار في رأس كل منهما علاء تدور
الأفكار في رأسه وتتنازع: مش هيا دي ابدأ ال انا حبيتها ولا
هيا دي ال انا بادور عليها مش ممكن انا حاسس اني ماشي
جنب واحد صحبي او جنب اختي سعاد بس.

سماح تكاد دماغها تنفجر: يا رب هو دا علاء ال انا
حبيته وكان عندي استعداد اخسر الدنيا كلها عشانه ولا حد
تاني انا حاسه اني ماشيه جانب واحد في المواصلات اول مره
اشوفو واول مره يشوفني معقوله دا علاء ال انا حبيتيو دا واحد

دار الروضة

تاني خالص.

علاء: يا رب الاقي حبييتي ال بادور عليها انا حاسس انا
بادور على حد معين عمال ابص في كل البنات ال باشوفها يا
رب عترني فيها.

مروا وهم في طريق عودتهم على القهوة التي يجتمع
عليها احيانا علاء وطارق وعمرو وحسن وفاضل، حياهم
طارق بمجرد رؤيتهم بقوله: الله عليك يا برنس نورت الحارة
وكدت الاعادي.

عمرو: واله الحارة كانت مضلمه.

أما حسن فقال: صاحبك (ويقصد فاضل) كان قاعد معنا
ولما شفاك طلع ع الاول عشان ما يغرزش.

علاء: بصعوبة تسلمو تسلمو يا شباب يا نواره الحارة
ياولاد البلد يا اصله.

وصلوا إلى البيت قالت سماح باقتضاب: أنت عاوز
حاجه؟

علاء: تعالى اقعدي شويه.

قلب العاشق دلييله.....د/هاشم بكري

سماح: ما إحنا قاعدين من بدري كفايه كدا انا هاروح
تلاقي الجماعه قلقالين عليا.

علاء: قلقانين إيه يابنتي دا تقريبا البيت في البيت.

سماح: انا مروحه سلام.

علاء: مع ألف سلامه.

عاد كل منهما إلى بيته والأفكار تكاد تفتك بعقله سأل
علاء أخته: احمد ما بيجيشي ليه يا سعاد إحنا علوزين نروح
بكره الشغل نشوف الدنيا راحت فين وجات منين وبالمرة
اطمن على الواد احمد.

سعاد لا تريد ان تصدمه قالت: خليها بظروفها واستنى
شويه لحد ما تقدر تقف على رجلك علاء لازم اروح عشان
الشغل.

أمه: يا ابني شغل إيه المهم أنت والشغل يتحرق وبعدين
لما تيجو تروحو الشركه خدو معاكو سماح يا ابني سماح بت
واعيه وعارفه كل حاجه.

علاء: يا أدي سماح انتو كرهتوني فيها كل حاجه سماح
سماح.

دار الروضة

أمه: يا ابني انتو مكتوب كتابكو وكنت ها تجوزو خلاص
لولا الحادثه دي.

عادت سماح الى البيت جذبها سيد من ذراعها بعنف
وقال: شوفي بقى يا بنت الناس لو ابوكي وامك بيطر مخو على
عمايك وماشيك على حل شعرك انا ماينفعش اعيش قرني.

أمه: قرني إيه يا ابني اختك مكتوب كتابها والحاره كلاتها
عارفه كدا ولولا الحادثه بتاع علاء كان زمانهم متجوزين.

سماح: احترم نفسك يا قليل الادب.

سيد: انا ها اعرفك مين ال قليل الادب انا ولا الهانم ال
سيرتها في الحاره على كل لسان.

سماح: والنبي سكتيه يا أما أنا اعصابي مش متحملة
حاجه.

سيد: ليه هو حبيب القلب معادش ينفع بعد العمليه تاني
ولا إيه.

أمه: أنت قليل الادب.

سيد: وحياة امي ولا بلاش امي عشان أمي بتعرس مع

قلب العاشق دلييله.....د/هاشم بكري

بننتها ابقى مره لو ما فشكنت الجوازه دي وهاتشوفي انتي
وامك.

أما اسعد فقد اتصل بعد أن ركب السيارة بالدكتور فؤاد
وقال: ايوه يا دكتور فؤاد كنت عاوز إيه.

الدكتور فؤاد: انا عاوز نعمل مجلس تأديب للدكتور
رمزي الولد دا زودها عن الحد وعاملنا مشاكل كتير وعاوز
يدخل مناخيريه في كل حاجه.

اسعد: مش دا ال اديتو جزا المره ال فاتت؟

الدكتور فؤاد: اديتو وبردو مفيش فيه فايده اقتحم عليا
مكتبي وببيهددني.

أسعد: بكره انا ها احي ونعمل اجتماع ونشوف ها نعمل
إيه.

الدكتور فؤاد: إحنا عاوزين ناخذ موقف حازم مع الولد
دا.

اسعد: بكره في الاجتماع نناقش كل حاجه.

انتهت المكالمه طلب الدكتور فؤاد موظف الحسابات
الخاص بالقسم الذي يعمل فيه الدكتور رمزي ذهب إلى

دار الروضة

الدكتور فؤاد في مكتبه: أوامر يا دكتور.

الدكتور فؤاد: أنا عاوزك تجبلي الملفات الخاصة بشغل الدكتور رمزي كل ما يتعلق بيه من ماليات صغير وكبير إل صرفوه والمواد ال استهلكها.

الموظف: من عنيا يا افندم خمس دقائق ويكون عند حضرتك سلام.

الدكتور فؤاد في نفسه بعد أن انصرف الموظف: وحيات أمك لا علمك الأدب دا متخلقش ال يتحدى الدكتور فؤاد البدوي. دخل عليه الموظف وهو يحمل الملف بين يديه رآه الدكتور رمزي وهو يدخل على الدكتور فؤاد سأله بعد أن خرج: فيه يا أستاذ؟

الأستاذ عادل: لا مفيش انا كنت عند الدكتور فؤاد كان طالب ملفات معينه وانا دخلتهاله.

وقبل أن يسأله الدكتور رمزي عن نوعية الملفات بادره بالقول: بعد اذنك يا دكتور رمزي عندي شغل.

هز الدكتور رمزي رأسه وقال: اتفضل والله الموضوع

قلب العاشق دلييله.....د/هاشم بكري

دا ما ها يعدي بالساهل.

قابل الدكتور اشرف الدكتور رمزي وهو يسير في
الطريقة ويحرك رجليه بصعوبة ويبدو عليه الضيق والانشغال
سأله: مالك يا عمي رمزي؟

الدكتور رمزي: مفيش حاسس إن فيه حاجه بتدبر من
ورايا.

الدكتور اشرف: حاجه زي إيه؟

رمزي: مش عراف الديب ال جوه دا مش هاياعدي
خلافاتي معاه على خير.

اشرف: إذا كان هو ديب فانت تعلب يا مان خلي بالك بس
من نفسك انا شفت الاستاذ عادل مدخلو ملفات وخرج من
غيرها.

رمزي: دا المتوقع بس انا عامل حسابي لكل كبيره
وصغيره ومحرص من الراجل دا لانه مش ساهل الدكتور
اسعد سايبلو السايب في السايب ومأمنه مش عارف كدا ليه.

وفي اليوم التالي قال علاء لسعاد: اعلمي حسابك يا سعاد
ها نروح بكره الشركه نشوف النظام ونشوف حسابي واقبض

سعاد: مرتب إيه وتروح فين؟

علاء: انتي مابتفهميش باقلك ها اروح اجيب القبض
وارجع الشغل واشوف احمد بس انا علوزك تجهزي ورق
العملية عشان لو كانوا بيغبنوني الورق يشيل الغياب.

سعاد: استنى انا ها اتصل بسماح تروح معانا.

علاء: ليه إحنا ما نعرفش نروح من غيرها يا أدي سماح
ال طلعتنا في البخت انا خايف ماتأكلوناش إلا إل تقول عليه
سماح.

سعاد: ما تستعجلش.

اتصلت سعاد بسماح من تليفون علاء وطلبت منها أن
تذهب معها هي وعلاء إلى الشركة.

قالت سماح: وها يروح الشركه ليه؟

سعاد: علوز يروح يشوف احمد ويجيب القبض.

سماح: قبض إيه؟

قلب العاشق دليله.....د/هاشم بكري

سعاد: قبض الشهر ال فات.

سيد: انتي بتكلمي مين يا مزميزه اكيد بتكلمي عنتر يا
عبله هانم.

واختطف التليفون من يدها وقال: الو اتكلم سكت ليه؟

قالت سعاد: انا سعاد يا سيد أنت تفكر حد غريب ال
بيتكلم؟

سيد: يا سعاد انا علوزك تبغي اخوكي رساله.

سعاد: رساله إيه؟

سيد: قولي لـاخوكي سيد بيقولك انسى اختى ومش
علوزك تطلع وتدخل الا لما تحدد يوم للفرح يا إما كل واحد
يروح لحاله.

سعاد: إيه الكلام ال بتقولو دا يا سيد انا ما اقدرش اقول
لعلاء حاجه أنت ابقى تعالى واقلو على ال أنت علوزه.

سيد: ماشي انا ها احي واقلو.

أغلق المحمول واتجه إلى اخته وقال: وانتى وحياة أمك
لو شفتك دخلتى هناك لآكون كاسر رجلك وال ابوكي ماعرفش
يعملو معاكى انا ها اربيكى من اول وجديد.

دار الروضة

دخل أبو سيد على إرتفاع صوت سيد وهو يهدد أخته
قال: فيه إيه فيه ياد يا سيد صوتك جايب ال في اخر الحاره
ليه؟

سيد: شوف يا آبا إحنا لازم نحط حد لموضوع الواد ال
اسمه علاء دا الواد دا شكله من الآخر بعد العميله ما ينفعش
لجواز وعشان كذا إحنا لازم نخلص منه.

أذهل أبو سيد من كلام ابنه وقال: ومين ياد يا سيد ال قلك
على الكلام دا؟

سيد: الحاره كلها بتتكلم على الموضوع دا وبتقول انه
مينفعش لجواز.

أبو سيد: يعني إيه ياد دا إحنا كاتبين الكتاب أنت مخولت
دماغي يا ابن المره المجنونه.

اتجه أبو سيد إلى أم سيد وقال: أنتي يا ام سيد انتي سامعه
ال انا سامعه من الاهبل ابن الهبله دا؟

أم سيد: لا انا اول مره اسمع الكلام دا.

سيد: من الاخر انا ها استنتي شويه وها اشوف هو ها

قلب العاشق دلييله.....د/هاشم بكري

يعمل إيه وبعدين انا ها اتصرف.

علاء: إيه ال حصل يا سعاد سماح قالتلك إيه.

سعاد: احتمال سماح ما تقدرتش تيجي معانا بكره بس
قالت ها تحاول.

وبعد أن خرج سيد تحايلت سماح واتصلت بعلاء ردت
عليها سعاد قالت سماح: اعملي حسابك انا ها اجي معاكو بكره
بس ما تعرفيش حد ها قابلكو بره الحاره عشان ماحدش
يشوفنا.

وفيه هذه الاثناء جلس عمرو مع فاضل ولامه قائلا: انت
ليه مازرتش علاء زي الناس كلها يا اخي دا اهل الحارة كلهم
زاروه.

فاضل:مش قادر من يوم موضوع سماح وانها فضلتو
عليها يا جدع.

عمرو: ياجدع انسى شكلك وحش قوي في الحارة والواد
تعبان اقلك تعالى بالليل وانا ها اروح معاك.

فاضل: سيبي افكر.

عمرو: ودي عاوزه تفكير انا ها اجيلك بالليل واروح

فاضل: آمين.

ذهب الدكتور اسعد إلى الشركة وطلب اجتماع مجلس
أداره الشركة بدأ الاجتماع الدكتور فؤاد بالترحيب وبالثناء
على المجموعة وعلى الأرباح التي حققتها الشركة وعلى
المجهود الذي قام به الجميع انتهى الترحيب ثم قال الدكتور
فؤاد: انا باعرض على حضرتك يا دكتور اسعد مخالفات مالية
وإدارية عملها الدكتور رمزي مخالفات مالية في تلف الكثير
من المواد الفعالة لبعض الأدوية وكله بالمستندات وارتب على
دا خسارة الشركة لمبالغ كبيره بالاضافه لتأخر الالتزام
بالمواعيد الخاصة بالتسليم وبناء عليه حضرتك قدام تحويل
للسئون القانونيه وتوصية بإبعاده حتى لا تكرر هذه العملية.

أراد الدكتور اسعد أن يتكلم قاطعه الدكتور فؤاد قائلاً: مع
الزام الشركة بدفع مكافئه نهاية خدمه له والالتزام بعدم توصيل
الموضوع للقضاء وجواب شكر.

الدكتور اسعد: هو دا الصح.

نظر الدكتور فؤاد إلى كل من حوله واشتر بعلامة

قلب العاشق دلييله.....د/هاشم بكري

الانتصار إلى إتباعه، أما علاء فقد خرج هو وسعاد في طريقهما للشركة وانتظرته سماح في مكان خارج الحارة بحيث لا يراها سيد وتقابلت هي وعلاء وسعاد وركبوا الميكروباص حتى وصلوا إلى الشركة ولم يتكلم أي منهم مع الآخر بكلمة واحده علاء يكاد يطير من الفرح ويتخيل حال الشركة والمقابلة التي يلاقيها من زملائه ورؤسائه واحمد والمكافأة التي سيحصل عليها عندما يعلموا ما حدث له.

أول ما قابل علاء بعد وصوله للشركة الفراش أخذه علاء بالأحضان: أزيك يا عمي جمال لو اني زعلان منك أغيب دا كله ما حدش يسأل عليا ليه كدا فين حق العشره والعيش والملح؟

نظر عمي جمال إلى الأرض ولم يتكلم وقال بصوت منخفض: منه لله الندل احمد.

علاء: بتقول إيه يا عمي جمال؟

جمال: ما بقلش انت رايح فين يا ابني؟

علاء: رايح الحسابات عشان اصرف مستحقاتي.

جمال: ما بلاش ما هي الأستاذة والأستاذة، أشارات إليه سماح ووضعت يدها على فمها إشارة بالسكوت دخل علاء هو

دار الروضة

وسعاد وسماح إلى الحسابات سلم على موظف الحسابات
بحرارة رحب به ولكن بفتور على غير العادة لاحظ علاء
فقال: فيه إيه يا استاذ؟ الموظف: ولا حاجه؟

علاء: انا جاي اصرف المرتب.

الموظف: مرتب إيه يا أستاذ علاء هم الجماعة في البيت
ماقلوش لحضرتك؟

علاء وهو يتعجب: قالولي إيه ؟

الموظف: قالولك إن الشركة باعتت لحضرتك إنذار
بالفصل وان علاقتك بالشركة يا أستاذ علاء انتهت من حوالي
شهر.

علاء كاد يسقط على الأرض أسندته سعاد وسماح حتى
اجلساه وأسرع الموظف بكوب ماء وقال: اشرب يا استاذ
علاء.

علاء: بعد أن شرب الماء واخذ نفسا عميقا ووضع يده
على صدره وقال: يعني إيه؟

الموظف: يعني حضرتك اتفصلت من الشركة وملكش

قلب العاشق دلييله.....د/هاشم بكري

أي متعلقات في الشركه واحنا باعتنا لحضرتك انذرات
بالفصل.

علاء: صراحه محدش قللي.

نظر علاء إلى أخته وإلى سماح وقال: وانتو عارفين انهم
باعتلولي انذرات بالفصل؟

سماح: ايوه عارفين واحنا مرضناش نقولك عشان تيجي
تشوف بنفسك من ناحيه ومن ناحيه تانيه يمكن لما تيجي هنا
ويعرفو حالتك وظروفك يرجعوك الشغل.

علاء: طيب واحمد يعرف يا أستاذ؟

الموظف: بصراحه احمد هو إل قلنا انك اختفيت ومحدش
عارف مكانك وانك ممكن تكون موت في حادثه.

علاء: يا ابن الواطي يا كلب إخص عليك.

وفجأة دخل احمد تظاهر انه لا يعلم شيء عما حدث
وقال: اللول ألف حمد الله على سلامتك نورت الشركه تصدق
الشركه كانت مضلمه من غيرك يا رجل طيب رجعت
بالسلامه اتصل هو إحنا مافيش بينا عيش وملح.

والموظف يتعجب من نفاق احمد وسعاد وسماح في

دار الروضة

دهشة مما يحدث، ثم نظر إلى سماح وسعاد وسلم عليهما: إزيك
يا عروستنا إزيك يا سعاد.

كل ذلك وعلاء مدقق النظر إليه ويستاقط العرق من
جبينه والألم يعصر قلبه ثم تابع أحمد كلامه قائلاً: انا رحلتك
واسأل اختك وسماح عموماً حمد الله على سلامتك.

نظر: إليه علاء وقرب وجهه منه ولم يتكلم واكتفى بأن
بصق في وجهه وقال لسماح وسعاد: يلا خرينا ندخل على
المدير.

أحمد وهو يمسح وجهه من أثر البصاق: انا مقدر ظروفك
ولولا حالتك الصحية انا كنت رديت عليك بنفس طريقتك بس
الطيب احسن الا انت كنت فين الفترة ال فاتت يا علاء.

علاء: يلا سعاد يلا يا سماح مشوني من وش الوسخ دا.
وصلوا إلى باب المدير اقترب من الباب سلم عليه
الساعي بفتور أيضاً على غير العادة وقال: اتفضل يا استاذ
علاء حضرتك عاوز حاجة؟
علاء: عاوز ادخل للمدير.

قلب العاشق دليله.....د/هاشم بكري

الساعي: آسف المدير عنده اجتماع وقالي مفيش حد يدخل.

علاء: وسع مفيش حد يدخل أزاى؟

وقف الساعي أمامه وقال: زي ما باقولك ومش ها تدخل وابتعد احسنلك.

سمع المدير ارتفاع الأصوات فقال: فيه إيه عندك وإيه الدوشه دي؟

الساعي: لا يا أفندم مفيش حاجه.

قال علاء بصوت مرتفع يبدو عليه التعب: انا علاء يا أفندم والساعي مانعني من الدخول عند حضرتك.

المدير: اتفضل يا استاذ علاء الشركه ملهاش علاقه بيك أنت اتفصلت.

عاد علاء وهو في غاية التعب واليأس والحسرة تسند على سماح وعلى سعاد وقال لهما وهو يبكي: انتو عاجبكو منظري كدا مش كنتو تقولو توفروا عليا الموقف ال حطتوني فيه دا حرام عليكمو دا أنا كنت ممكن أموت فيها.

قالت سماح: إحنا حسنا إننا مهما نقولك عن احمد ماكنتش

دار الروضة

ها تصدق فحبينا انك تشوف بنفسك.

علاء: يا رب إيه الحكاية واحد يصرف عليا يبجي نص مليون وما يعرفنيش وناس أكلت معاهم عيش وملح وكنت مقطع نفسي في خدمتهم ويبيعوني ويرموني كدا رمية الكلب. في نفس التوقيت عاد سيد إلى البيت سأل أمه عن سماح.

سيد: سماح فين يا أما؟

أمه: أنت عارف إنها في الشغل.

سيد: وما رجعتش ليه لحد دلوقت؟

أمه: انت عارف إن معادها لسه يا ابني.

سيد: انتي عارفه ما اعرف إنها راحت مع الواد دا من ورايا لاسود عيشتها وعيشتك انتي مره علوزه قطم رقابتك وانتي ال بتشجعيها، يعني انتي عارفه إنها في الشغل؟

أمه: أيوه يا ابني وها اخبى عليك ليه.

سيد: تمام عداكي العيب وأزح.

وبينما هما يتحدثان دخلت عليهما سماح وعليها آثار

قلب العاشق دلييله.....د/هاشم بكري

الضيق سألها سيد: كنتي فين؟ ظنت سماح أنه مر عليها في الشغل ولم يجدها فقالت: كنت مع علاء وسعاد في الشركة.

لم يتكلم سيد وضربها على وجهها ضربة شديدة أسقطت الحلق من أذنها صرخت سماح وقالت: انتي قليل الأدب.

سيد: قليل إيه والله لاوريكي النجوم في عز الضهر انتي فاكركه اني ها اسيبك على حل شعرك.

اجتمع الجيران على صوت سماح وقف سيد أمام الباب والناس تسأل: فيه إيه يا سيد؟

سيد: مفيش حاجه يا جماعه وكل يروح على بيته مش عاوز لمه قدام الباب.

رجع أهل الحارة والكل يتكهن بتكهن خاص به.

أما رمزي فعندما صدر له قرارا بإنهاء الخدمة وتوجيه الشكر له قال للدكتور اسعد بعد أن انتظره حتى خرج من الشركة: يا دكتور انا عاوز أقابل حضرتك.

الدكتور اسعد: ليه يا دكتور رمزي إذا كان بخصوص الفصل أنا ما عنديش كلام انت تحمد ربنا إننا ما بلاغناش البوليس.

دار الروضة

رمزي: فيه حجات.

قاطعہ الدكتور اسعد قائلا: ماتخفش إحنا مش هانبلغ
النيابه عن مخالفاتك وانت دكتور كويس بس الشيطان شاطر.

رمزي: شيطان إيه وشاطر إيه؟

أسعد: الدكتور فؤاد قدمنا بالمستندات مخالفات كبيره
خسرت الشركه كثير.

تعجب رمزي وقال وهو مذهول: يعني إيه انا مش فاهم
حاجه؟

الدكتور أسعد: يعني إحنا طلعلناك جواب انهاء خدمه
ومكافأة واكتفينا بكدا.

رمزي: انا مش فاهم حاجه.

أسعد: بعد اذنك روح الخزنه اصرف المكفأة واستلم
الجواب وألف شكر. وانصرف حاول رمزي أن ينادي عليه
ولكن اسعد تركه وانصرف.

دخل رمزي سأل احد الزملاء: إيه ال حصل؟

زميله: ال حصل إن الدكتور فؤاد جاب مستندات إدانتك

قلب العاشق دلييله.....د/هاشم بكري

وانك اتسببت في خسائر كبيره للشركة وانك أتلفت كثير من المواد الفعالة وتسببت في تأخير الطلبات.

تركه رمزي وجري ناحية مكتب الدكتور فؤاد حاول السكرتير أن يمنعه ولكنه فشل دخل رمزي على الدكتور فؤاد وهو يشيط غضبا وقال: صحيح ال سمعته دا يا دكتور فؤاد؟
الدكتور فؤاد: آه صحيح واحمد ربنا.

دخل السكرتير وحاول أن يخرج به أشار إليه الدكتور فؤاد بالتوقف قال الدكتور رمزي: طيب ليه يا دكتور عشان حاولت اكشف غشك وخداعك حسبي الله ونعم الوكيل فيك أنت انسان غشاش وخاين خنت شرف المهنة والقسم أنت متستحقش تلبس البالطو الابيض.

وبينما رمزي يتكلم ضغط الدكتور فؤاد على الزر وطلب الأمن الذي دخل مسرعا وقال لهم: طلعو المجنون دا بره ارموه بره الشركة الأشكال دي مالهاش مكان عندنا.

قال رمزي وهو يدافع الأمن: وحياة أمي لاسجنك يا فؤاد والأيام بينا وهانشوف مين ال هايضحك في الآخر.

اتصل رمزي بخطيبته ريهام وقال لها: ريهام انا عاوز اقبلك انا مضايق جدا.

دار الروضة

ريهام: ليه فيه إيه؟

رمزي: انا مخنوق لازم اشوفك.

ريهام: من عنيا انا مستنياك نخرج مع بعض نص ساعه
واكون عندك.

التقى رمزي بريهام سألته:مالك يارمزي.

رمزي:اتفصلت من الشركة.

ريهام بنبرة حاده:والمطلوب مني اعمل ايه لواحد ما
بيتشغلش ولا عندو دخل واحد مفصول حلني على ما يلاقي
شغل.

رمزي نظر اليها وهو مذهول وقال: تقصدي ايه ريهام
انا محتاجك جنبي انا في ظروف صعبه.

ريهام: ما نجلكش في ظروف لما ظروفك تتحسن ابقى
اتصل عليا وانا مستنياك سلام يا لذوز انت ال مقفل ومش
عارف تفتح نفوخك ال زيك انقرضو.

تأزمت الدنيا في عين علاء وعاد منهار ومنهك ومتعب
اتصلت سعاد بالدكتور اسعد وهي تبكي قائله: الحقنا يا دكتور

قلب العاشق دليله.....د/هاشم بكري

علاء تعب وانا خيافه عليه.

الدكتور اسعد: طيب خلاص ما تعيطيش انا جاي حاولوا تقابلوني وانا في الطريق.

سعاد وهي تبكي: يا دكتور نيحي ازاي علاء مش قادر يتحرك ووشو اصفر خالص.

أسعد: طيب خلاص انا جاي بس العربية ماينفعش تدخل ركبوه توكتوك وقابلوني. نادت سعاد على بعض الجيران حملوا علاء في التوكتوك وصل الدكتور اسعد أخذه في سيارته وانطلق به إلى المستشفى الذي أمرت بدخلوه في الحال، أجريت له الإسعافات سأل الدكتور اسعد سعاد: إيه يا سعاد ال حصل حد زعلو في حاجه؟ قالت وهي تبكي: كان يوم اسود النهارده؟

أسعد: إيه يا ساتر يا رب إيه ال حصل؟

سعاد: بعد ما علاء عمل الحادثه بعدها بحوالي اسبوع جالو انذار بالفصل من الشغل.

اسعد: إيه ال حصل؟

سعاد: واحد صحبه بلغ عنه في الشركة انه ضاع ومحدث عارف عنه حاجه الشركه فصلتو وبعد ما خرج من

دار الروضة

المستشفى وحس بتحسن النهارده طلب مننا انا نوديه الشركه
عشان يصرف فلوسو ويسلم عليهم.

قاطعها أسعد: وانتو طبعا محدش قالو حاجه وسييتوه
يروح على الشركه على عماه وراح واتصدم هناك طبعا والله
معذور هو دا التخلف هو دا الجهل انتي عارفه انه كان ممكن
يموت في صدمه زي، اخص على كدا، بقى علاء بيعمل في
نفسه كدا عشان الشغل بسيطه يا ستي يعتبر نفسه شغال من
النهارده لا النهارده إيه من يوم ما عمل الحادثه هو كان شغال
في الشركه إيه؟

سعاد: كاتب في الحسابات.

دكتور أسعد: تصدقي هو قلبي قبل كدا طيب يا ستي يعين
في شركة السعد للأدوية كاتب حسابات.

أما رمزي فقد ذهب إلى الدكتور اشرف وقال: عجبك ال
حصل دا يا اشرف أنت تعرف إن رمزي يعمل كدا؟

اشرف: صراحه انا مش مصدق بس الراجل اثبت
بالأوراق والمستندات ال أنت ماضي عليها بخط ايديك يعني
مفيش شبه واحده نعرف ندافع بيها عنك.

رمزي: سيبك من الورق أنت تصدق فيا كدا؟

أشرف: صارحه انا مش عارف احكم؟

رمزي بكل أسى: يعني أنت مصدق يا خساره انا كنت متوقع انك ها تبارك الكلام، ال في قلبك من ناحيتي معروف وانا ال كنت باحاول اكذب نفسي واقول الايام غيرتك لكن الظاهر الطبع بيغلب التطبع.

اشرف: انا من رأي تريح نفسك وما تفتحش على نفسك نار جهنم أنت مش قد الدكتور فؤاد.

رمزي: انا ها اوريك انا قدو ولا لأ.

فاق علاء وبدأ يشعر بتحسن نظر إلى الدكتور اسعد ومد يده ليسلم عليه وعندما مد الدكتور اسعد يده لعلاء ليسلم عليه أمسك علاء يد الدكتور اسعد وانهاهال عليها بالتقبيل والدكتور أسعد يسحب يده بسرعة ويقول: استغفر الله استغفر الله.

علاء: أنت انصف واحد قابلتو في حياتي بتدي من غير ما تنتظر انك تاخذ حاجه.

تبسم الدكتور اسعد وقال: يا بني الدنيا لسه بخيرها إيه يعني حبة ناس خزلتك الجاي أحلى واحسن، بس انا عاوزك

دار الروضة

تقوم بسرعه عشان تشوف شغلك.

علاء: شغل إيه ما فصلوني ولا شغل ولا مشغله.

الدكتور أسعد: يا ابني شغل إيه ال أنت بتتكلم عليه أنت ليك مرتب شهر عندي في حسابات الشركه من يوم الحادثه أنت متعين بالفعل.

أخرج الدكتور اسعد محموله واتصل بالشركه وقال: اصرفو راتب شهر للاستاذ علاء.

ونظر إلى علاء وهز رأسه مستفهما منه عن اسمه كاملا: علاء إيه؟

علاء: علاء محمد حسن.

الموظف: إحنا ما عندناش موظف بالاسم دا يا افندم.

الدكتور اسعد: عينوه في الحسابات من الشهر ال فات.

قالت سعاد: ابسط يا عم علاء.

علاء: الحمد لله لو رزق العبد على العبد كان قطعو وربنا قبل ما بيقطع بيوصل.

قلب العاشق دليله.....د/هاشم بكري

الدكتور اسعد: آمال فين سماح سكت علاء وسكتت سعاد
كرر السؤال فين الراجل بتاعكو فين البت سماح.

سعاد: سماح أخوها لما عرف إنها راحت مع علاء
ضربها ومنعها إنها تيجي عندنا.

اسعد: ليه؟

سعاد: أخوها بيطلع أشاعه في الحاره إن علاء عامل
عملية في القلب وان الدكاتره منعينو من الجواز وانه لو اتجوز
هايموت.

اسعد: وسماح رأيها إيه في كلام أخوها؟

سعاد: سماح ماهماش عمايل اخوها خالص ولا قاطع
فيها الا معاملة علاء ليها.

أسعد: وسماح ما عملتش حاجة؟

سعاد: صراحه سماح معذوره سماح عاشت قصة حب
الدنيا كلها كانت بتحكي عليها مع علاء وعلاء بعد الحادثة كأنه
ما يعرفهاش البت مصدومه دا غير يا دكتور ان اخوها منعها
من الخروج او انها تتكلم مع علاء.

الدكتور: مش انتو مخطوبين يمنعها ليه؟

دار الروضة

علاء: دا احنا مكتوب كتابنا بس بيني وبينك يا دكتور كدا
احسن راحه ليا وليها انا مش حاسس نحيثها بأي انجذاب ولا
رغبه بالعكس انا حاسس نحيثها بنفور انا بادور على واحده
تاني انا بدور على ريم.

سعاد: ريم مين الظاهر العمليه خلت دماغك لسعت عليه
العوض ومنه العوض فيك.

لم يهدأ رمزي وظل يدور ويلف يتصل بكل من له علاقه
به اتصل بالأستاذ عادل قائلاً: آلو ازيك يا استاذ عادل.

عادل: الله يسلمك يا دكتور رمزي حضرتك عامل إيه؟

رمزي: يعني مانتش عارف عامل إيه يا أستاذ عادل.

عادل: والمطلوب مني إيه دلوقتي.

رمزي: تقول الحقيقة.

عادل: حقيقة إيه؟

رمزي: حقيقة الملفات تقول كلمه حق تبرأ واحد برئ.

عادل: وانا مالي ومال موضوعك انا راجل كاتب وبس
وانتو دكاتره مع بعض وانا ماعرفش حاجه عن شغلكو.

قلب العاشق دلييله.....د/هاشم بكري

رمزي: متأكد يا أستاذ عادل انك ما تعرفش حاجه عن
شغلنا؟

عادل: ايوه متأكد سلام عليكم.

اتصل عادل على الدكتور فؤاد بعد انهاء المكالمه مع
الدكتور رمزي: الو يا دكتور فؤاد الدكتور اسعد قال عي
واحد تبعه قال خلي بداية التعيين من الشهر ال فات اعمل إيه؟
الدكتور فؤاد: اعمل ال قالك عليه الدكتور اسعد وكأنك
مقتلش حاجه يلا سلام. عادل: بعد اذنك فيه حاجه ثاني.

الدكتور فؤاد: فيه إيه ثاني يا عم عادل؟

الدكتور رمزي: اتصلي ولمح تلميحات فيها تهديدات.

الدكتور فؤاد: سيبك من امه عشان كل ال يفكر انه يتعدى
حدوده يعرف إنه ها يجراله إيه؟ احنا مش بنلعب يا عادل احنا
في شركه محترمه مش كذا ولا إيه؟

عادل: كذا يا دكتره.

اتصل الدكتور اسعد بسماح: الو ايوه يا سماح انتي
ماجتش مع علاء إيه؟

سماح: مفيش شويه ظروف كذا منعنتي.

دار الروضة

خرج علاء من المستشفى بعد تحسن حالته وعاد إلى بيته وفي أول يوم لتسلمه العمل في شركه الأدوية التي يمتلكها الدكتور اسعد عبد الهادي ويديرها الدكتور فؤاد البدوي وصل علاء محمد حسن إلى الشغل وقد تحسنت حالته كثيرا لم يجد الدكتور اسعد في الشركة ذهب إلى الأستاذ عادل كما قال له الدكتور اسعد علاء: حضرتك الأستاذ عادل؟

عادل:ايوه يا افندم حضرتك مين؟

علاء: انا علاء محم.. وقبل أن يكمل الاسم قال الأستاذ عادل: آه اتفضل علاء محمد حسن موظف الحسابات الجديد قصدي القديم.

علاء بخوف: ايو انا علاء.

عادل: بس أنت حظك حلو قوي عليك توصيه خاصة والدكتور اسعد موصي عليك بصفه شخصيه.

علاء: الدكتور اسعد احسن واحد الواحد شافه في حياته ربنا يكرموا.

عادل: يلا يا علاء انا ها اعرفك الشغل وها افضل جانبك

لحد ما تعرف كل حاجه عنه.

بدأ علاء حياة عمليه جديدة ولكنه مازل يبحث عن حبيبه مجهوله لايعلم هو عنها شيئاً ولا احد يعلم عنها أي شيء الا قلبه الجديد هو من تعلق بها ولايزال يحلم بلقائها أما حبيبته المخلصة سماح والتي تفانت في كل شيء يقربها منه، فيبدو أن قلبه الجديد قد رفضها فماذا يفعل في هذا الصراع النفسي القلبي هذا ما نطالعه في الفصل القادم فإلى صفحاته.

الفصل الثالث

محطة المترو

قلب العاشق دليله د/هاشم بكري

دار الروضة

انتظم علاء في الشغل في شركة السعد للادوية والتي قام بتعيينه فيها الدكتور اسعد، وفي احد الأيام وهو في طريق عودته من الشغل وفي المترو وقد بدأ المترو في التحرك رأى فتاه تسمر في مكانه من هول ما رأى فتاه كاد قلبه أن ينخلع عندما رآها إنها حبيبته التي يبحث عنها ولكن المتر قد تحرك وأغلق أبوابه اخذ يضرب بيده في الباب لعله يفتح ولكن هيهات ويصرخ بصوت مكتوم: ريم ريم انا لقيتها انا لقيتها طيب لو نزلت المحطة الجايه يا ترى ها الحقها صعب صعب عشان الناس تصدق ان ريم موجوده وانها حيه وانها حقيقه مش خيال.

أحد الركاب يربط على كتفه ويقول: وحد ربنا واستغفر سلامتك يا ابني.

ثم ضرب الرجل كفا بكف وقال: الشباب اتجنن الله يكون في عونهم لا شغل ولا سكن ولا جواز.

عاد علاء إلى البيت وهو في حالة توهان عاد يستند على نفسه تارة وعلى أحلامه أخرى وعلى هيامه ثالثه عاد في حاله لاوعي وضربات قلب متسارعه ألا لعنه الله على الحب.

أمه: مالك يا ابني تعبتي في الشغل ولا حاجه؟

علاء لا يرد دخل إلى حجرته وأغلق بابيه عليه وأمّه
تجلس في الصالة وسعاد عند سماح قامت أم علاء من على
سريره في الصالة الصغيرة ودخلت عليه وجدته راقدا على
سريره في حالة سرحان تام نادته عليه في لهفه: علاء علاء
مالك يا ابني؟ وهزته وهي تكلمه قام علاء في خمول وقال وهو
في حالة الهيام التي هو عليها: لقيتها يا أما لقيتها يا أما ريم هي
ريم ال عشت الدنيا عشانها وال تحديث المرض عشان
ارجعلها.

أمه في ذهول: ريم مين يا ابني ال ما فيه واحده في
الحارة كلها اسمها ريم؟

علاء: ريم مش في الحارة يا أما ريم ساكنه في قلبي.

أمه: ساكنه فين ما تفوق يا واد أنت حصل لعقلك حاجه؟

علاء: دي مش حاجه واحده يا أما دي حاجات.

أمه: ربنا يشفيك يا ابني.

علاء: ادعيلي يا نونو.

أمه بسخرية: نونو انا ها اروح اناديلك اختك من عند

دار الروضة

سماح تيجي تشوفك.

خرجت أمه وذهبت إلى بيت أبو سيد نادت على أم سيد:
يا أم سيد البت سعاد عندك؟

أم سيد: تعالى يا أم علاء دي قاعده جوه مع سماح تعالى
ياختي اتفضلي.

أم علاء: لا مش قادره والنبي يا اختي ناديلي عليها.
أم سيد: يا سعاد كلمي امك.

سعاد: طيب يا سماح انا ها اروح اشوف امي عاوزه إيه
الظاهر علاء رجع.

وبينما سعاد في طريقها للخروج من عند سماح دخل
سيد: ازيك يا سعاد؟

سعاد: الله يسلمك.

سيد وهو ينظر إليها بإعجاب: عامله إيه يابت وايه
الحلاوه دي.

ابتسمت سعاد وتركته وانصرفت لتذهب مع أمها.

دخل سيد على سماح وقال: إيه الاخبار يا سماح؟

لم ترد عليه سيد: طبعا انتي ز علانه مني.

لم ترد وتنتظر أن يطيب خاطرها بكلمات اعتذار فقال لها: عموما انا عاوز ألك تزعلي تتفلكي دبي راسك في الحيط.

قالت سماح: انا مش ز علانه منك واكيد مش ها تصدق انا ز علانه يا واد يا سيد على نفسي الظاهر انا بعث قلبي لواحد مايستاهلش.

سيد: ايوه فضفضي وطلعي ال في قلبك.

سماح: الواد علاء يا سيد من ساعه ما رجع من العلميه ومشاعره اتغيرت خالص من نحيتي ومش عارفاله حاجه وكل ما اقرب منه يبعد.

سيد: انا.. قاطعته قائله: سيبك مني ومن علاء أنت ما فكرتش تخطب وتشوف نفسك؟

سيد: وحياتك فكرت وانا معايا قرشين وممكن اشوف مكان على قدو.

سماح: وتشوف ليه البيت ملكنا ونشطبك الدور الثاني تدخل فيه.

دار الروضة

سيد: انا حاسس انك بتلمحي لحاجه؟

سماح: بصراحه آه البت سعاد بت جدعه.

سيد: تصدقي يابت انا فكرت فيها من شويه وها اشوف وربنا يهي ال فيه الخير.

طلب الدكتور فؤاد الأستاذ عادل وسأله: إيه رأيك في الواد ال جابه اسعد؟

عادل: لسه ماكونتش عنه أي انطباع بس شكله غلبان وعيان.

فؤاد: يعني اسعد مش زراعه لينا عشان يعرف حاجه؟

عادل: يا دكتره زراعه إيه ولا هو ولا عشره مش كدا ولا إيه؟ ثم انفجروا في نوبة ضحك شديدة.

اتصل اسعد بسماح وطلب منها أن يراها ظنت انه سيحدثها عن علاء وعن تقريب وجهات النظر بينهما ومين عارف يمكن يقابلنا مع بعض، ذهبت إليه في المكان الذي حدده جلس معها في الكوفي شوب أسعد: تشربي إيه سماح؟

سماح: أي عصير ها اشربو عادي.

اسعد: انا ها اشرب لمون.

سماح: ماشي يا دكتور وانا كمان ها اشرب لمون.

سماح: وصلتو لايه انتي وعلاء؟

سماح: مش عارفه علاء زي ماهو بالعكس بيزيد بعد
وانا مش عارفالو حاجه والنار بتاكل فيا.

رن تليفون الدكتور اسعد نظر في المتصل فوجده علاء
ظن الدكتور اسعد انه سيغضب منه لو عرف أن سماح معه
ففتح على مضض وقال: اهلا الموظف الجديد اخبارك؟

علاء: انا كويس باركلي يا دكتور لقيتها لقيتها يا دكتور.
قاطعه الدكتور: أنت عارف مين ال قاعد معايا دلوقت يا علاء؟
علاء: ما يهمش مين ال قاعد معاك انا ال يهمني اني
لقيتها.

الدكتور: سماح معايا مش عاجز تظمن عليها؟

تجاهل علاء كلام الدكتور تماما وكأنه يتكلم عن احد لا
يعرفه الدكتور تحرك بعيدا حتى لا تسمع سماح كلماته: مين
دي ال لقيتها يا علاء؟

علاء: ريم يا دكتور ريم يا دكتور لقيتها امبارح في

دار الروضة

المetro شفتها، شفت ريم حبيبتى ال كلمتك عليها.

الدكتور أسعد: شفتها فين واتكلمت معاها ولا لأ؟ يا ابني أنت بتجري ورا وهم وسراب.

لاحظت سماح او استنتجت تجاهل علاء التام لها مع الدكتور وقالت بمكر: علاء عرف اني معاك يا دكتور؟

الدكتور: آه انا قتلتم سماح معايا.

سماح: وطباعا ولا اهتم ولا سأل.

الدكتور: مش كذا بالظبط.

سماح: إحنا يا دكتور عاوزين نخط حد للموضوع دا.

الدكتور: إن شاء الله.

وفي اليوم التالي ركب علاء كعادته metro ونزل في المحطة التي لمح فيها حبيبته ريم وانتظر أكثر من ساعة ولكنه لم ير أحدا أخبر سعاد عما حدث في metro فقالت له: والله أنت بتجري ورا الوهم يا اخويا أنت بقيت طيشه حد يسب سماح البت المجدع بنت البلد ال وقفت جنبك وقفه موقفهاش صاحبك ال خيرك عليه وخلاهم فسلوك من الشغل وفضلت وراك لحد

قلب العاشق دليله.....د/هاشم بكري

ما عترنا عليك ويجري ورا قلتي اسمها (بسخرية).

علاء بلهفه: ريم ريم.

سعاد: على فكره انا عاوزه اوديك لشيخ ولا حد من
الجماعه اياهم انا شاكه انك عليك عفريت.

عرف الدكتور رمزي من خلال بعض زملائه أن كاتب
جديد تم تعيينه في الحسابات واسمه علاء فضل يبحث عنه حتى
عثر على رقم تليفونه وطلب مقابلته بعد الانتهاء من الشغل: الو
الأستاذ علاء محمد حسن؟

علاء: ايوه يا افندم مين معايا؟

رمزي: انا واحد ماتعرفوش يس عاوز اشوفك لمصلحتك
قبل ما رجلك تيجي في الخيه زيي.

علاء: أنت مين ورجلي إيه وخيه إيه؟

رمزي: انا واحد اتلسع قبلك ومش عاوزك تتلسع زي
اسمعني احسنلك بدل ما تلاقيك بعد سنه ولا اتنين في الشارع
او في السجن انا ها انتظرك الساعه اربعه في المكان ال أنت
تقول عليه.

علاء: وهو مذهول ماشي.

دار الروضة

الدكتور فؤاد اتصل بعادل وقال له: الواد عامل معاك إيه؟

عادل: مطيع طاعه عمياء.

الدكتور فؤاد: طيب حلو قوي شويه شويه رقيه.

عادل: علم وجاري التنفيذ.

الدكتور فؤاد: ما وصكش.

عادل: لا توصي حريص.

انشغل علاء بكلام المتصل المجهول والذي أنهى معه المكالمة على موعد باتصال ليحدد له مكان المقابلة سألته الأستاذ عادل: مالك يا علاء انا ملاحظ انك مش طبيعى من ساعه المكالمه ال جاتلك حد قلقك حاجه وحشه لا قدر الله محتاج حاجه؟ هم علاء أن يخبره بموضوع المكالمة ولكنه تراجع وتذكر كلام المتصل: أوعه حد يعرف حاجه عن المكالمه دي وإلا هاتضر نفسك علاء: مفيش دا انا سارح في حاجه تاني خالص.

علاء في نفسه: يا رب ها الاقيها منين ولا منين من ريم

قلب العاشق دلييله.....د/هاشم بكري

ال اخيرا لقيتها وضاعت مني تاني ولا من الراجل ال اتصل
ولا من سماح ولا من مين اعمل إيه..

انتهى اليوم واتصل بالرقم وحدد له مكان المقابلة في
محطة المترو التي رأى فيها حبيبته. رفض المتصل المكان
لأنه مكان عام ربما يراهم فيه احد وقال له: يا ريت تغير
المكان انا مش عاوز حد يشوفنا مع بعض ودا لمصلحتك.

غير علاء المكان إلى احد المقاهي في منطقة شعبيه وافق
المتصل على الفور.

أما الدكتور اسعد والذي يحاول بشتى الطرق أن ينهي
موضوع سماح وعلاء بأن يعيدهما لبعضهما ويحددو موعد
الزواج فقد فشل في تحريك مشاعر علاء تماما بعد أن كلمه
أكثر من مره جلس مع نفسه في فلتة الأنيقة والتي تهوي الرياح
فيها يمينا ويسارا مداعبه الستائر دون أن تكون بهذه الفله سيده
تشرف علي شؤونها أو توجه الشغالين لوضع معين أو ترتيب
معين أو اختيار ديكور أو قطع أثاث سأل نفسه: انا فين من
نفسي وانا عايش لمين ولو مت دلوقت الشركه والفيللا
والأملاك هاتروح لمين والشركه هاتشتغل ولا هاتتصفي يمكن
الاحساس دا ال خلاني اعطف على علاء واعمل معاه كدا

دار الروضة

واقف جنبو يا خبر يا اسعد هو فين اسعد فين حياته ضيعت
عمرڪ في الشغل والصراعات ونسيت نفسك في دوامات
الحياه سأل نفسه سؤال محدد اين مكان المرأة في حياتك يا
دكتور اسعد؟

رد على نفسه: يا خبر دا انا نسيت ان فيه مخلوق اصلا
اسمه المرأة دوامات جرى إيه يا اسعد ال مفكرتش فيه وانت
شاب ها تفكر فيه بعد ما قربت على الخمسين إيه ال جرالك؟

حاول أن يفیق نادى على الشغال: اعمل فنجان قهوة
يمكن افوق ولا اقلك حضرتي الحمام الاول.

وصل رمزي إلى المكان الذي حدده علاء تعرفا على
بعضهما من خلال المحمول وصل رمزي إلى علاء جلس إلى
جواره سأله علاء: أنت مين وعاوز إيه؟

قال رمزي: ها تعرف كل حاجه بس اخذ نفسي واطلبنا
الشاي الأول.

نادى علاء على الجرسون: اتنين شاي يا ابني، ثم التفت
إلى رمزي وسأله:

قلب العاشق دليله.....د/هاشم بكري

شايك إيه يا استاذ؟

رمزي: مضبوط.

علاء: انا طلبت الشاي قول بقى يا عم أنت مين وعاوز إيه؟

رمزي: أنت ماسمعتش عن حد انفصل من الشركه الأيام ال فانت.

علاء: الحقيقه انا انفصلت من شركتي.

رمزي: الله عليك زيك زيي وانا كمان انفصلت من شركتي انا بقى ياسيدي الدكتور رمزي كنت شغال في الشركه والدكتور فؤاد لفقلي تهمة وطرمني من الشركه.

علاء: وليه وفين الدكتور اسعد.

رمزي: يا عمي اسعد مين اسعد عايش في الطرواه وكل حاجه في ايد الدكتور فؤاد ومحدث يقدر يعارضه في حاجه وال يتكلم يكون مصيره الطرد زيي كدا.

علاء: والمطلوب مني اعمل إيه؟

رمزي: تحرص وتعمل حسابك لكل ورقه بتمضي عليها وبتراجعها وان كنت بتحب الدكتور اسعد تفحص كل ورقه تقع

دار الروضة

تحت اديك وتخلي بالك من راس الحيه.

علاء: تقصد مين؟

رمزي: هو فيه غيرو؟ عادل هو عيون الدكتور فؤاد
واوعه تعرفه انك على علاقه بالدكتور اسعد.

علاء: ليه؟

رمزي: ها تعرف بعدين.

علاء: انت عاوز إيه؟

رمزي: انا عاوزك تاخذ بالك من نفسك.

علاء: ليه؟

رمزي: عشان هاحاولو يوقعوك في مخالفات عشان
ماقدرش تتكلم عن مخالفاتهم ودي ال انا ماقدرتش اخذ بالي
منها.

علاء: وانت مصلحتك إيه؟

رمزي: مصلحتي انك ها تكشفهم وانا ساعته اعرف اخذ
حقي وانت ها ترد جزء من جمايل الدكتور اسعد عليك.

علاء: ماشي شكرا على النصيحة.

رمزي: ما وصكش أي حاجه قلي سلام.

وقف رمزي وقال: وقبل ما اسبيك مش محتاج اوصيك
انك لاشفتني ولا تعرفني حتى لو جه اسمي قدامك صدفه او عه
تقول او تلفت النظر انك تعرفني سلام.

علاء: سلام.

خرج علاء من القهوة وسار في الطريق ليركب سيارة
ويعود الى بيته وهو يفكر في كلام رمزي واقف في انتظار
سيارة ليعود بها وإذا به ينظر في سيارة تمر من أمامه ونفس
الحال رأى فتاه فاتنة في السيارة جرى خلف السيارة ولكن
السائق لم يره وبالتالي لم يقف له جلس على جانب الرصيف
وهو متعب والعرق يتصبب من جبينه يسأل نفسه: يا رب انا
باحلم ولا إيه إيه ال بيحصل معقوله حقيقه دي يا رب ولا وهم
انا مش عارف اعمل إيه يا رب اسيب رمزي تطلعي ريم
وانتظر ريم ما اشوفهاش وكل ما احاول انساهها القاها تطلعي
في الطريق.

وفي أحد الأيام طلب الدكتور فؤاد عادل في مكتبه
وبمجرد دخول عادل المكتب قال له الدكتور: أتأكد من ان

دار الروضة

الباب مقفول من وراءك كويس.

هز عادل الاوكره وتأكد أن الباب مغلق ثم قال: كله تمام
يا ريس.

فؤاد: احنا عندنا شغل كبير وجديد عاوزك تركز معايا
جيلنا شحنه جديد لدوا قليل في السوق عاوزين نظبطها
ومتتناسش ترميها كلها على الواد الجديد ال جابهولنا اسعد،
وسايينا وداير في الجمعيات الخيرية والمؤتمرات والندوات
واحنا شايلين الشغل على رقبتنا.

عادل: علم وينفذ تؤمر بحاجه؟

فؤاد: ايوه وانت خارج عدي على الحسابات فيه مكفأه
ليك تصرفها.

عادل: ربنا ما يحرمناش من حضرتك وإدارة حضرتك
وإبداع حضرتك.

فؤاد: وانت ربنا ما يحرمنا من دفاتر حضرتك مش كدا
ولا إيه.

عاد علاء وقد اشتد ولعه بحبيبته المجهولة التي لا يعلم

قلب العاشق دلييله.....د/هاشم بكري

عنها شيء قال لامه بعد أن تملكه الشوق والوجد بحبيبته
المجهوله في الواقع والحقيقة في قلبه هو فقط حتى الآن: يا أما
انا عاوز اروح انا وانتي لعمي ابو سيد عشان موضوع سماح.

قالت أمه: طبعاً عشان تحددو ميعاد الفرح طيب يابني
اصبر شويه كمان تكون ملكت صحتك.

علاء: لا يا أما عشان ننهي الموضوع.

سمعت سعاد الكلام وقالت: بردو والله حرام عليك بس ها
اقول إيه أنت متستهالاش وحده زي سماح.

علاء: وفري على نفسك كلامك البابت ال ملوش طعم.

سعاد: لو عاوز تعمل كدا سييني يا حلو يا ابو العريف
وانا ارتب مع سماح الطريقة ال تطلعو بيها من بعض.

أمه: سعاد بتتكلم صح.

في الليل ذهبت سعاد إلى سماح دلخت سملت على أم سيد
سألته عن سماح قالت: خشي يابنتي سماح جوه قاعده لوحدها.

دخلت سعاد سلمت عليها وقبل أن تدخل دخل سيد سأل
أمه: سماح فين يا أما؟ خافت أمه وقالت: وانت عاوزها في إيه
تاني مش كفايه ال علمتو معاه؟

دار الروضة

قال سيد: سماح دي اختي حبييتي ال ماقدرش استغني عنها ابدًا.

أمه: من اميته الكلام دا.

تركها ودخل وقال: سماح انتي يا بت يا سموحه سممحمح وسع يا بت.

فتح الباب وجد عندها سعاد وضعت عينها في الأرض بمجرد أن رأت سيد قال سيد: انتي عندك ضيوف؟

قالت سماح: لا يا خفيف دي مش ضيوف دي سعاد.

سيد: يعني امي مقاتلش.

سيد: ازيك يا سعاد عامله وامك عامله إيه.

حاول سيد أن يجلس قالت سماح: ما تهوينا يابني أنت رايح فين؟

سيد: ها اقعد؟

سماح: ما ينفعش دي قعدة بنات.

سيد: وانا باحب قعدة البنات.

قلب العاشق دلييله.....د/هاشم بكري

سعاد: طيب انا ها امشي واجي وقت تاني.

سماح: تمشي ايه هو الرخم دا ال هايمشي وانتي اقعدي.

هز سيد رأسه وقال: ماشي انا خارج..

قالت سعاد: انا جياالك بخصوص موضوعك انتي وعلاء.

سماح:مبقاش فيه موضوع يا سعاد.

سعاد: عشان كده احنا عاوزين ننهي الموضوع، صراحه انتي معاكي حق وشوفي الطريقة ال تعجبك وننهي بيها الموضوع.

سماح: الموضوع اصلا منتهي يا سعاد من يوم علاء ما رجع وقال ان دول شوية اوراق بيقى يبجي يتفق هو وابويا عليها ونطلع بالمعروف وهو ربنا يسعدو وانا ربنا يوفقني قصدي يصبرني، انا مش عاوزه حاجه استني ها نادي على سيد يوصلك.

سعاد: يوصلني إيه دي فركه كعب.

لم تهتم سماح بكلام سعاد ونادت على سيد جاءها وفي يده جزره يأكلها: عاوزه إيه؟

دار الروضة

قالت: تعالى وصل سعاد.

قال: وتدفعي كام؟

قالت: بجنيه جزر.

ذهب سيد مع سعاد ليوصلها وهما في الطريق تعمد أن
يسير ببطء كما حاول أن يجس نبض مشاعرهما سألها: اخبارك
خلصتي الدبلوم ولا لسه؟

قالت: في اخر سنه.

سيد: يعني جاهزه لليشيل؟

سعاد: يشيل إيه هو انا رمية؟

سيد: يا بت والنعمة باضحك معاكى دا انتى نواره الحاره.

سعاد: ادينا وصلنا.

سيد: يخرب بيت بيتكو انا عارف بيتكو قريب ليه؟

قالت: تصبح على....وقبل ان تكمل كلامها ... قال: وانتى
من اهل اهلو.

ضحكت سعاد وهي تدخل البيت سألتها أمها: عملتى إيه

قلب العاشق دليله.....د/هاشم بكري

ياعني داخله بتضحكي؟

قالت: سيد كان موصلني.

دخلت سعاد إلى علاء وجدته يتحدث في التليفون مع الدكتور اسعد وسمعته يقول: يا دكتور انا عاوز اخلص من موضوع سماح قلبي اعمل إيه انا باعت سعاد تتفق معاها على كل حاجه وأهي جات اهيه.

اسعد: أنت هاتخسر ومش هاتلاقي تراب سماح ابدًا.

علاء: القلب وما يريد.

أسعد: روح شوف اختك عملت إيه وابقى عرفني بعد ما تلفك.

علاء: عملتي إيه يا فيلسوفه؟

سعاد: صراحه يا علاء انا مليش نفس ابص في وشك يا ابني البت حاسه بكل حاجه.

علاء: المهم اتكلمي ماتنشفيش ريقى اتفقتو على إيه؟

سعاد: اطمئن قالت ال يعجبو خليه يتفق مع اخويا وابويا ويخلصونا من الشوية الورق ال رابطين علاء بيا عشان يبقى حر وربنا يرزقو بالتسعدو وتفرحو.

دار الروضة

بلع علاء ريقه وكأن حملا على ظهره قد انزاح.

اما سيد فبعد أن قام بتوصيل سعاد وعاد إلى سماح يتهلل ويغني ويقول: انا خلاص ها اتجوز وها ابطل ابص ع البنات واتجوز واتجوز..

ضحكت سماح وقالت: ابسط يا عم اللهم سهلك السناره الظاهر غمزت.

سيد وهو يهيم شوقا: يا بنت العبيطه غمزت إيه دي اصطادات اصطادات بلطيه لا يا ابو السيد بلطيه إيه بنيه.

سماح: يعني خلاص.

سيد: ايوه خلاص وعاوزين نكلمهم.

سماح: تكلم مين مش لما نخلص من موضوعي الاول وقبل أن يتكلم وقد تغير وجهه قالت: اطمن احنا اتفقنا على كل حاجه اننا نهى الموضوع وهو هايجي يتفق معاك أنت وابوك.

سيد بانسراح: كدا عين العقل هو دا الصح.

في اليوم التالي ذهب علاء إلى أبو سيد وسيد الذي ساعده في إنهاء الموضوع بسرعة وقال: اتفضل يا علاء يا مرحبا.

قلب العاشق دلييله.....د/هاشم بكري

أما أبو سيد فكانت تبدو عليه علامات الضيق والضرر
قال: احنا عاوزين نخش في الموضوع على طول من غير
كسوف، يا ابني سيد كلمني على ال أنت جاي عشانه
والموضوع قسمه ونصيب وانت ربنا يرزقك وهيا ربنا
يرزقها.

تدخلت أم سيد وقالت: مكانش العشم تعمل كدا يا علاء
بعد ال عملتو معاك سماح دي عادت الدنيا كلها عشانك.
قال علاء وهو ينظر إلى الأرض: دا نصيب يا خالتي ام
سيد.

قال سيد: حاجتك ها توصلك لحد البيت يا علاء واحنا
اهل وجيران.

وفي نفس اليوم أشيع النبأ في الحارة فبدأ كثير من شباب
يلمح لخطبتها أ يتقدم بالفعل وعلى رأسهم فاضل غريم علاء
والذي قابلها في الشارع وقال لها متهكما: مبروك يا عروسه
الا دخله ايمته؟

نظرت إليه من أعلى لأسفل وقالت: مفيش دخله يا
فاضل.

فاضل: انا مش قلنا لك انك ليا وكننت يا نن عيني هاتقعي

دار الروضة

في الغلط وهاتتشكلي في الزلط بس حبيب القلب يا عيني سابك
وملط.

سماح: وبعدين يا فاضل أنت عاوز إيه دلوقتي؟

فاضل: عاوز اشارة البدء يا روح فاضل تقولي تعالى
ابويا مستنيك تلاقيني على طول وعرض وفوق تحت باقول
شبيكي لبيكي فاضلك تحت رجلك.

سماح: خلصت كل ال عندك؟

فاضل: آه قلتي إيه؟

سماح: قلت وديني وحياة ربنا يا فاضل لو مكان فيه
راجل في الدنيا غيرك ما ها تتجوزني انا اعنس وما يتقلش
عليا انا وانت باب لوحدا لو انطبقت السما على الأرض.

فاضل وهو يحاول أن يمد يده عليها ويلين الكلام:
جربيني يا روعي وها تشوفي الرجوله والناس الكسيبه.

سماح بغضب بعد أن خلعت الشبشب: نزل ايدك يا ابن
الكلب وانا ها اعاملك بال أنت تستهاولو أنا مش واحده من
الاوساخ ال انت تعرفهم.

قلب العاشق دلييله.....د/هاشم بكري

وخلعت الشبشب وانهاالت عليه ضربا على رأسه ووجه
اجتمع أهل الحارة على الصوت وسماح تضرب فاضل أخذت
النساء سماح إلى بيتها وحضر سيد واستخرج المطواه وقال:
وحياة أمك ما ها سيبك إلا لو علمت عليك لهو أنت بتعمل
راجل على ستك يا ابن المره.

وشج وجه فاضل شجه خفيفه وفي النهاية استطاع أهل
الحارة السيطرة على الموقف.

عادت سماح إلى البيت وانهمرت في نوبة بكاء شديدة
استخرجت بها ما كانت فيه من هم، سألتها سعاد والتي كانت قد
أسرعت إلى مكان الصوت وعادت مع سماح سألتها: انتي
بتعيطي ليه دلوقت يا سماح؟

سماح: مش عارفه جسمي قايد نار.

جلس علاء وهو عائد من عمله في محطة المترو في
انتظار قطار المترو القادم الذي سيركب فيه ليعود إلى بيته،
وإذا بفتاه تجلس إلى جواره نظر إليها وأذهل دقق فيها النظر
وامسك بيدها، أصابها الذهول للحظات على كلامه وهو يقول
لها: اخيرا يا ريم لقيتك حمد الله ع السلامه صحيح صدق
الشاعر ال قال:

دار الروضة

قد يجمع الله الشئيتين.... بعدما يظنان كل الظن ان لا تلاقيا.

قالت الفتاه: إيه يا روح امك إيه إيه شئتين إيه واشتات إيه
أنت ساحر ولا إيه.

اجتمع عليها الناس سألوها: فيه إيه يا انسه؟

قالت: الأستاذ بيمسك ايدي وعمال يتغزل ويقل ادبه وانا
ما اعرفوش.

انهال عليه الناس بالسباب وحاول احدهم ضربه فسقطت
على الأرض في حاله إغماء حملوه إلى مصلى المحطة
واستطاعوا إفاقته وبمجرد أن فتح عينه قال: ريم ريم راحت
فين.

وجد ناس حوله وعلى وجهه الماء والعسكري ممسكا بيده
ويقول: قدامي يا عديم الزوق امشي قدامي.

علاء: ها نروح فين؟

العسكري: ها اعملك محضر تحرش الاستاذ عند
حضرة الضابط.

وصل علاء مع العسكري إلى الضابط وجدها تجلس

قلب العاشق دلييله.....د/هاشم بكري

عنده وتحرر محضر بالحالة اقترب منها وقال: ريم انتي
نستيني اوام يا ريم احنا مخطوبين من زمان واسألي المنطقة
الأستاذ عصام والأستاذ عجمي وعزت بتاع السمك.

أذهلت من الكلام لأن كل من ذكرهم يسكنون بجوار
سكنها وتعرفهم جيدا قالت للضابط: لو سمحت بلاش محضر
وانا متنازله.

جذبه الضابط وقال: الست سامحتك او عه يتكرر منك دا
تاني.

علاء: ماشي يا باشا.

وجرى ورائها وهو يناديها توقفت لتعرف حكايته قالت:
يا أستاذ أنت إيه حكايتك؟ حكى لها قصته وقال: عرفتني بقى انا
باحبك قد إيه وكنا متفقين كمان على ميعاد الدخلة.

تعاطفت معه وقالت: انا فعلا اسمي ريم وكنت ما خطوبه
لواحد مات في حادثه عربيه من حوالي...

قاطعها علاء وقال على الفور: من سنه بالظبط من سنه
الا انتاشر يوم.

تعجبت وقالت: فعلا أنت إيه عرفك؟

دار الروضة

قال: هو نفس اليوم ال عملت فيه الحادثه وزر عولي فيه قلب.

قالت ريم: أنت قلبت دماغي دا انا قلبت الدنيا عليه وعرفنا بعد كدا انه مات في حادثه وانا اتخطبت من بعده وفرحي بعد شهر أنت عاوز إيه دلوقت؟
علاء:مش عاوز الا اني اشوفك.
قالت ريم: بس دا ما ينفعش.

علاء: انا عامل عمليه قلب وممكن اموت في أي لحظه ماتحرمينش من طلبي الوحيد اديني رقمك وخدي رقمي وها نتواصل مع بعض.

طرق مكتب فؤاد بيه ودخل عليه الأستاذ عادل يحمل بين يديه ملفات ودوسيهات ثم أغلق الباب جيدا وقال له الدكتور فؤاد وهو بيتسم: العروسه في الطريق جهز نفسك يا عادل لدخلتها.

قال عادل: إيه المره دي.

قال فؤاد: الماده الفعاله لدوا شاح في السوق على الاخر

قلب العاشق دلييله.....د/هاشم بكري

هانجيب الكميّه ونسلجها النص واذون الصرف ها تختقي
والواد ال قاعد دا هو إل ها يسجل ويوقع على الاستلام وإحنا
يا ولاده ما نعرفش حاجه ودا الوالد ال جابو اسعد ونبقى في
السليم واشرب يا عم، بس مش كدا ولا إيه؟

عادل: على خير ه الله.

فؤاد: وبعد ما يتم المراد عاوز نسقع الدوا دا في السوق
مفيش الا شركتنا ال رسا عليها العطاء، كدا تبقى كملت.

عادل: تسلم دماغ الدماغ ثم سكت لبره ونظر الى وجه
الدكتور فؤاد وقال: انا كنت طالب سلفه يا دكتور فؤاد.

فؤاد: ليه أنت مش واخذ مكافأه سقع من قريب؟

عادل: فعلا بس انا عاوز اشتري شقه لابني خطب
وعاوز يتجوز.

الدكتور: فؤاد أنت بتلوي دراعي يا عادل ولا إيه ولا
عاوز تقول انك عاوز نسبة بس بأسلوب ما يز علنيش.

ضحك عادل وقال: اعمل إيه يا باشا دا انا حاطط نفسي
اني دبانه حضرتك تفحصها بهواك ولا ناموسه اقل شوية مبيد
حشري يقضو عليها.

دار الروضة

فؤاد: طيب سيبيني ربنا يسهل.

خرج عادل على وعد من الدكتور فؤاد بأن ينظر في موضوعه عقب الانتهاء من العملية ليبدأ في التجهيز لها.

ألح سيد على سماح في أن تفتح سعاد في موضوع الخطوبة وبالفعل طلبت سماح سعاد ذهبت إليها قالت سماح: ادخلي يا سعاد واقفلي الباب كويس.

دخلت سعاد قالت لها سماح: انتي إيه حكاياتك يا بت ما بتفكريش في الجواز ولا ايه اوة يا بت يكون البال مشغول؟

قالت سعاد: فيه بت يا سماح ما بتفكرش في الجواز؟ با فكر طبعاً بس فين العريس المناسب كل ال بيتقدم يا إما معندوش سكن ولسه ها يكون نفسه يا إما راجل كبير.

سعاد: إيه رأيك يا بت فيه عريس قيمه وسيما تور بحاله وعندو السكن ومعاه دبلوم زيك.

قالت سعاد وهي تنظر إلى الأرض مظهره الخجل: أوعه يكون.... قاطعتها سماح قائلة: هو سيد يابت حتى تكوني جنب امك وتراعيها.

قلب العاشق دليله.....د/هاشم بكري

سعاد: بس..

سماح: ما تبسببش هو ال كلمني عشان اكلمك إيه رأيك
ها ولا أخليه يرجع في كلامه.

سعاد بسرعه وخجل: خليه يكلم امي واخويا انا ها امشي
بقى انا اتأخرت وامي لوحدها.

ضحكت سماح وقالت: قال يعني البت بتتكسف قوي.

دخل سيد على سماح ليعرف منها ما دار بينها وبين سعاد
تظاهرت بالضيق وقالت: هو اسلوبك وغشمك دا لازم يخليها
ترفض.

تعجب سيد: اسلوب إيه يابت وغشم إيه انا ماعملتش
معاها إلا الأصول والواجب. أدارت وجهها لترى ردود افعال
سيد ولكنها لم تتمالك نفسها وانفجرت في نوبة ضحك وقالت:
مبروك.

سيد: تصدقي انتي بت خوخه وكلامك يجيب الدوخه
طيب ولازمته إيه مكان من الأول لازم توقعي قلبي.

عاد علاء إلى البيت وهو فايق لحد كبير اتصل به
رمزي: إيه الإخبار؟

دار الروضة

علاء: كله تمام ومفیش جدید.

رمزي: طيب خلي بالك اكيد فيه حاجه الايام دي؟

علاء: انا فعلا حاسس بحركه مش عاديه بين عادل وفؤاد.

رمزي: ازاي؟

علاء: عادل بيدخل لفؤاد كتير وفؤاد نفسه بيطلبو كتير الايام دي.

رمزي: صحح.

علاء: بس انا لو شوفت حاجه اعمل إيه؟

رمزي: كل ال عليك انك تصور المستندات الاصلية وتجبلي صورة وتلخيك أنت بعيد هو دا دورك واسعد برردو منشغل في الفرع الثاني والمشاريع الخيرية.

اتصل اسعد بسماح سألها: عامله إيه؟

قالت: يعني، وعلى فكره الموضوع انتهى بهدوء تام وكل واحد راح لحاله.

قلب العاشق دلييله.....د/هاشم بكري

أسعد وقد بدت عليه علامات الفرح والسرور: طيب
كويس مش دا ال انتي كنتي عاوزها؟

سماح: بصراحه لأ كنت اتمنى إني اكمل مع علاء بس
نصيب.

اسعد: بتحبيه يا سماح؟

سماح: احبه إيه يا دكتور دا إحنا عملنا قصة حب الناس
كانت بتحسدنا عليها كل ال يعرفونا وكانو بيضربو بينا المثل
وعندنا حته في الحاره كنا بنقعد فيها كتير مسمينها علاء
وسماح يا دكتور انا كان اهون عليا اموت وما اشوفش اللحظة
دي اللحظة ال بتتسلخ فيها روعي من جسمي وانا حيه.

اسعد: فيه حب لحد كدا؟

سماح: واكثر يا دكتور اسعد.

أسعد: إن شاء الله ربنا ها يعوضك وها يسعدك سماح
ممکن اطلب منك طلب؟

سماح: اطلب يا دكتور يا خبر دا انت تؤمر.

اسعد: تيجي تتغدي معايا بكره في أي مطعم ونتكلم شويه
انا محتاج حد يسمعني.

دار الروضة

سماح: معلش سييني كام يوم يا دكتور انا معنديش استعداد لاي حاجه.

الدكتور: براحتك.

وصلت الشحنة إلى الشركة ودخلت المخازن وطلب الأستاذ عادل من علاء تسجيل الشحنة في الملفات الخاصة بها طلب علاء من الأستاذ عادل المستندات والأذون التي يسجل منها اسم العينة والوزن وما إلى ذلك قال له عادل: سجل انا ها امليك البيانات أنا حافظها كلها وفيها هنا كمبيوتر.

علاء: حضرتك من اميته بتمليني البيانات لو سمحت هات الاذون عشان اسجل منها.

عادل: بصوت عالي قلتلك اكتب ال انا ها امهلوك أنت ما بتسمعش.

علاء: طيب وليه الغلط دا يا استاذ عادل هو انا عمري غلطت في حضرتك؟

عادل: وانت تقدر تغلط؟

علاء: طبعا لا حضرتك اكبر مني.

عادل: طالما أنت عارف كدا بتجادل ليه؟

علاء: انا آسف اعذري تعبان شويه.

عادل: خلاص عادي مفيش مشكله اكتب التاريخ والصنف والكميه و.....انطلق علاء في الكتابة حتى انتهى منها وكان يرمق ببصره خلسه لعل عينه تقع على الأذون ولكنه لم يفلح انتهى من الكتابة ورأى المكان الذي وضع فيه الأذون الأستاذ عادل وتغافل تماما كأنه لم ير شيئا، وقال للأستاذ عادل: أتفضل حضرتك تؤمر واعذرنى.

أخذ عادل الدفتر وقال لعلاء: مالك النهارده يا عم أنت مش بحالتك عموما ما تبقاش تجادل، طيب دا انا لسه مكلم الدكتور فؤاد النهارده عشان يصرفلك مكافأه.

علاء: صراحه انا مش عارف اشكر حضرتك ازاى.

عادل: يا علاء انا عاوزك تطبق ال ها اقولك عليه بالحرف لو كنت عاوز تعمر في الشركه دي ؟

علاء وهو يبتسم: إيه هو يا عمنا يا معلمنا ومهلما؟

عادل وهو يعدد على يديه: ثلاث كلمات واحد لا أرى، اتنين لا اسمع، ثلاثه لا اتكلم.

دار الروضة

انصرف عادل بعد أن اطمأن تمام الاطمئنان أن علاء لم يدخله الشك ولم يرتب في أي شيء وترك الملف الذي يحتوي على الأذن في مكتبه وترك المفتاح في الدرج بعد أن طلبه الدكتور فؤاد قام علاء على الفور وصور الأذن على ماكينة التصوير التي في مكتبه ووضعها كما هي دخل عادل عليه وهو ينزع الورقة الأخيرة كاد قلب علاء أن يتوقف عن الحركة قال له عادل: صورت الورقة ال قلتلك عليها؟

علاء: ايوه بصور لحضرتك فيها اهوه.

عادل: طيب خلص وهاتها.

علاء بعد أن بلع ريقه: من عنيا.

في الليل جلس أبو سيد وأم سيد وسيد بعد أن تناولوا العشاء وتحدثوا في موضوع خطوبة سيد لسعاد.

قالت أم سيد: مش هي دي اخت علاء ال أنت ضربت اختك علشانه؟

سيد: والله يا أما سعاد بت جدعه وأول سماح ما كلمتها ملفتش ودارت وكانت دوغري من الأول وفوق دا ودا البنات

شاريه.

أبو سيد: وانت جاهز يا عريس الغفله؟

سيد: البركه فيك معقوله يا ام سيد الراس الكبيره تبقى موجوده والصغار تدفع إيه يا جدعان هيا القوالب نامت والانصاص قامت ولايه دا كمان معاك ام سيد ام الغالي الغاليه.

أم سيد: عموما طالما سماح ال اختارتها يبقى على خيرة الله.

بدأ اسعد يفكر في حياته الخاصة وليه ما يتجوزش زي بقيه الناس قال لنفسه: انا مش عارف أنا سايب نفسي ليه من غير جواز هو انا مش إنسان ولا إيه مع إني طبيعي وطبيعي قوي الظاهر البت سماح دي حركت مشاعري، ثم يرد على نفسه سماح إيه معقول تصوم تصوم وتفطر على سماح هيا صحيح بت مجدع بس مش مناسبة وانت الف يتمانك فكر بعقلك مش قلبك يا اسعد أنت بزنس مان وراجل مجتمع انا مش عارف إيه ال جرالي.

ذهب سيد ووالده بالليل إلي بيت علاء الذي استقبلهم بترحاب كبير بعد أن أخبرته أخته أن سيد ووالده سيحضران ليلا لخطبتها لسيد قال لها علاء وهو في قمة الذهول: بتوقلي

دار الروضة

إيه سيد جاي يخطبك يا ملحاح المتلحاح إيه ال بيحصل انا مش عارف حاجه للدنيا انا ارفض سماح مش كره فيها وفي نفسي مفيش ميل ليها وأخوها ال ببيكرهني بيحي يخطب اختي.

سعاد: رحت فين يا علاء؟ علاء انا باكلمك.

علاء: ايوه معلش سرحت شويه.

سعاد: انا باقلك سيد وابوه جايين الليله يخطبوني.

علاء: لمين؟

سعاد: لسيد يا علاء يا اعني ها يكون لابوه؟

علاء: انا قلت يمكن الراجل حب يكيد خالتك ام سيد ويجبلها ضره.

سعاد: بطل تهريج بقى يا علاء انا باتكلم جد.

علاء: طيب بلاش انتي يمكن جاي يخطب امك؟

ضحكت سعاد وضحك علاء قالت سعاد: طيب ما أنت بتضحك زينا اهو يا خبر يا علاء وحشتني ضحكك من زمان.
علاء: ولا يهمك. وانخرط في نوبة ضحك كبيره قالت

قلب العاشق دلييله.....د/هاشم بكري

أمه: فيه إيه يا ولاد؟

قالت سعاد: جايلي عريس.

أمها: طيب ما انا عارفه ودي تضحك يعني.

علاء: إحنا بنضحك على بعض يا أماء، انتي موافقه يا ام
علاء؟

أمه: ايوه.

علاء: على خيره الله.

طرق الباب أبو سيد: يا ساتر يا علاء يا علاء.

جرت سعاد للداخل واستقبلهم علاء بالترحاب: يا مرحبه
يا مرحبا دا احنا زارنا النبي اتفضلوا.

جلسوا علاء: الشاي يا سعاد.

قالت أم علاء: شاي إيه ابعتها تجيب كاكولا يا ابني.

علاء: من عنيا روحي يا سعاد هاتي حاجه سقعه.

قال سيد: والله ما حد ها يجيب إلا انا.

قال علاء: شهم يا ابو السيد.

خرج سيد وعاد بالحاجة السقعه قال ابو سيد: يا أم علاء

دار الروضة

يا أستاذ علاء إحنا جايين نطلب أيد سعاد لسيد.

قالت أم علاء: خير.

قال علاء: احنا يشرفنا يا ابو سيد، سيد ما يتعيش.

أبو سيد: نقرأ الفاتحه.

أم علاء: شويه يا اخويا على مهلكو الدنيا ما طارتش.

علاء: لم نحضر اهلنا وقرابيننا وانت تجيب اهلك ونتفق.

سيد: عداك العيب يا ابو نسب بس المهم ما نأخرش انا ها
اجهز الدور الثاني وها ادخل فيه.

أبو سيد: وإحنا ها نفرش عندنا وانتو عليكو المطبخ.

علاء: ولا يهملك يا ابو سيد احنا جيران.

أم سيد: ما اتكلمتوش في الشبكة؟

علاء: ها تجيبو كام جرام.

أبو سيد: أنت عارف ال داخل على بُنا وجواز يبقى حاله

إيه؟

علاء: انا يكفيني دبلتين.

سيد: آدي الكلام الفاتحه.

علاء: احنا قلنا إيه ع الفاتحه؟

سيد: دي فاتحه صغيره لحد الفاتحه الكبيره ال هانلم فيها
الناس الفاتحه.

أم علاء: زغرتي يا أم سيد انا ما بعرفش ازغرت.

شاع الخبر في الحارة وذهب أهل الحارة إلى أم علاء
للمباركة، ونفس الحال إلى سيد وأبو وسيد ولسان حال أهل
الحارة الكل يردد هذه الكلمة: ألف مبروك وربنا يتمم بخير.

وفي اليوم التالي لتشوين الشحنة في المخازن استدعى
الدكتور فؤاد علاء ليعرف جوه وما إن كان أحس بشيء أم لا
قال له الأستاذ عادل: الدكتور فؤاد عاوزك السيد المدير
شخصيا طالبك بالاسم.

علاء وهو مخضوض: ما تعرفش عاوزني في إيه دا
بيقولو الراجل دا شديد قوي تصور يا استاذ عادل انا ماشفتوش
من يوم ما جيت ال مرتين اتنين.

عادل: دا كلام دا راجل بيقدر وراجل محترم.

علاء: ماتعرفش عاوزني في إيه.

دار الروضة

عادل: ما تخفش لما تروح هاتعرف.

وصل علاء إلى الباب سأله السكرتير: رايح فين؟

علاء وهو يبدو عليه الخوف: الدكتور فؤاد عاوزني.

السكرتير: ثواني لما اشوف عنده حد ولا لأ.

جلس علاء في انتظار خروج السكرتير الذي خرج وابلغه بالدخول دخل علاء ذهل من منظر المكتب والكراسي والأثاث تسمر في مكانه قال له الدكتور: اتفضل يا علاء الاستاذ عادل بيشكر فيك قوي ومبسوط منك وأنا كمان مبسوط منك شغال كويس وشايف شغلك صح وعشان كذا انا امرتلك بمكفأه ابقى عدي على الحسابات وخذها وهيا مكفاه ها تبسطك أنت اتجوزت ولا لسه؟

علاء: لسه يا افندم.

الدكتور فؤاد: أول ما تفكر ابقى قلبي عشان نقف جنبك.

علاء: ربنا يكرمك يا دكتور بعد اذن حضرتك.

هم علاء بالخروج وقبل أن يخرج سأله الدكتور فؤاد:

مقلتلش اخبار الدكتور اسعد إيه يا علاء؟

قلب العاشق دلييله.....د/هاشم بكري

علاء: والله يا افندم لا شفته ولا اتصلت بيه من فترة.

الدكتور فؤاد: خلاص اتفضل يا علاء.

أما سيد فالفرحه لا تسعه عاد من بيت علاء وبحث مع
أسرته كيفيه الترتيب للفرح بعد الانتهاء من البناء: يا آبا انا من
بكره ها اروح اشوف بنايين عشان ابدأ في البنا واجهز الشقه.

ابو سيد: على بركه الله الا قلبي يا واد يا سيد إيه ال فكرك
مره واحده كده بالت سعاد ماهي قدامك على طول؟

سيد: مش ها تصدق مين؟

ابوه: اوعه تقلي اختك.

سيد: هيا والله.

ابو سيد: بنت حلال والله وفيكي الخير ورفع يديه إلى
السماء وقال: يا رب ارزق سماح بنتي بعريس يهنيها
ويسعدها.

امن على دعائه ام سيد وسيد بصوت عالي وأضاف سيد:
وانا يسعدني مع سعاد بنت نعاغه قادر يا كريم.

ضحكوا جميعا واكتفت سماح بالابتسام.

رن تليفون سماح والكاميرا تستعرض اسم المتصل على

دار الروضة

شاشه التليفون فإذا به الدكتور اسعد سألها: بتعملي إيه يا سماح؟

قالت: قاعده من ساعه ما برجع من الشغل مفيش حاجه باعملها بجهاز الاكل مع امي واقعد اتفرج على التلفزيون.

أسعد: انتي شغاله في إيه؟

سماح: انا شغاله في شركه تريكو.

اسعد: فين الشركه دي يا سماح.

سماح: شركه على قدها في المنطقه.

اسعد: بقى دا كلام انتي تشتغلي في الكلام دا انتي مؤهلك إيه يا سماح معايا دبلوم فنيه.

أسعد: طيب اعلمي حسابك تجيني بكره الشركه.

سماح: ليه؟

اسعد: انتي مالك.

سماح: اسمحلي انا مش عاجزه ابقى في مكان واحد انا وعلاء.

قلب العاشق دلييله.....د/هاشم بكري

اسعد: مين ال قال اصلا انك ها تيقى في فرع واحد انتي وعلاء.

سماح: فرع إيه انا مش فاهمه حاجه.

اسعد: اكتبى العنوان دا وتكونى الساعه عشره باكر الساعه كام؟

قالت سماح: عشره.

أسعد: سلام.

سماح: سلام.

عاد علاء بعد مقابله فؤاد ورأسه تلف وهو مفقد التركيز تماما وبينما هو في محطة المترو وكعادته التي يركب منها سمع من تنادي عليه: أنت يا أنت يا..

التفت علاء فجأة فوجد مالم يتوقعه وجد ريم وهي تشير إليه ذهب إليها جريا وتخيل نفسه يرفرف بجناحيه حتى وصل إليها ووقف أمامها سألته بدلال: لقيت ال بدور عليها يا اسمك إيه؟

علاء: اسمي علاء اسمي عاءال عتاب سؤسؤسؤ علاء.

قالت ريم بدلال زائد اقعد: يا عتاب وضحكت ثم قالت

قصدي: يا علاء.

علاء: ما تيجي نشرب حاجه ولا تيجي نتغدى مع بعض.
ريم: نتغدى مع بعض انا الظاهر غلطت اني ناديت عليك
من الاساس.

علاء: انتي زعلتي ولا إيه حقك عليا بس احنا كنا هناكل
لقمه مع بعض عشان يبقى كشري بالدقة والورد.

ريم: ماشي يا عم انا عليا الفل وانت عليك الكشري ماشي
يا مزجانيجي يلا قسم يا بتاع البتاع.

علاء في نفسه: الظاهر عليها ناويه تصالحني.

ريم: علاء أنت سرحت في إيه؟

علاء: في الدنيا قصدي ماسرحتش انا معاكي دا انا حفيت
من جري وراكي ولما القاكي اسرح ياخي ها ها.

تناولا الكشري وخرجا وتمشيا معا سألها قبل أن يتركها:
ريم انا ليا سؤال؟

ريم: اتفضل يا.

قلب العاشق دلييله.....د/هاشم بكري

علاء: هيا ليه الدنيا جميله وحلوه وانت معايا؟

ريم: سيبك من المراهقه دي ويلا احنا اخرنا.

عاد علاء والفرحة لاتسعه وهو يدندن ويقول: واله
واتجمعنا تاني يا قمر والله واتجمعنا واحلو السهر.

نظرت إليه سماح وهو داخل الحارة سعيد ورأت علامات
السرور عليه وهي التي لا يخفى عليها حاله فهي تعرفه أكثر
من نفسه أغلقت شيش الشباك وقضمت أسنانها من الحسرة.

وفي الصباح ذهبت سماح إلى الدكتور اسعد في المقر
الرئيسي للشركة استقبلها بحفاوة وأجلسها في مكتبه وسألها:
تحبي تشربي إيه؟

قالت: ملوش لازمه متشكره.

اسعد دون اخذ رأيها: هاتلها عناب ساقع.

سماح: ملوش لازمه.

الساعي: أجيب لحضرتك حاجه؟

اسعد: انا هاتلي لمون.

ثم وجه اسعد كلامه إلى سماح: اتفضلي قوليلي انتي
بتاخدي كام في الشهر؟

دار الروضة

سماح: يعني الحمد لله مرتب معقول.

اسعد: معقول يعني إيه؟

سماح: يعني معقول.

اسعد: المعقول دا كام؟

سماح: ٦٠٠ جنيه.

ضحك اسعد بملئ فيه ومال برأسه للخلف على كرسية
وقال: انتي شفتي الساعي ال خرج يجيب المشاريب؟

سماح: أيوه.

اسعد: دا بياخد الف ونص.

سماح: يا خبر دا مرتب كبير.

أسعد: وانتي ها تاخدي الفين جنيه.

سماح: ليه انا ها اشتغل ساعيه ولا إيه؟

ضحكوا وقال: لا انتي ها تشتغلي معايا في السكرتارية.

سماح: بس دا مبلغ كثير وبعدين انا شغاله.

اسعد: يا شيخه حرام عليك انتي بتسمي ال انتي فيه دا

قلب العاشق دلييله.....د/هاشم بكري

شغل.

سماح: آمال إيه؟

أسعد: دا مرض.

سماح لم تستطع أن تخفي فرحتها وقالت: وها استلم
الشغل اميته؟

أسعد: من النهارده بكره ها تجيبي معاكي الاوراق
المطلوبة وها تعرفيها من السكرتارية وتستلمي شغلك.

دار الروضة

الفصل الرابع وانكشف الغطاء وعاد الحب والوفاء

دار الروضة

تم تعيين سماح في شركة السعد للادوية لتكون قريبة من أسعد بيه وعلاء اصبح في تواصل واتحاد مع رمزي لعلمهم يتمكنوا من اسقاط هيمنه الدكتور فؤاد فينتقم رمزي لنفسه وعلاء يرد الجميل للدكتور أسعد، فهل يحدث ذلك فعلا أم أنها مجرد أوهام؟ وهل تبقى علاقة علاء بسماح كما هيا انقطاع وفتور؟ وهل تتوثق علاقة علاء بريم والتي يتم بينهما التقابل والخروج معا، ويتم الزواج؟ هذا ماتسفر عنه أحداث هذا الفصل.

اتصل علاء بالدكتور رمزي الذي سر جدا عندما رأى اسم علاء على شاشة محموله وقال: ايوه يا علاء فرحني فيه جديد ولا إيه؟

علاء: طبعا فيه ويبدو أن علاء بدأ يأخذ حبوب الشجاعة بعد أن عثر على ريم واكل معها الكشري، الجماعة جابو شحنة جديدة.

رمزي على الفور: وفيه إيه في دا ماهو دا الطبيعي آمال هاشتغلوا ازاي؟

علاء: هو اندفاعك دا ال خلاهم اصطادوك طيب اصبر

قلب العاشق دليله.....د/هاشم بكري

وشوف انا هاقلك إيه.

رمزي: اتفضل يا عمي العاقل.

علاء: لما جات الطليه حبيت اخد الأذن واسجلها رفض
الأستاذ عادل وهددني وقال اكتب ال اقلك عليه بس قتلو
حاضر وعملت عبيط شال الأذن في مكتبه وقبل ما يقفل
عليها طلبو الدكتور فؤاد طبعاً جري من وساب المفاتيح في
المكتب، أنت عارف لما بيطلبو الدكتور فؤاد بيبقى حاله عامل
إيه؟

رمزي: لحد كذا تمام.

علاء: انا صورت الاذن.

رمزي: يخرب عقلك إيه الفجر والجراه دي يلا ومحدث
اخذ باله خالص؟

علاء: لأ لأنه كان مطرق ال معانا في المكتب وانا
باصور اخر اذن دخل عليا انا مش عاورف اقلك انا حصلي
إيه؟

رمزي: لو انا مكانك كان اغمي عليا.

علاء: انا بليت البنطلون المهم قعد على مكتبه وقال

دار الروضة

صورت الورقه ال قتلتك عليها قتلو باصورها حالا وانا باديه
الورقه لاحظ البنطلون قالي مال بنطلونك مبلول قتلته كبايه
الميه اتكبت عليه وانا باشرب وهو ما اهتمش بالموضوع.

رمزي: عاوز صور الأذنون دي.

علاء: لأ طبعا لازم الأول نقعد ونشوف هانعمل إيه؟

رمزي: انا تحت امرك وقت ما تحب سلام.

علاء: سلام.

أما سيد فقد بدأ في البناء والشغل على ودنه كما قال هو
لسعاد في احد الخروجات عندما قالت: له انا شايفاك مستعجل
قوي يا سيد؟

سيد: آمال يا بت دا انا مخلي الشغل على ودنه.

سعاد: إيه ال مصربعك كدا الدنيا طارت.

سيد: طارت وفارت وهاجت دا انا يا بت يا سعاد كنت
اهبل هبل انا مش عارف انا ازي ماكنتش واخد بالي منك؟
سعاد: ها اعملك إيه اعمي القلب.

قلب العاشق دلييله.....د/هاشم بكري

سيد: مع ان نظري سته على ستاشر.

سعاد: باقلك اعمي القلب.

سيد: يا بت والنعمة الشريفة دي وهو يمस्क يدها ويحلف
بها لسه حاططلو قطره النهارده.

اتصل علاء بأسعد ليطمئن عليه قال: دكتره اخبار
حضرتك عامل إيه حضرتك نسييتي ولا إيه؟

اسعد: مين ال قال كدا انا متابع اخبارك من سماح أنت
ماتعرفش إن سماح اشتغلت معايا في الادراه هنا؟

علاء: صراحه اول مره اعرف.

اسعد: دا الكلام دا من حوالي ٥ ايووم.

علاء: والله فيك الخير عاوزين نشوف حضرتك وايه
رأيك في شويه فول عندنا؟ اسعد: من عنيا والله لاجي قريب
وسعاد عامله إيه وامك عامله وصحتك وال بالي بالك عامل
إيه؟

علاء: لقيتها يا دكتور واتغدينا مع بعض الاسبوع ال فات
بدأت تحس بيا وشكلها كدا ها تنسجم معايا.

الدكتور: ربنا يوفقكو.

دار الروضة

علاء: ها نشوف حضرتك قريب.

اسعد: قريب جدا قريب جدا سلام.

تقدم في هذه الفترة احد الشباب لسماح لخطبتها وهو احد زملائها في المشغل وذلك في أحد الليالي بعد العشاء وهم جلوس سماح وسيد ووالدها ووالدتها يتحدثون في تجهيز سيد والمصاريف وما إلى ذلك طرق سامي الباب ففتح سيد سألته الشاب: مش دا بيت عمي ابو سيد؟

قال سيد: على الفور وانا سيد.

ضحك الشاب وقال: وانا بقى يا سيدي ابقى سامي.

قال سيد: سامي مين اكيد سامي العدل وجاي تصور هنا ولا إيه عموما يا مرحبا أنت تشرف اتفضل.

دخل سامي جلس استغربوا لزيارته قال سامي: انا طبعا عارف أنت بتسألوا انا مين وجاي ليه انا كنت زميل الاستاذ سماح قبل ما تسبب المشغل وجاي طالب القرب منك في سماح.

سأله سيد: وسماح عارفه انك جاي؟

سامي: صراحه لأ.

دخلت سماح رحبت به وسلمت عليه.

قال ابو سيد: يا ابني سماح بعد موضوع علاء رافضه الجواز خالص واتقدمها اكثر من واحد وهي مش راضيه.

سامي: عموما انا جيت ومنتظر الرد طبعاً مش الليله.

قالت سماح: يا استاذ سامي متغلبش نفسك الموضوع دا قسمه ونصيب وانا ما بفكرش فيه الايام دي خالص.

سامي: طيب ماتتسر عيش وانا منتظر الرد بعد اسبوع تكونو فكرتو في الموضوع سلام عليكم.

أحست سماح بعد خروج سامي بطعنه كبيره في قلبها قالت لنفسها: يا ربي بعد الفتره دي كلها وكتب كتابي وحي لعلاء ال مش عاوز يفارقني بالعكس دا بيزيد ابقى معروضه كدا للعرسان ارحمني يا ربي ياتنسولي يا ترزقني بحد غيرو.

دخلت عليها أمها: إيه الحكاية يا بنتي انتي هاتفضلي ترفضي دا ودا لحد ما سوقك يولي مالو الشاب بتاع النهارده وانت عارفه ان موضوع علاء مفيش منه رجا.

سماح: يا أما انا ما بعملش كدا عشان علاء انا مليش نفس

من الجواز خالص.

أمها: ربنا يهديكي يا بنتي.

اتصل علاء بريم وطلب مقابلتها لكنها اعتذرت وقالت:
ما تتعودش على كدا يا حبيبي انا خرجت معاك المره ال فانت
عشان كنت مضايقة شويه وحببت اغير جو، بس ما تاخذش
على كدا.

علاء: والمره دي كمان اعتبري نفسك مضايقه وعوزه
تغيري المطعم.

ريم: اذا كان كدا يبقى موافقه.

خرجت ريم معه سألته السؤال الممل: أنت عاوز مني
إيه؟ انا قلتلك اني مخطوبه واني ما انفعش ليك.

علاء: طيب ليه؟

ريم: عشان يا علاء من الاخر انا ما ابحبكش سمعت ما
باحبكش.

علاء: بلاش الكلمه دي عشان خاطري.

ريم: ما هيا دي الحقيقه واخرجت سيجارة واشعلتها.

علاء: بس انا شايف غير كدا.

لحظات ودخل المطعم الدكتور اسعد ومعه سماح قالت
سماح للدكتور اسعد: بص يا دكتور شوف مين الل قاعد في
الركن ال هناك دا؟

قال اسعد: مين؟

قالت: مش ها تصدق بس بوص.

نظر الدكتور اسعد فرأى علاء ومعه فتاه صارخه الجمال
اقترب منه وقال: علاء يا محاسن الصدف إيه ال بيحصل دا؟
قال علاء بعد ان نظر ووجد سماح مع الدكتور: مفيش
دي ريم ال كلمتك عليها. اسعد: الف مبروك صراحه لايقين
على بعض.

علاء: مش سماح ال معاك دي؟

اسعد: آه هيا ونادى على سماح تعالى سلمي على علاء.
أنت وعينها تخرج شررا سلمت بتعالى بعض الشيء
ودون إكتراس وذهبت إلى التريبيه التي ستجلس عليها، قال
اسعد لعلاء والذي كان قد انتهى من تناول الطعام ويهم
بالمغادرة: ما تحاسبش.

علاء: يا دكتور.

اسعد: قللتك ما تحاسبش.

علاء: حضرتك تؤمر يا دكتور.

اسعد: سلام.

علاء: سلام.

خرج علاء مع ريم سألته: مين دا ومين ال معاه؟

هم علاء بالكلام وقبل ان يجيب قاطعته ريم: بس لا يقين
على بعض قوي ربنا يخليهم لبعض.

علاء: بس دول مش مخطوبين لبعض دا مجرد واحده
شغاله عند واحد مليونير كبير قوي تسمعي عن شركه السعد
للادوية؟

ريم: وفيه حد ما يسماش عنها دي عربياتها ماليه البلد
هو دا بقى صاحبها يا خبر وانت تعرفو منين يا علاء؟

علاء: دي حكاية كبيره..

كانت سماح تأكل مع اسعد وعقلها في علاء ومن مع

قلب العاشق دلييله.....د/هاشم بكري

علاء سألها اسعد: مالك. سماح: مش عارفه مالي؟

أسعد: بتفكري في ال مع علاء؟

سماح: صراحه آه مين دي وعرفها ازاي انا ملاحظه انه
ها يطير بيها وهي دلقيه. ضحك اسعد وقال: وهيا إيه؟

سماح: دلقيه يا عني منافضاله.

اسعد: انا ملاحظ انها مش مهتميه بيه بس هيا دي ال كان
عمال يدور عليها في الشوارع لحد ما عتر فيها صدفه ودي ال
قلبو الجديد كان بيحبها قبل قلب القديم ال كان بيحبك ومات
واندفن واندفن معاه حبك.

سماح: ممكن اسأل حضرتك سؤال محرج شويه؟

أسعد: اتفضلي أنت ليه ما اتجوزتش لحد دلوقت مع انك
مش ناقص حضرتك حاجه وبنات الدنيا كلها مش مصر بس
تتمناك؟

اسعد: إيبيبيه متلقبش المواجه.

سماح: انا عاوزاك تحكي.

أسعد: مانتش ملاحظه اننا اتأخرنا؟

سماح: شكلك مش عاوز تحكي؟

دار الروضة

الدكتور اسعد: صراحه آه بس او عدك احكيلك في مره
تاني.

سماح: مفيش مرة ثانية ولا تالته يا دكتور.
أما علاء فقد الحت عليه ريم حتى قال لها: الراجل دا هو
ال كان ليه الفضل بعد ربنا اني قاعد معاكي دلوقت؟
ريم: احكي على طول يا علاء من غير ما تعلق انا
مشتاقه قوي للحكاية.

علاء: في يوم وانا طالع من الشغل.....
وقص عليها ما حدث مع الدكتور اسعد قالت ريم: علاء
انا عاوزة منك رقم الدكتور اسعد: علاء ليه؟
ريم: احنا ماتعودناش ع الاسئلة ولا عاوز تزعل ريم
حبوبتك؟

علاء: انا باسأل بس.
ريم: علاء نورلي البرين (يعني المخ) يانور العين وبلاش
تسأل كتير عشان ماتحرقش الفطير.
علاء: ماشي يا بتاع الفطير خدي الرقم.

قلب العاشق دلييله.....د/هاشم بكري

ريم: يلا بقى باي يا عالول.

عاد علاء كعادته وجد أمه جالسه في مكانها سألها عن
سعاد قالت: راحت مع سيد يشترو شوية حجات.

علاء: زي إيه؟

أم علاء: زي الحجات وانا ايش عرفني بحاجات
العرايس.

علاء: ليه يا أما انتي ماتجوزتيش قبل كدا ؟

أم علاء: والنبى يا ابني ماتجوزت من ييجي ثلاثين سنه
وماتجوزتش الا مرة واحده، شد انت حيلك عشان بعد جواز
اختك نجوزك.

علاء: انا حكايتي حكاية يا ام علاء الاول تنتهي من
موضوع سعاد وانا على المهل.

أما اسعد بعد أن عاد إلى الفيلا وجلس يشرب فنجان قهوه
طلبه من احد الشغالين وهو يشاهد التلفزيون رن تليفونه
المحمول نظر في الشاشة فقرأ بدون اسم فتح سمع صوت
حريمي: الو الدكتور اسعد؟

اسعد: ايوه انا الدكتور اسعد.

دار الروضة

المتصلة: حضرتك متعرفنيش.

اسعد: صراحه محصليش الشرف.

المتصلة: ليه هما الدكاتره ورجال الاعمال دايمًا بينسو

كدا؟

اسعد: بس انا ما عرفش حضرتك عشان انساكي.

المتصلة: يا خبر يا دكتور لحقت تنساني.

اسعد: الظاهر حضرتك طلبت الرقم غلط.

ريم: مين ال قال مش حضرتك الدكتور اسعد عبد الهادي
صاحب شركات.....

أسعد: آه يا ستي.

المتصلة: هو ال انا طالباه.

أسعد: يا ستي انا عاوز استأذنك عشان هنام.

المتصلة: طيب انا آسفه زي ما قالولي ان قلبك قاسي.

أسعد: يا ستي قوللي انتي عاوزه إيه والا هاضطر اقفل
السكه.

قلب العاشق دليله.....د/هاشم بكري

تظاهرت بالبكاء وقالت: حد بيعمل كدا في ناس بستتجد
بيه خلاص انا عارفه اني مليش حظ تصبح على خير.

اسعد: وانتى من أهله، إيه يا ربي الناس دي انا ما شفتش
كدا قبل كدا.

اتصل رمزي بعلاء: إيه يا عم علاء أنت فرحتني وفكيت
صواميل دماغي وسبتها مفكوكه مش عاوز تربطها.

علاء: اصل انا مش عارف مقاس مفاتيحك كام يا عم.

رمزي: علاء أنت وعدتني بإنك تجبلي الورق ونفضتلي.

علاء: معاش ال ينفضلك يا دكتره يا تحت سكره.

رمزي: طيب احنا عاوزين نتقابل الليله.

علاء: خرينا لبره الساعه أربعه في نفس المكان.

أما سماح فبعد أن عادت وسألت عن سيد قالت لها: امها
دا راح هو وعروستو يشتري شويه طلبات.

سماح: يا رب اسعدهم وهنهم ببعض سعاد بت مجدع
وتستاهل كل خير.

وبينما تتحدث سماح هيا وأمها دخل سيد ومعه بعض
أكياس الفاكهة سألته سماح بتهريج: كنت فين يا صايع؟

دار الروضة

سيد: يا اعني ما قلتلكيش إني كنت بنوع وبشهيص وبطبع
الطباع قبل ما تاكلها السباع.

سماح: إيه يا ابني اللغة ال أنت بتتكلمها دي أنت جايها
منين؟

سيد: من سوق الجمعه وسواعي سوق الحد.
سماح: وسواعي سوق الهبل، قلبي يا حايتها اشتريتلها
ايه؟

سيد: انساني وخد عنواني عشان انت مغلواني.
اخذت تضرب فيه بيده وهو يضحك وهي تزداد وامها
تتظر اليهما والمشاعر تتضارب في قلبها تفرح لابنها أم تحزن
على ابنتها.

ذهب بالفعل علاء لمقابله رمزي في الموعد والمكان
ومعه صورته من الأذن قال رمزي: الله عليك هو دا الشغل
وهو دا رد الجميل للراجل ال ربنا كتبلك العمر على اديه انا
بقى عاوزك تتابع مع الدكتور كمال وتحط ايديك في ايدو وهو
هاينورك على حجات كتير طيب يا فؤاد الكلب أنت وعادل

قلب العاشق دلييله.....د/هاشم بكري

فاضل على الحلو دقه. علاء: إيه المطلوب؟

رمزي:المطلوب تقلي أنت سجلت دا في دفتر إيه دي
حاجه، الحاجه الثانيه بيانات التسجيل.

علاء: مش هانبغ الدكتور اسعد؟

رمزي من الفرح اخذ في الغناء وقال: اسعد يا اسعد مين
قساك عليا ليه ترضى بهواني وتنسي ال بيا.

علاء: أنت حصلك حاجه يا دكتور؟

رمزي:ايوه حصلي من الكلاب ال شو هو صورتي
وطردوني وواكلين الراجل عارف عادل دا ساعة ما دخل
الشركه كان لابس قميص الياقة بتعته متاكله.

علاء: دا ركب عربيه.

رمزي: عربية يا ابني عادل عنده شقتين تمليك سمعت
شقتين إيه تمليك.

علاء: طيب وليه ما تبلغ عنه بتعا من اين لك هذا؟

رمزي: اصبر انت عارف يا علاء انهم اتسببو ان
خطيبتني تسيني.

في اليوم التالي طلب الدكتور اسعد سماح والتي بدأ

دار الروضة

ينجذب إليها كثيرا في مكتبه وحكى لها ما حصل في المكالمة الليلية قالت: له اكيد واحد عاوزه من حضرتك حاجه او واحده عاوزه ترمي نفسها على حضرتك.

اسعد: انا مش عارف انا بقيت برتاح للكلام معاكي ليه؟

سماح: دا من زوق حضرتك بس يا دكتور تؤمر بحاجه.

خرجت سماح سألتها احد الموظفين: مقلتيش الدكتور كان عاوزك في إيه يا سماح؟

سماح: لا مفيش كان عاوز ملفات.

الموظفه: ملفات بس انتي مش ملاحظه يا سماح ان الدكتور اسعد بقى بيطلبك انتي بالذات كتير واي حاجه يعوزها ما بيعتش الا ليكي انتي؟

سماح: والله هو حر والسؤال دا تروحي تسأليه ليه هو مش ليا انا ويا ريت يا جماعه تحترمو نفسكو وبلاش التلميحات ال مش كويسه دي.

أنخرس الكل وخاف من قربها من الدكتور اسعد لربما توغز له بشيء من كلامهن فقالت: إحداهن احنا بس حبينا

قلب العاشق دليله.....د/هاشم بكري

نظمن ليكون فيه أي مشاكل ولا حاجه نساعدك في حلها.

سماح: متشكره انا باعرف احل مشاكلي كويس.

صادف خروج الدكتور اسعد خروج سماح وزملائها

فقال لسماح بعدما اشار اليها ونادى عليها من بينهن: سماح.

فقالت لها احدى الزميلات: المدير بينادي عليك يا

سماح.

ذهبت سماح وقاموا بالغمز من ورائها قال لها أسعد:

اركبي اوصلك في طريقي.

قالت: متشكره اتفضل حضرتك انا ها امشي مع زمائلي.

قال اسعد: قلتك اركبي انتي مكسوفه ولا إيه؟

سماح: لا يافندم وها اتكسف من إيه؟

اسعد: اركبي يا شيخه.

ركبت وانطلق بها واقترب منهن وقال: حد فيكو عاوز

حاجه ولا في طريقي بيحي انا اوصلو معايا؟

قالت الموظفات في صوت واحد: شكرا يا افندم احنا

طريقنا مختلف.

دار الروضة

قال علاء لرمزي قبل أن يتركه: أنا من رأي ندي صورة
من الورق دا للدكتور اسعد.

رمزي: أنت اتهللت اصبر اصبر .

بدأت ريم في نصب شباكها حول الدكتور اسعد وحاولت
أن تستخدم علاء كسلم للتسلق به إلى ما تريد من اسعد اقتربت
من علاء اتصال كل لحظه بدأت تغرقه بكلمات الحب
المصطنع تتصل وتقول: انا مضايقه قوي عاوزه اخرج معاك
شويه أنت بقيت بالنسبالي كل حاجه وبالمرة نورو ونروق
عندك مانع نتغدى مع بعض النهارده.

ألقته له وانتظرت الرد لعله يقول لها المكان الذي ترنو
إليه دون أن تطلب فقال علاء: نتغدى مع بعض.

ريم: إيه رأيك يا علول في المطعم بتاع المره ال فاتت
مطعم نضيف ومستوى الخدمه فيه على ورخيص.

علاء: رخيص إيه دا نار انتي عارفه انا دفعت كام المره
ال فاتت قاطعته قائله:سؤ سؤ سؤ أنت بتستخسر في حبيبك
عزومه ثم قالت بدلال: خلاص بلاش انا مش عاوزه وبعدين يا
حبوب مش انت ال دفعت انت ناسي ان الدكتور هو ال دفع.

قلب العاشق دلييله.....د/هاشم بكري

علاء: خلاص يا ستي انا ها اوديكي بكره المطعم ال
انتني عاوزاه.

ريم وهي على نفس نبرة الدلال التي تتحدث بها: لو مش
عاوز خلاص أو أقلك على حاجه أحسن اعزمني وانا ادفع
الحساب إن كنت تقبل على نفسك كدا انا معنديش مانع.
علاء: ما تقليش كدا رقابتي سداده.

ريم وهي تتظاهر بالبكاء: الله يرحمك يا أكرم ما كنش
بيعز عني حاجه.

علاء: قلتلك يا حبيتي خلاص انا تحت امرك.

طلب رمزي الدكتور كمال ليتحدث معه في الأوراق التي
اخذ صوره منها من علاء قال كمال: كدا شغل صح تحت ادينا
الدليل ال نقدر نتحرك بيه المره دي لو ما قدرناش نحبك
الموضوع صح مش هيرحمونا.

رمزي: كلامك صح احنا لازم نسكنهم بالمسكنات قبل ما
نفتح بطنهم عشان نعملهم البتر وهم مبتسمين وما يغرقنواش دم
وما يرفسوش في وشنا.

كمال: كلام دكاتره.

دار الروضة

رمزي: مش كدا ولا ايه؟

أما سماح فاتصلت بالدكتور اسعد وقالت: له يا دكتور انا
عاوزه اقلك على حاجه يا ريت يا دكتور تقدر فيها كلامي.

الدكتور اسعد: اتفضلي ولو اني حاسس بالهاتفوليه.

سماح: يبقى يادكتور ها تقدر كلامي الناس يا دكتور
وبالذات الزملا بدأوا بتكلموا على، وسكتت لحظه.

اسعد: كملي بيتكلمو على ايه؟

سماح: بيتكلمو يعني على ان حضرتك بتطلبني في
مكتبك كتير واني ركبت معاك.

ضحك الدكتور اسعد وقهقه وقال: هو دا يا ستي الحساسه
ال مزعلك؟

سماح: ودا يا دكتور ما يزعلش؟

اسعد: طبعا ما يزعلش الناس كدا كدا بتتكلم ولو علقنا في
كلامهم محدش ها يخرج من بيته.

سماح: بس انا بنت يا دكتور والبنت ملهاش الا سمعتها.

قلب العاشق دلييله.....د/هاشم بكري

أسعد: انا با ستغرب انتي بتتكلمي ازاي وإحنا في القرن
الواحد وعشرين وانت ست موظفه سيبك سيبك من الكلام
الفاضي دا وركزي في شغلك أحسن واعرفي إن أي حد ملوش
أعداء يبقى فاشل.

أما سعاد فقد اشتكت لامها من إهمال علاء لها وقالت: يا
أما انتي مش شايفه إن علاء مجابليش حاجه خالص والفرح
قرب، سيد خلاص قرب يشطب الشقه.

أمها: ماتخافيش اخوكي راجل مش ها يدخلك وناقصك
معلقه.

ذهب علاء وريم إلى المطعم التي ظنت ريم أنها ستجد
اسعد فيه وعلاء كان يخشى الذهاب إليه حتى لا يرى سماح فيه
لم يجد بالطبع سماح ولا اسعد تضايقت ريم جدا وقالت بعد
تناول الطعام: المطعم دا بقى مقرف يا ريتنا ما جينا إحنا مش
هانيجي المطعم دا تاني.

علاء: ما انا قتلتك انتي ال دماغك ناشفه.

ريم: خلاص خلاص، علاء انا عاوزه اسألك سؤال أنت
بتحب سماح؟

علاء: إيه السؤال ال عيان دا انا لو بحب حد غيرك كنت

دار الروضة

لفيت وراكي في الشوارع لحد ماليتك واياه ال فكرك بالسؤال
دا دلوقت؟

ريم وهي تهز رأسها: آهو مجرد سؤال خطر على بالي
ثم واصلت كلامها وهي تهز رجليها وتمد شفيتها: يلا خرينا
نروح.

علاء: لسه بدري.

ريم: قتلتك يالا انا اتخنقت.

حاولت سماح أن تنام بعد مكالمتها للدكتور أسعد دخلت
في سريرها ولكنها فشلت أخذت تعيد بعض ذكرياتها مع علاء
خاصة في اليوم الذي دخلت فيه السينما مع علاء وشاهدو فيلم
رومانسي والبطل يضحى من أجل البطلة بوظيفته قالت سماح
لعلاء: فيه حد ممكن يعمل كدا يا علاء؟

فرد عليها علاء: ودي تضحيه انا ممكن اضحي عشانك
بقا.

سماح: وهي تضحك بقا ولا بكي.

قال علاء: بقا يا عني بقلبي يا قلبي عارفه ليه؟

قلب العاشق دلييله.....د/هاشم بكري

سماح: وهي تضع رأسها على كتفه ليه يا.....وتتهدت
وسكتت.

علاء: عشان أنا كذا ابقى ضحيت بيكي.

سماح: دمك ثقيل.

علاء: يا بت أنت ناسيه انك قلبي وروحي ودمي.

أخذت تضرب في كتفه بهدوء حتى قال من يجلس إلى
جوارهم: إيه الحكاية ماتقوموا تحبوا بره الدنيا دي كلها مش
مكفياكم.

فاقت سماح ومسحت دموعها وأخذت تضرب في الحائط
بيديها وتقول: ليه ليه علاء قلبو يتخلع واتخلع معاه وانا قلبي
يموت بالحيا ويفقد الإحساس يا ريتني أموت.

اتصلت ريم بالدكتور اسعد وطلبت مقابلته قال: اسعد
طيب حضرتك مين ها تعرفني اول ما تشوفني.

أسعد: طيب مقلتيش ها اقبالك فين والساعة كام؟

ريم: الوقت والمكان ال يناسب حضرتك.

اسعد: ممكن سؤال.

ريم: اتفضل.

دار الروضة

أسعد: انتي جبتي رقمي منين؟

ريم: برودو ها تعرف لما نتقابل.

أسعد: خلاص نتقابل بعد بكرة الساعة أربعه يناسبك؟

ريم: يناسبني.

أسعد: فين؟

ريم: في أي مكان يناسب حضرتك.

أسعد: ممكن نتقابل في الحديقة الدولية لو مكانش عندك مانع.

ريم: مفيش عندي أي موانع.

اصطحب الدكتور فؤاد عادل في جوله تفقديه في الشركة وكله زهو وغرور بما تسير عليه الشركة تحت قيادته مر على بعض المعامل: ها يا دكاتره اخباركو إيه؟ الدكاترة: كله تمام يا دوكتور والبركه في حضرتك.

مر على المخازن اطمأن على العينات يمر عليها ويترك على كل صندوق بيده ويقول لعادل: خليك على طهارة عشان هانغسل المرحوم قريب وانتى ال هاتصلي عليه صلاة الجنازة.

قلب العاشق دلييله.....د/هاشم بكري

عادل: وانا جاهز للصلاة بس اعرف الميعاد.

الدكتور فؤاد: ها تعرفو قريب بس ربط مع الحانتويه
يجهزو المدافن والمقرئين والصيوان.

قال عادل: وحضرتك اكيد ال ها تقبل العزا في المرحوم؟
فؤاد: وفيه حد غيري ينفع ياخذ العزا.

لاحظ علاء أن فؤاد وعادل يمرون راقبهم من بعيد هو
والدكتور كمال فلاحظ أنهم يمرون على المخازن التي توجد
بها المواد التي سيتم توزيعها.

عرف علاء والدكتور كمال أن موعد التسليم قد اقترب
فقرروا التحرك ولكن اختلفوا في الكيفية التي يتحركوا بها قال
كمال: إحنا نشوف رمزي ونتفق على الطريقة والخطه بس
لازم تكون بأسرع ما يمكن.

علاء: فعلا الوقت مش في صالحنا.

ذهب اسعد إلى الموعد المحدد ودخل الحديقة وانتظر
هناك وما هي إلا لحظات حتى رن تليفونه: الو الباشا.

أسعد:مين؟

ريم: انا ال أنت جاي تقابلها.

دار الروضة

اسعد: طيب انا وصلت وقاعد على تربيذه في مكان قاطعته قائلة: ما تكملش انا شايفاك وثنواني اكون عندك.

بالفعل أغلق محمولة وما هي إلا لحظات حتى أقبلت فتاه في أوائل العشرينات من عمرها صارخة الجمال تمشي وتتمايل بأنوثة طاغية ودلال مبالغ فيه ومكياج مبالغ فيه وصلت إليه سلمت عليه وقالت مباشرة: انا ريم ال بتتصل ببيك وحضرتك غني عن التعريف.

دكتور اسعد: اتفضلي ويا ريت تقليلي انتي عاوزاني في إيه؟

ريم: أنت مش ناوي تسقيني حاجه ولا إيه ولا الاكل والشرب والخروج لسماح بس.

اسعد: انا حاسس إنني شفتك قبل كدا مش انتي؟

قالت على الفور: ايوه انا فعلا ال كنت في المطعم مع علاء.

أسعد: خلاص افكرت وحضرتك عاوزه إيه؟

ريم: مش قلت ها تسقيني حاجه الاول.

قلب العاشق دليله.....د/هاشم بكري

أسعد: تشربي إيه؟

ريم: اشرب لمون.

أسعد: جرسون اتنين لمون.

أتى الجرسون بالليمون وسألها أسعد مره ثانيه: حضرتك
عاوزه إيه؟

ريم: انا مش عاوزه أنت ال مخدوع وجايه ابصرك
بحاجه خطيره وفخ منصوبلك.

أسعد: منصوبي انا؟

ريم: ايوه طبعا.

أسعد: ومين وليه وانتى..

قاطعته قبل أن يكمل الكلمة قائله: وانا مصلحتي إيه انا ها
اقلك ولما تعرف الحقيقة أنت ال ها تقدرني.

أسعد: اتفضلي قولي.

ريم: طبعا أنت اكثر واحد عارف ظروف علاء واكثر
واحد احسنت ليه.

أسعد: مش كدا طبعا انا صححت غلط ارتكبته مش اكثر.

دار الروضة

ريم: دا مع علاء وال بتعملو مع سماح تسميه إيه؟

أسعد: وانتى مالك انتى جايه تحاسبيني؟

ريم: معاذ الله يا دكتور يا دكتور دي تمثليه بيعملوها عليك والدليل إن سماح اتصلت بعلاء وهيا ال عرفتو انكو رايحين المطعم وبالتالي علاء اخدني على نفس المطعم.

أسعد: ودي فيها إيه؟

ريم: فيها إنهم يبينولك إنهم منفصلين وعلاء كارهاها وحضرتك تحن ليها بطيبة قلبك وتتجوزها وهيا ملمسه مع علاء.

أسعد بسخريه: وبعدين؟

ريم: شكلك مش مصدقني.

أسعد: شربتني اللمون خلصتي ال عند؟

ريم: آه.

أسعد: بعد إذنك وشكرا على نصايحك.

وتركها وانصرف ولم يقتنع بكلامها وقفت في حالة ضيق

قلب العاشق دلييله.....د/هاشم بكري

شديد وهي تنفخ وتقول عالم غريب ناس الدنيا مدياها كل حاجه
وناس الدجنيا واخده منها كل حاجه حاجه تقرف.

ذهب سيد والذي يسابق الزمن لينتهي من التجهيز لفرحه
هو ووالده واتفق مع نجار موبيليا الحارة الذي يجهز كل
عرائس الحارة تقريبا واتفقا معه على عمل الجهاز ثم خرجا
من عنده إلى علاء طرق سيد الباب ثم نادي على علاء من
الخارج: علوين علوين.

سعاد: كلم يا علاء دا سيد.

علاء بمكر: سيد مين؟

أم علاء: سيد بتاع الروبابكيا.

ضحك علاء وقال: ادخل يا بتاع الروبابيكيا.

قال سيد وهو يضحك: بكيا بكيا.

علاء: اتفضل يا حج أنت معاك الحج اتفضلو يا مرحبا
اعملي الشاي يا سعاد لا تعملي إيه دانتي تلاقيكي عملتيه.

سيد: شوف يا ابو نسب، الحج النهارده جاي يا اخويا
عشان يحدد معاك اليوم ال ها اكمل فيه نص ديني.

علاء: انا جاهز اليوم ال يناسبكو انا تحت امركو.

دار الروضة

اتفقوا على تحديد يوم الزواج بعد ١٥ يوم وبعد تحديد
الوعد قال أبو سيد: انا ماشي هاتيحي معايا يا سيد ولا قاعد
شوية.

سيد: مع السلامة يا حج عاوزين نبقى نشوفك ما تقطعش
الجوابات.

أم علاء: بيقلك ماتقطعش الجوابات.

علاء: إيه يا حجه انتي عينك شرحت في الراجل ولا إيه
شكلك عاوزة تلفي عليه.

سيد: تلف على مين يا عم دا ام سيد عامله زي الديب
الكاسر.

أبو سيد: اسكتي يا ام سيد اليعال ها يعلمونا مسخه.

أم علاء: ليه يا ابو سيد هو انت تطول عموما أنا ساكتة يا
اخويا من غير ما تقول.

سيد: وأنت عامل إيه يا علاء في شغللك وصحتك عامله
إيه؟

علاء: الحمد لله ربك ساترها.

قلب العاشق دليله.....د/هاشم بكري

أما أسعد فلم يتوقف عن طلب سماح واستدعائها الى مكتبه وفي احد الأيام طلب اسعد سماح في مكتبه قالت: ايوه يا افندم حالا واكون عندك.

قالت إحدى الزميلات: الحقي يا اختي ما تأخريش اكيد فيه حاجه مستعجله.

وقالت الثانية: انا عارفه إحنا ما بيطلبناش ليه جاتنا نيله في حظنا الهباب.

قالت سماح بعد أن تعودت على هذه اللهجه وهذا الأسلوب والذي يبدو انه أصبح لا يضايقها: جاتكو نيله ها يعمل بيكو إيه دا انا لو مكان اجوازكم كنت..

رد احدهن: كنتي عملتي إيه؟

سماح:كنت كنت كنت .

إحداهن:كنتي إيه؟

سماح وهي تضحك بسخرية: كنت بعتكو لبتاع الروبايكيا، ولا أحسن بعتكو في السلخانه ولا الاحسن كنت اتجوزت عليكو.

قالت الثانية: اكيد ال بالي بالك.

دار الروضة

سماح: دا بعيد عن شنبك ال مش هاتشوفيه لحد ما تموتشي.

دخلت سماح على اسعد وهي مبتسمة على غير عاداتها سألتها: خير على فكره أنتي بتبقى حلوه قوي وانتي بتضحكي تحسي إن وشك بينور.

سماح: تؤمري.

أسعد: مفيش عندك استعداد لسهره الليلة؟

قالت سماح وهي متعجبة: ل إيه سهره دا حضرتك عاوز سيد اخويا يبج بطني بجيج.

اسعد: بلاش سهر إيه رأيك في فسحه بعد الشغل بعد الشغل إيه روعي هاتي شنطتك وتعالى نخرج نتمشى شويه ع النيل.

سماح: حضرتك بتتكلم بجد؟

اسعد: ودي فيها تهريج.

سماح: يا دكتور.

اسعد: مفيش يادكتور انا نازل قدامك.

قلب العاشق دلييله.....د/هاشم بكري

ذهبت سماح لتحضر الشنطه لم تسلم من تكمله الغمز
واللمز.

اجتمع رمزي وعلاء وكمال في شقة كمال بعد أن اكد
رمزي على كمال أن يخلي لهم الشقة بأن يرسل زوجته وابنه
الى شقة والدها ضمانا للسرية والكتمان، اجتمعوا ومعهم
الأوراق بعد أن تأكد علاء أن موعد التسليم خلال يومين على
الأكثر قال كمال: انا من رأيي إننا نقول للدكتور اسعد ونسلمه
الورق وهو يتصرف بمعرفتو وإحنا نأمن أذى فؤاد.

رمزي: وانت إيه رأيك يا علاء؟

علاء: انا مع رأي الدكتور كمال؟

رمزي: غلط انتو الاتنين تبقو ماتعرفوش الدكتور اسعد
ولا الدكتور فؤاد ولا الدكتور عادل قصدي طبعاً الاستاذ عادل
احنا نسلم الورق للبوليس ليه قولولي ليه؟ علاء وكمال في نفس
واحد: يا ابو العريف ليه يا قاطعهما قائلًا: ارجوكو مش عاجز
تهريج لو سلمنا الورق للدكتور اسعد الموضوع ها يتلم وقعدت
صلح واحنا ال هانشيلها وهيطلعونا قصدي ها يطلعوكو أنتو ال
ولاد ستين كلب وفؤاد خضره الشريفه وعادل الزير سالم.

كمال: رأيك صح فيه في الميه صدق ال قال ال تلسع من

دار الروضة

فؤاد ينفخ في عادل لا إحنا نسلم صورة منها للبوليس ونخلع والبوليس بعد ما نعرفه الميعاد يتصرف. رمزي بزهو استعار كلمه الدكتور فؤاد: مش كدا ولا إيه؟ هانت يا فؤاد الكلب أنت وعادل النتن واخذ حقى وافضحكو زي ما فتضحتوني.

خرج اسعد وسماح وهو لا يدري شيئا عن الصراعات التي تحدث في فرع الشركة الذي يديره الدكتور فؤاد من اختلاسات وصراعات وحروب وضرب من تحت الحزام وان كانت القوة في كل ذلك غير متكافئة.

جلس اسعد مع سماح في كافيتريا على النيل دار بينهما حديث طويل ابتداءه دكتور اسعد قائلا: انا تعبت قوي يا سماح وعالوز ارتاح.

تعجبت سماح من كلام الدكتور وقالت: تعمل إيه لما حضرتك تكون تعبان يبقى احنا إيه ميتين بقى.

أسعد وهو يضحك: اتعب تبغو انتو اتعب يا سماح مش التعب البدني أو المادي بس التعب النفسي والصراعات والوحده اصعب بكثير من أي تعب واديكي شوقتي الوحده والحرمان من الحبيب وعائشه.

قلب العاشق دلييله.....د/هاشم بكري

سماح بحسره: معاك حق وكلامك صح الا تسمحلي يا
دكتور بسؤال محرج.

اسعد: وفري على نفسك الإحراج انا ها اسأله لنفسي
وأجواب عليه أنت لسه يا دكتور اسعد ما تجوزتش لحد دلوقت
ليه وانت حالتك مستريحه؟

هزت سماح رأسها بالموافقة قال اسعد: بصي يا ستي ثم
غير الكلام وقال: الأول هاتكلي إيه كنتي ها تاخذينا في الكلام.
سماح: عادي ال هاتاكل منه ها اكل منه.

أسعد: جرسون نادي.

الجرسون: أوامر يا باشا.

أسعد: هاتلننا

أما علاء فقد دخل على الدكتور فؤاد ليقوع منه بعض
الأوراق فسمعه يتحدث في المحمول ويقول: الله يرحمه والله ها
يسيب فراغ، ثم قال: ما يجراش حاجه الفراغ ال هايسيبو
هايجي غيرو ال هيا الدفنه اميته يلا على خيره الله نحضر
الدفنه ونروح العزا وكمان نستقبل العزا.

علاء: اتفضل يا افندم، وقدم له الأوراق التي وقع عليها

دار الروضة

وعاد علاء بالأوراق وقال للأستاذ عادل: هو المدير عنده حد مات لا سمح الله ولا حاجة انا سامعه بيقول مات ونحضر العزا.

عادل: ما تشغلش بالك انسى ال تسمعو هنا دي عالم مجانيين سيبك منهم.

علاء: على رأيك انا رايح الحمام.

تظاهر علاء انه ذاهب إلى الحمام واتصل برمزي وكمال واخبرهم بما سمع اجمعوا على الذهاب لقسم الشرطة في الفترة المسائية لإبلاغهم وتسليم الأذن المخالفة.

أتى الجرسون بالطعام واصل اسعد معها الحديث قائلاً: انا مريت بقصة حب كرهتني في النسوان وانا طالب كنت فقير جدا ما كنتش امتلك أجرة الأتوبيس كنت من المسجلين في أفقر ناس على مستوى العالم وانفجر في نوبة ضحك هستيريه كان أقصى حلمنا نلاقي الفول إل نفطر بيه كنت مسجل نفسي في كشف الفقرا من وانا في إعدادي لحد ما اتخرجت وسافرت بعد صدمتي في حبييتي..

سماح بلهفه وتشوق: وايه ال حصل مع حبييتك؟

اسند اسعد رأسه على قبضة يديه وسكت.

قالت سماح: انا ضايقتك بسؤال؟

أسعد: صراحه آه جرح قديم كنت فاكر اني نسيتو لكن انتي دستي عليه وفتحتيه مرة تانيه.

أحس سيد بتأخير أخته فسأل أمه: سماح لسه ما رجعتش من الشغل ولا إيه يا أما؟

أمه: لسه يا ابني ما جاتش سيد يعني دي اخرت النهارده.

أمه: يمكن عندها ورديه زياده ولا اقلك اتصل عليها.

رن تليفون سماح: أيوه يا سيد؟

سيد: إيه يا سماح يعني اخرتي فيه حاجه ولا إيه؟

سماح: لا مفيش عندنا شغل زياده بس النهارده تقفيل حسابات وفتح حسابات وتغيير عميل وشطب عميل يعني.

سيد: لو اني مش فاهم عميل قصدي حاجه بس انتي كويسه؟

سماح: آه وها آخر شويه اطمنو.

سيد: طيب سلامكو.

دار الروضة

نفس الحال سألت أم علاء سعاد يعني اخوكي اتأخر
النهارده قوي؟

سعاد: يمكن عندو شغل إضافي يا أما.
أمها: ما الميعاد يا بنت الهبله فات ما انا عارفه انه عنده
شغل.

سعاد: انا اقصد شغل زياده يا ام علاء.
أمها: طيب يا فالحه كلميه في البتاع ال بتكلمو فيه.
اتصلت سعاد لم يرد عليها وجاءها صوت الهاتف الذي
تحاول الاتصال به ربما يكون مغلقا.
سعاد: تليفونو مقفول يا أما.
أم علاء: استر يا رب المرة الفاتت برودو كان تليفونو
مقفول.

سعاد: أنتي ها تفولي عليه يا أما وحدي الله.
أم علاء: لا اله إلا الله محمد رسول الله.
ذهب رمزي وعلاء وكمال إلى قسم الشرطة والتقوا

قلب العاشق دلييله.....د/هاشم بكري

بضابط الشرطة الذي أجلسهم ثم سألهم عن السبب قائلاً:
اتفضلوا.

قال رمزي: إحنا.

قال الضابط: الأول تشربوا إيه وإحنا ها نعمل إل تقولوا
عليه؟

كمال: أعرفك قاطعه الضابط: تشربوا شاي مضبوط. نادى
على العسكري: تلاته شاي مضبوط يا ابني، ثم اتجه إليهم وقال:
اتفضلو أتعرف بيكو الأول.

قال كمال: دكتور رمزي والأستاذ علاء وأشار الى نفسه
وقال دكتور كمال.

الضابط: اهلا بيكو طلباتكو؟

رمزي: احنا جاييني نبلغ عن جريمه في منتهى
الخطورة.

الضابط: جريمة إيه؟

علاء: جريمة تهريب وغش.

الضابط: تهريب إيه؟

رمزي: الحكاية يا باشا اننا شغالين في شركه أدوية.

دار الروضة

في نفس التوقيت اسعد يحكي قصة حياته لسماح ويقول:
كان فيه بينا صديق قريينا إحنا الاتنين.

سماح: على كدا انتو كنتو قرايب؟

أسعد: آه وفي يوم وانا بادور على شغل في شركات أدويه
بعد ما خلصت وكان لسه مفتاح السكن معايا كنا واخدين قوضه
انا وقريبي دا وكنا محتفظين بيها بعد التخرج ال ينزل مننا
القاهره يروح بيات فيها المهم لفيت وكنت واقع من التعب
والجوع وماشي باجر في رجليا ولقيتتي قريب من السكن قولت
اروح اريح شويه واجيب سندوتشين اكلهم هنا ومن قبلها بيوم
كنت معاها وكنا متفقين على الجواز وقالت إنها رفضت آخر
عريس كان متقدمها وجاهز من جميعو المهم.

وبدأت الدموع تنهمر من عينيه سماح وهي تتمزق
ويعصرها الالم: كمل يا دكتور رحت تريح شويه.

أسعد: قربت من الباب سمعت أصوات حركه في
الايضة حظيت ودني سمعت أصوات تأوهات وتغنجات عقلي
ودا وجاب قلت يا اخويا صاحب الاوضة أجرها لواحد ثاني
ولا إيه حاولت ابص من خرم الباب ماشفتش خاجه دخلت

قلب العاشق دليله.....د/هاشم بكري

المفتاح بشوئش.

وفي هذه اللحظة قدم الثلاثي كمال ورمزي وعلاء صور
من الأذن وصور من صفحات الدفتر نظر الضابط في الأذن
والعناوين وقال: يا خبر دا احنا جاي لنا كمان بلاغ بإن ادوية
الشركة غير مطابقة للمواصفات وبنراقبهم وها نعمل حملة
ومجهزين متخصصين.

رمزي: وكمان فيه تهريب.

تدخل علاء وقال: فيه حاجه يا باشا في غاية الاهمية؟

الضابط: إيه هيا يا استاذ علاء؟

علاء: إن الكلام دا بيحصل من ورا ظهر صاحب
الشركة ال بيعمل كل دا المدير الدكتور فؤاد وعشان اثبت
لحضرتك صدق كلامي الحجات دي ما بتحصلش الا في الفرع
ال بيديرو الدكتور فؤاد.

الضابط: إحنا عاملين تحرياتنا وعارفين كل ال بيحصل
من ساعه ما الشكوى جات.

رمزي: اطمن يا علاء على الدكتور اسعد.

في هذا التوقيت اتفق الدكتور فؤاد مع من يأخذون الشحنة

دار الروضة

وأعطى أرقامهم لعادل واتفق معه على إخراج العينات أمام الجميع وفي وقت العمل الرسمي عادل: أوامر يا ريس.

دكتور فؤاد: اعمل حسابك الدفنه بكره قالها في التليفون ثم قال: ولا اقلك تعالي المكتب احسن.

بالفعل ذهب عادل إلى الدكتور فؤاد في مكتبه دخل سلم عليه وقال له قبل أن يفتحه في أي شيء: اكتب الرقم دا واحفظه على موبايك وسيفو باسم المرحوم. كتب عادل الرقم وقال له الدكتور: انا عاوز التسليم يبقى بكره ولا اقلك اتصل بيهم دلوقت وحدد معاهم ميعاد التسليم بكره خلي بالك يا عادل التسليم والشغل شغال وكأننا هانودي الحاجه دي مخازن الإدارة.

ثم ضحك وقال: مش كدا ولا إيه؟

قال عادل: ولا إيه يا سعاده البيه ياسعادة البيه عليا النعمة قطعت البهوات من بعدك يلا سلام.

الدكتور فؤاد: اكد على الناس قبل التسليم بساعه.

عادل: علم يا استذه.

قلب العاشق دليله.....د/هاشم بكري

أما أسعد فلا زال يحكي لسماح على آلامه رفع أسعد رأسه من على قبضة يده وقال والالم يعصره: ادخلت المفتاح وإذا بي أرى خطيبتى إل كان باقيلنا اسبوع على كتب الكتاب وصديق عمري.

ويسكت الصوت ويصمت فتره سألته سماح: وعملت إيه؟

لم يرد سماح: دكتور أسعد عملت إيه؟

لم يرد هزت يده قالت: دكتور أسعد.

قال: هه.

قالت: عملت إيه؟

أسعد: عملت إيه في إيه؟

سماح: مع خطيبتك وزميك.

أسعد: آه تقيت عليهم وسيبتهم وخرجت وقررت السفر سافرت قعدت حوالي عشر سنين مسافر وكنت باسفر ناس وataجر هناك جيت مليونير وجيت فتحت الشركه ال مديرها الدكتور فؤاد والباقي معروف....

ثم صمت برهه وقال: تجوزيني يا سماح؟

صمتت برهه وقالت: ما قدرش ما اقدرش ارحمني يا

دار الروضة

دكترو اسعد وأرجوك يلا روحني.

أسعد: طيب خلاص نبقي نتكلم في الموضوع دا وقت
تاني يلا.

عادت سماح متأخرة وبينما هيا تمر في الحارة مرت
على مجموعته من الشباب قال احدهم: البت دي فرسه من يوم
ما الواد علاء سابها وهيا مش على بعضها.

قال الثاني: عليا النعمه إل يقول على البت دي شمال يبقى
وسكت لحظه نظر إليه الجميع ثم تابع كلامه وقال يبقى واد
عنده نظر يا جدع البت دي فشخت دماغى. قال ثالث: يا خبر
أنت عارف ال حصل للواد علاء دا من دعايا عليه نفسي
اغطس في البانيو بتعاها يا جدعان.

قال آخر: حرام عليكو بطلو بقى الوساخة ال فيكو محدش
في الحارة سمع عنها حاجه وحشة كفايكم بقى.

عاد علاء من القسم ودخل هو ومتعب لامته أمه على
تأخيره قائلة: يا ابني إيه ال آخرك حرام عليك دانت خلعت
قلبي.

قلب العاشق دلييله.....د/هاشم بكري

سعاد: انا مخصماك ومش ها أكلمك تاني، ها تأخر مش
تتصل أنت عارف إحنا بنخاف عليك قد إيه؟

علاء: على فكره انا جى فاصل ع الاخر ومعنديش ولا
شرطه وشويه والعهه تقفل. أم علاء: يا بنتي هاتيلو يتعشى مدام
ميت كدا م الجوع.

علاء: لا يا أما انا مش قادر آكل انا اتعيشت.

أمه: طيب يا ابني با سلامه.

عاد كل من اسعد وسماح في حاله أشبه بحالات اللاوعي
سأل سيد أخته: إيه ال أخرك كدا يا جميل شغلتننا عليك.

حاول يتكلم فقالت سماح: سيد وحياة ابوك يا سيد انا مش
مستحمله خالص دماغي حاسه ان فيه قفص عصافير
بيصوصو.

سيد: ماشي يا خالتي البرج.

سألنها أمها: أجباك تتعشى يا بنتي؟

سماح: اتعشيت يا أما.

وصل أسعد إلى فيلته وهو منهك تماما حاول السفرجي
أن يكلمه فأشار إليه بالصمت فأنصرف.

دار الروضة

وفي اليوم التالي وكما خطط كل من الشرطة خطت للقبض عليهم متلبسين وفؤاد خطط لتنفيذ جريمته وعلاء وكمال ورمزي في انتظار كشف الجريمة، اتصل عادل بالرقم الذي أخذه من الدكتور فؤاد واطمأن على الموعد وبالفعل تم التحرك في ساعة الصفر وبدعوا التحميل سألهم الدكتور كمال: بتعملو إيه يا أستاذ عادل؟

عادل: لا مفيش لا احنا ها ننقل المواد الخام ها نوديتها مخازن الإدارة.

هز كمال رأسه وقال: كدا احسن؟

بدعوا التحميل اتصل علاء وكمال على الضابط والذي كان يتحرك في طريقه للشركة حضر البوليس وقال ضابط الشرطة: وقف التحميل البضاعة دي رايحه فين؟

عادل: مودينها المخزن الرئيسي.

الضابط: المخزن الرئيسي ولا مهربينها يا استاذ عادل؟

عادل بكل ثقة: طبعاً المخزن الرئيسي وحضرتك مش من حقك انك تمنعنا من نقلها وأنا ها اتصل بالمدير حالا.

قلب العاشق دلييله.....د/هاشم بكري

اتصل عادل بالدكتور فؤاد: الو ايوه يا دكتور لو سمحت
تعالى المخازن عاوزين حضرتك ضروري.

الدكتور فؤاد: ليه؟

عادل: البوليس جه وعاوز يحجز العينات وكمان بيقول
إن العينات متهربه.

الدكتور فؤاد: طيب انا نازللك حالا.

نزل الدكتور فؤاد وسأل الصابط على الفور: مين
حضرتك واياه ال بتعملوا دا يا حضرت الظابط ال بتعملوا دا
مخالف للقانون.

الظابط لم يهتم بكلامه بل سأله قائلاً: أنت صاحب
الشركه؟

فؤاد: لا انا المدير.

الضابط: طيب لو سمحت احنا عاوزين صاحب الشركه.

فؤاد: صاحب الشركه مش موجود وأنا المسئول هنا.

الضابط: يبقى هناخد حضرتك معنا.

فؤاد: ازاي يا باشا وليه؟

مدار الروضة

الضابط: البضاعة دي متهر بهههههههه وكمان الدوا غير مطابق للمواصفات والعينات دي متباعه لشركه ... يعني عندك ثلاث مخالفات يعاقب عليها القانون. قال الدكتور فؤاد: انا ها اتصل بالدكتور اسعد يبجي ويشفلو حل في الكلام ال حضرتك بتقوله دا مش كذا ولا ايه؟

الظابط: انا مش ها استنى لما سيأتو ييجي حرزو العينات واقبضو على الدكتور فؤاد لحد ما ييجى الدكتور اسعد.

طبعاً في هذا التوقيت ووسط ما حدث كان معظم إن لم يكن كل موظفي الشركة قد اجتمعوا والكل يسأل عما حدث وما يحدث وعن موقف الدكتور اسعد حضر الدكتور اسعد بعد اتصال الدكتور فؤاد به وجد المنظر المريب أمامه سأل عما حدث: فيه إيه يا حضرة الطابط وإيه ال بيحصل دا؟

الظابط: فيه مصاييب يا دكتور وحضرتك نايم على ودانك.

الدكتور اسعد: إيه الكلام ال بتقولو حضرتك دا.

الضابط: فيه يا دكتور عينات متهربة وأدوية مخالفه
للمواصفات وهاتشوف اختلاسات كمان دا حضرتك ها تشوف

ال مكانش يخطر على بالك.

اسعد: اكيد حضرتك غلطان أو فيه سوء تفاهم ولو ولو
على أسوأ الظروف كان فيه حاجه أكيد من ورا ظهر الدكتور
فؤاد هو مش معقول ها يراقب كل واحد والشركه كبيره.

ضحك الضابط ونظر إليه بسخرية وقال: ها نشوف يا
دكتور حضرتك ولا هو المتورط في الموضوع دا، وهانظر
للاسف ناخذ حضرتك والدكتور فؤاد والأستاذ علاء والأستاذ
عادل والتحريات والمحاضر هيا ال ها تبين والبريء ها
يخرج.

الدكتور فؤاد وبدت عليه علامات الارتباك نوعا ولكنه
يحاول شتى جهده إخفائها ويقول وانا ها اتاخذ ليه ما فيه رئيس
شركه وفيه كاتب حسابات.الدكتور اسعد بدت عليه علامات
الذهول من كلام الدكتور فؤاد وقال: ايه ال انت بتقولو دا يا
دكتور فؤاد؟

أنا باقول: إن لو فيه حاجه مخالفه أنا عارف إنها أكيد ها
تكون من وراك ما اتخفش انا ها اتصل بالمحامي وهو ها
يتصرف ونظر الى علاء بحنق وضيق شديدین وانت معاهم
انت آخر واحد أتوقع انه مكن يخونني الظاهر كلام ريم عنك

صح.

الضابط: اتفضلبو يا جماعه إركبو في البوكس.

اسعد: بوكس اتفضل وانا والدكتور فؤاد والاستاذ عادل
ها نيجي وراك في عربيتي.

وصل الجميع الى قسم الشرطه وخرج الجميع بكفالاتا
و ضمانات الا علاء الذي تم حبسه على ذمة القضية. وهم
عائدون قال الدكتور فؤاد: شفت يا اسعد الاشكال ال انت
بتجيبها يا اسعد انا عاوزك تحرص من الناس وماتخليش طيبة
قلب مع الاشكال تنسيك طمعهم فيك.

اسعد: خير تعمل شرا تلقى.

اتصلا كمال برمزي وقال له: صحباتك وقعو بس اخدو
علاء معاهم، واسعد بردو مفيش فيه فايده مش مصدق ان فؤاد
بردو ورا كل مصيبة في الشركة.

أما سعاد فقد رن محمولها وجدت أن المتصل علاء ردت
عليه بلهفه قائلة: الو فيه ايه يا علاء.

علاء: انا ها اقلك على حاجه ومش عاوز أمك تعرف لو

قلب العاشق دليله.....د/هاشم بكري

انتي في البيت روعي بعيد عنها عشان اعرف اكلم.

تحركت سعاد لخطوات بعيدة واغلقت على نفسها غرفة
وقال فيه ايه وقعت قلبي؟

أنا محبوس في قسم الشرطة.

سعاد: يا خرابي ليه عرفهم انك عامل عمليه في القلب
لحسن حد يضربك مقلتش ليه؟

علاء: كان فيه مخالفات في الشركة واحنا كنا مبلغين
البوليس والبوليس جه قبض علينا كننا انا والدكتور اسعد
والمدير.

سعاد: انا ها اتصل بسيد اخليه يتصرف.

علاء: سيد مش ها يعرف يتصرف محدش هاعرف
يتصرف إلا سماح هيا ال ليها دلال على الدكتور اسعد خليها
تتصل بيه عشان هو يتصرف.

سعاد: يا ريت تكون عرفت قيمة سماح.

علاء: مش وقته أتصرفي الأول.

اتصلت سعاد بسماح وقالت: لها تعاليلي حالا يا سماح فيه
مصيبة.

دار الروضة

سماح: بعفوية علاء حصلو حاجه .

سعاد: ايو علاء اتقبض عليه وهو دلوقت محبوس في القسم وممكن يجراله حاجه وامي ممكن لو عرفت يجرالها حاجه.

سماح: انا ما اقدرش اجي عندكو انتي عارفه، وانتي كمان ما ينفعش تيجي عندنا. عموما انا ها البس ويلا نتقابل قابليني على ناصية علاء وسماح.

اتصل كمال برمزي والتقوا قال رمزي لكمال: احنا لازم نروح القسم ونشوف المحضر لربما يلبسوها لعلاء انت مش عارف جبروت الناس دي.

تحدث علاء مع عادل في الحبس قال عادل: انا مش عارف إيه ال حصل واحنا ذنبنا ايه والدكاتره طلعو واحنا ال فضلنا هنا.

عادل: الناس دي ملهاش إلا ال قدامها.

علاء: هو إيه ال حصل يا أستاذ عادل؟

عادل: بيقولوا فيه مخالفات في صناعة الدوا.

قلب العاشق دلييله.....د/هاشم بكري

علاء: والمخالفات دي تعمل فينا احنا كذا مش المفروض
كان اخدو الدكاتره ال بيصنعو الدو.

عادل: كلو ها يبان.

دخل كمال ورمزي على الضابط وجدا ضابطا غيره
سأله رمزي: لو سمحت الضابط وليد فين.

الضابط: نبطشيتة خلصت أوامر.

كمال: احنا كنا مبلغين عن تهريب في المادة الفعالة
لأدوية وغش في صناعة أدوية.

الضابط: والمطلوب؟

رمزي: كنا عاوزين نشوف المحضر عشان فيه واحد
مبلغ معانا عن العملية خايفين لرجلو تيجي في الموضوع.

وقبل أن يجيب الضابط دخلت سماح ومعها سعاد
ومحامي.

سملو على الضابط وسألوه قائلين: احنا جايين نسأل عن
واحد انتقبض عليه النهارده؟

الضابط: في إيه واسمه إيه.

المحامي: علاء محمد حسن بخصوص شركة الأدوية.

دار الروضة

تبسم الضابط ونظر إلى رمزي وكمال وقال: نفس الطلب
ونفس الكلام قال المحامي ممكن اطلع على المحضر.

الضابط: بكل سرور.

قرأ المحامي المحضر وقال: المحضر مفهوش حاجه
تدين علاء خالص .

ثم قال للضابط: بعد إذن حضرتك ممكن استأذنك في
خروجو.

الضابط: لما ييجي الضابط وليد.

رمزي: انا ها اتصل بالباشا واستأذنه.

اتصل رمزي: الو الضابط وليد؟

الضابط: أيوه.

رمزي: احنا يا باشا في القسم ومتشكرين على المحضر
وبنستأذن حضرتك اننا نخرج علاء، حضرتك عارف ظروفو
الصحية.

الضابط وليد: اديني الباشا.

قلب العاشق دلييله.....د/هاشم بكري

أعطى رمزي التليفون للباشا وانتهت المكالمة وبعدها
نادى على العسكري: تعالى يا ابني.

العسكري: أفندم يا باشا.

الضابط: روح الحجز وطلع واحد اسمه علاء محمد
حسن وهاتوا وتعالى.

سعاد كانت في حالة رعب ولم تتكلم كلمه واحده.

خرج علاء فوجد أخته وسماح ورمزي وكمال.

قال علاء لرمزي: انا خايف الظاهر كلامك صح ممكن
يلبسو هالي ويطلعو منها.

كمال: ماتخفش احنا شوفنا المحضر والمحامي قال إن
موقفك تمام في المحضر. قال المحامي بعد أن عرفته عليه
سعاد وهي تتكلم بعتاب ولوم تبديه لهجتها وعينيها: المحامي إل
سماح جابتو عشانك.

المحامي: اظمن انت موقفك في القضية تمام صراحة
الضابط عامل محضر معلقش فيه ادانه بالعكس عاملك شاهد
ملك.

قال علاء للضابط: ممكن امشي يا باشا؟

دار الروضة

الضابط: طبعاً بس فيه قضية.

وفي اليوم التالي أفرج عن عادل أيضاً.

خرجوا جميعاً وأمام القسم نظر علاء إلى وجه سماح فوجد الحزن والأسى في عينيها قال لها: سامحيني يا سماح. فرحت سعاد وقالت: والله أنا لوليه اننا في الشارع لزرعرت.

أخرجت سماح محمولها واتصلت بالدكتور اسعد رأى الرقم فلم يرد عليها في المرة الأولى أعادت الاتصال بعد أن قالت لعلاء: ما تخفش أنا ها اتصل بالدكتور اسعد وافهمو على كل حاجة.

كمال: ماتغلبيش نفسك الدكتور اسعد مش ها يصدق حاجه في الدكتور فؤاد خالص والدكتور فؤاد أكيد شحنه من نحيتكو على الآخر واكيد اقنعو ان علاء هو ال ورا دا كله فالأحسن توفري على نفسك.

سماح تتصل بالدكتور اسعد رن المحمول ولم يرد علاء: ماردش عليك ولا إيه؟

قلب العاشق دلييله.....د/هاشم بكري

سماح: ها ارن عليه تاني رنت مرة ثانية رد عليها اسعد:
آلو ايوه يا سماح فيه حاجه ولا ايه؟

سماح: ايوه يا دكتور انا باتصل بحضرتك من قدام قسم
الشرطة بعد ما خرجنا علاء.

اسعد بلهجة حادة: والمطلوب.

سماح: يعني حضرتك بتتكلم بلهجة غريبة ما سمعتهاش
منك قبل كده.

اسعد: عاوزاني اتكلم معاكي ازاى يا شلة نصابين
وحراميه وبتعضو الايديين ال بتتمد ليكو. وأغلق التليفون.

صدمت سماح صدمة كبيرة سألوها: قلك ايه؟

قالت:الظاهر انتو عارفين الدكتور اسعد أكثر منى كلامك
صح.

عادوا بعد أن اتفقوا على تحريك القضية ومتابعتها.

تعمدت سعاد أن تترك الكرسي في الميكروباص وتركب
في كرسي بعيدا عنهما سأل علاء سماح: احنا ها نعمل ايه في
الشغل بكره ها نروح ولا لأ؟

سماح: أنا عن نفسي بعد ال سمعتو من الدكتور اسعد مش

دار الروضة

ها أروح الشغل بكره، بس انت لازم تروح عشان تتابع الموضوع.

سرحت سماح في كلام اسعد وأحست بإهانة شديدة وجرح عميق وتعجبت مما سمعت ولم تجد مبرر لهذا الكلام ولكنها أقنعت نفسها بفكرة الخيانة التي تسيطر على فكر الدكتور اسعد.

أما علاء فبدأ يعيد التفكير في مواقف سماح ويقارن بينها وبين مواقف ريم والكل صامت اللهم إلا الأفكار حتى وصلوا إلى المحطة نزلوا جميعا لم يتكلم احدهم بكلمة عادوا إلى بيوتهم نظرت سعاد إلى علاء نظرات عتاب وتأنيب.

قال لها علاء قبل أن تتكلم كلمة واحده: معاكي حق وانا مش متحمل كلام.

قالت: سعاد يا ريت نكون فوقنا.

غابت سماح في اليوم التالي لم يكلف أسعد نفسه حتى مجرد الاتصال بها دارت التكهّنات في المكتب عن سبب الغياب اتصلت بها إحدى الزميلات أخبرتها سماح بأنها في أجازة مفتوحة هذه الأيام لظروف خاصة توقعت كل زميله

قلب العاشق دلييله.....د/هاشم بكري

سببا لكن الكل اجمع على أن هناك خلاف بينها وبين الدكتور
أسعد.

استمرت القضية في القضاء حاول فؤاد بشتي الطرق أن
يجعل علاء هو المتهم الأول بل يجعله المتهم الوحيد.

في هذه الفترة قرأت ريم عن القضية في الجرائد فعادت
الاتصال بأسعد وقالت: عرفت بقى إني كلامي كان صح وكان
عندي حق واني كنت مدوره عليك.

اسعد: فعلا.

ريم: طيب انا عاوزه اشوفك.

أسعد: وانا مستنيكي في أي وقت ومكان تحبي تروحيه.

ريم: بس فيه حاجه.

أسعد: او مري.

ريم: متنساش هديتي.

أسعد: من عنيا يا قمر.

تسللت ريم إلى حياة اسعد وذهبت معه إلى فيلته والتي لم
تدخلها أنثى تقريبا أعجب بها بشده حاولت بعد أن تناولت معه
العشاء في فيلته أن تدخل حجرة نومه فقالت: ما تيجي يا اسعد

دار الروضة

يوه قصدي يا دكتور اسعد انا أسفه لساني خاني.

أسعد: دا انتي لو قلتي الدكتور مرة ثانية انا ال ها از عل منك ويبقى لسانك بجد خانك.

ريم: يوه مايصحش.

اسعد: هو ايه ال ما يصحش؟

ريم: إني انادي الدكتور اسعد واقلو يا سعودي يا خبر فيه حاجه بتشكني هنا. وأشارت إلى صدرها: مد أيدك حوشها.

أسعد: أمد ايدي فين؟

ريم: هنا.

وأشارت إلى فتحة صدرها هم بمد يده وعندما اقتربت يده من فتحة صدرها تذكر خيانة خطيبته له فتوقف بعد أن عاد شريط ذكرياته قالت: ما تمد ايدك يا سعودي وتشوف ايه ال بيشكني رجعت ليه.

اسعد بانفعال: حاضر ها امد ايدي.

رفع يده وضربها على وجهها وانها ل عليها ضربا وركلا وطردها من الفيلا وهو يبكي ويقول: او عه اشوفك هنا ثاني

قلب العاشق دلييله.....د/هاشم بكري

كلكو خونه كلكو خونه يا سعيد يا سعيد.

حضر سعيد مسرعا: اوعه لو شفت الزباله دي تدخلها
هنا ثاني سامع اطردها بره ارميها بره.

خرجت ريم وهي في حاله غريبة ومن يومها اختفى
أثرها.

اتصل اسعد بسماح وهو يبكي بانهييار ويقول: أنتي
انصف واحده قابلتها في حياتي يا سماح أنتي عمله نادرة
سامحيني.

سماح: اسامحك على ايه انت ما عملتش معايا حاجه
وحشه وال انت قلتو من حقك.
أسعد: أنا آسف مرة ثانيه.

سماح: أنا يا دكتور كنت علوزاك تقف معايا ننصر الحق
وونصف المظلوم ونعين الضعيف مش أكثر.
أسعد: وانا ماعكي يا سماح.

انتهت القضية وظهر الحق وعاد علاء الى سماح
وتزوج سيد سعاد وتزوج الدكتور اسعد من إحدى زميلات
الدراسة بعد أن قابلها صدفة وتم عمل فرح جماعي في احدى

دار الروضة

القاعات الكبرى في أحد الفنادق وقام كالعادة الدكتور أسعد
بتحمل تكاليف القاعة كامله من الالف إلى الياء.

دكتور: هاشم بكري

تليفون/٠١١١٢٨٨٢٩٥٩

Em:elshekh.hashem@gmail.com

الفهرس

٤.....	الفصل الأول.....
٤.....	الحادثة.....
٧٩.....	الفصل الثاني.....
٧٩.....	حياة جديدة.....
١٢٢.....	الفصل الثالث.....
١٢٢.....	محطة المترو.....
١٧٣.....	الفصل الرابع.....
١٧٣.....	وانكشف الغطاء وعاد الحب والوفاء.....
٢٣٧.....	الفهرس.....